

BULONGAMÈ BWÀ ÈKÈLEEZIYÀ



Mwab'ewu, batu mene baciteemesha—baciteemesha bìshi? Eyowa's, uh-huh...?.. [Katùpà kàà mukàbà wà mèyi munda mutupù—Muf.] Ikalaayi badìlongolole bwà kubijima. Pashiishe, dìbà adi, mèmè ki wanuleeja ne mutù, mùshindù ewu. Nwamònu anyì? Nwamònu anyì? Ekèlekèle, nnuleeja ne mutù's. Nwènù. . . [Mwanèètù wa balùme kampànda ùdi wàmba ne: "Udi muswè bwà mèmè kucyènza dìbà kaayi?" Mwanèètù wa balùme kampànda ùdi wàmba ne: "Yèyè's wàmbi ne: 'Cìteemèshaayi.'"]

Bànà bèètù, tudi babìikidisha didisangisha edi mwab'ewu dilòòlò edi mu kiipacila kàà kumanya mùshindù wa kwendesha Èkèleeziyà wa Nzambì udi ne mwoyi, bu mùdibi ne, tudi twitabuuja ne twètù tudi citùpà cyà mwine Èkèleeziyà ewu.

² Ndi muswè, bwà kumpàlampàla, ndi muswè kwamba ne mu ngendu yànyì pa buloba bujimà, bwà ku dyànyì pàànyì dimanya, ewu ngùmwè wà ku myaba yà mitàmbe kwikala yà nyumà mùdi umvwa Nyumà wa Nzambì kutàmbe mwaba mukwàbò kanà wònsò wùndiku pàànyì mumanye. Mvwa mu meeji àànyì ne myaba mikwàbò yìbìdi yìvwà pa ciibidilu yà nàнку, kadi patùdi twakulangana apa kabicyèna bìmwèka bu ne tudi—tudi tumòna miine myaba ayi to; ùmwè wà ku yòyi mmukabwele mu bulongolodi, ne mukwàbò wòwò kaayi wènji—wènji bu ne mmudishinde.

³ Pa nàнку bàvwa bambìikile makèèlela awu ne—ne bangambile ne nuvwa dijinga ne disangisha bwà kungeela nkonko eyi ya yitangila midimu yènù mu eèkèleeziyà ewu, ne mèmè. . .bwà ciine aci ki bündi muvwile kaaba aka dilòòlò edi, mbwà. . .ne bwà—bwà kuteeka èkèleeziyà, anyì bwà kunùpeesha bintu bìndi mèmè ngeela meeji ne—ne mbyà mushinga wà menemene bwà kufikisha èkèleeziyà ewu ku diya kumpàla.

⁴ Bànà bèètù, ndi mutwishiibwe ne nwènù nudi nufika ku dyumvwa ne, bu mungàmbi díyì dyà ne ewu mwaba ngwà nyumà. Kì mmwaba wa mutàmbe bunene pa buloba bujimà to, ne kì mmwaba wutùdi ne misambu yà mitàmbe búngì, ne mbila ya mitàmbe búngì, ne mikunda ya mitàmbe búngì, anyì dyakula dyà mu myakulu dya dipite búngì, ne bikwàbò to, kì nnàнку to, kadi nngiikàdilù wà Nyumà ùdi ukwàta mudimu mu tabernacle emu. Ne, too ne mpindyewu ewu, ndi muswè kwela Mwanèètù Neville kàalumbandi ne kumwela twasàkidila, ne—ne nwènù bànà bèètù bàdi mwaba ewu aba, balubuludi, ne balami, ne mulombodi wa kàlaasà kàà Dyalumingu, ne bwònsò, bwà—bwà binùdi benze bwà kwambulwisha bwà ne cyòci eci cilamiibwe mùshindù ewu.

Civwa ndisambila dyànyì dyà ntàntà mule, ne dijinga dyà kacya ku bwànà, dyà kumònakù èkèleeziyà mutèeka mu bulongame ne mulama mu bulongame.

⁵ Mpindyewu, patwàkalàmbulà èkèleeziyà, ngàkanwàmbila ne: “Paanyimà pàà katanci kakesè mvwa ne cintu kampànda cyà mèmè kuyiikilanganaku neenù pa cyòci mùshindù wa kutèeka cintu eci mu bulongame, mùshindù wùvwàbi bìkèngela bwà kwikalaci cilombòdìibwe.” Nenku nwàkatwàdija . . . paanyimà pàà mèmè muumuke kaaba aka, tuvwa ne bambi ne bikwàbò. Kadi mpindyewu, bu mùvwà Mwanèètù Neville mucikàle ànu citende munkaci mwètù, pààkalwàye munkaci mwètù apu, ngàkadyàmbidila ne bìvwa bifwànyineku kwikala bìmpè bwà Mwanèètù Neville kwikalaye mutàmbe kushindama bìmpè menemene mu Diitabuujà kumpàla kwà mèmè kutwàla bintu byà bwena bìndì pabwìpì ne kutwàla mpindyewu ebi. Kadi mpindyewu, paanyimà pàà mèmè mumane kujandula ne ùdì wènda ùshindama bìmpè mu Diitabuujà, ne mwikàle ùmvwa cìdì Dilongesha, ne—ne yèyè wàkwàci mudimu wa ntèmù wa lulamatu bwà Kilistò ne ùshàala kacya wàkwàta citùdì twitabuujà ne ki Bulelèlà aci, ngeela meeji ne dîbà dyàkànyì mpindyewu, difwànyine kwikala cikondo cìmpè, bwà kumusemeja pabwìpì mu . . . ne munkaci mwènù nwènù bakùlù ne bikwàbò mwaba ewu bàà mu èkèleeziyà, bwà nwamòna mwà kwangata mèyì matuma aa ne kwikala kuàvùluka ne, ngàà ku dyànyì pàànyì dimanya kumpàla kwà Nzambì. Ne pashiishe ndi ne ditekemena dyà ne nenuteeke bintu ebi mu cyenzedi mu mùshindù wùndì mbyàmba ewu, bwalu bìdì bìkèngelakù bwà muntu kampànda kwikalaye mutù kaaba aka. Bìdì bìkèngela bwa nwènù kwikala ne . . .

⁶ Mpindyewu, ncyèna nteeta kunyènga bukòòkeshi anyì cintu kampànda cyà mùshindù awu nànsha, kadi, nudi numòna’s, muntu anyì cintu kanà cyònsò eci cyòci ciikàle ne mitù yìbìdì, kaciyèna—kacyèna cimanya mùshindù mwine wà kuya to. Kacya Nzambì kàtu mupèeshe Èkèleeziyà Wendè mitù yìbìdì to, kacya Yèyè kàtukù mwanji kwenza aci to, citu ànu mutù wùmwèpelè. Yèyè ùkaadikù ànu mukwàtèkwàtè mudimu misangu yònsò mu lukòngò ne lukòngò lwònsò mùshindù wutùdì balonge mu Mifùndu ne, kùtu misangu yònsò ànu muntu-nkààyà ùmwèpelè utuYè ùkwàta nendè mudimu. Bwalu panùdì ne bantu bàbìdì, nudi ne mmwènenu yìbìdì. Nènku bìdì bìkèngela cikàfikè ku cyeyemenu cyà ndekeelu cimwèpelè, ne cyànyì cyeyemenu mèmè cìdì n’Dìyì, Bible. Ne mèmè bu mpaasata wa ekeleeziya kaaba aka, cyanyi cyeyemenu mèmè cìdì n’Dìyì, ne ndi muswèè . . . ndi mumanye ne, nwènù bàna bèètù, nutu mu mùshindù kampànda nuntàngila mèmè ne ndi cyeyemenu cyènù pa bìdì bìtàngila . . . pìikalàbi ne mèmè ndi ndonda Nzambì bu mwàkambà Pòlò mu Mifùndu ne: “Ikalaayi nundonda mèmè, bu mùndì mèmè ndonda Kilistò.”

7 Nènkù dîbà adi ndi ntèkemena ne nwênù bânà bèètù, pa dîbà kanà dyònsò dinùdì nummòna nseesuka ku Mufùndu ewu, nùlwe kùndì pèètù pàà bàbìdì bwà kungambila ne mmwaba kaayi wùndì mutùpàkèene. Nànsha byòbì ne udi umwe wa ku balubuludi anyì wa ku . . . anyì ní udi mulami wa ku ntempelu, nànsha wèwè mwikàle nganyì, udi mwenzèjìbwe bwà kulwa kùndì, bu kùdì mwanèènú mu Kìlistò, bwà kungambila pàndì mutùpàkane pa bìdì bitàngilá Mifùndu. Pìikalàku lukonko kampànda, túsombele pànshì bwà kupetaku dyandamuna, cyàpàmwè.

8 Nènkù ki bwà cinyì nudi balwè, mùndì ncinka, kùndì dilòòlò edi, bamfikishe mwaba ewu, mbwalu kùdì nkonko kaaba aka yìdì yimweka bu ne yìdì yèdiibwa mu meeji ènú bwà bintu bìndì naabi—naabi kaaba aka. Mpindyewu vùlukàayi, bânà bèètù, mèmè ncyèna mumanye to . . . kakwèna mènà mafùnda nànsha pa kàmwè kàà ku tubeji etu to, kadi . . . kadi mmifùnda, ne mèmè ncyèna mwa . . . ncyèna mumanye ne udi muyìfunde nganyì to, kadi nnkonko yìdì mu meeji ènú amu, ne mèmè ndi kaaba aka bwà kuyàdamuna ku dyànyì pàanyì dimanya.

9 Ne vùlukàayi ne, Nzambì mmutèkèmene bwà mèmè kwenza bwà ne nshaale mu Dìyì. Ne mèmè ndi mutèkèmene ne nwênù nwénzè ne nwikalè nutèeka Dìyì mu cyenzi, nwamònu's, nwamònu's, mu èkèleeziyà ewu. Nènkù nùmulamàayi wa nyumà, bwalu, vùlukàayi ne, makole ònsò a—a bukalenge bwa mîdimà bwà Sataana neikalè matàngija kunùdì bwà kunùlwisha panùdì nubanga kukola mu Mukalenge. Nènkù nudi ne cyà kwikala masàlaayi, kanùyì ànu masàlaayi a baadiikidì to. Nukàadi masàlaayi makùlumpe mpindyewu, ne malongeshiibwe bwà kulwà mvità. Ne Sàtaanà nealwe munkaci mwênù, neanufikishe ku dikokangana muntu ne mukwèndè bu yèyè mwà kupeta mùshindù. Numwipàtaayi dyàkàmwè; nwênù nudi bânà bàà muntu; ne yèyè mmwena lukuna. Ne twètù tudi kaaba aka mbwà kwikala bakwàte dibèndela mu cikondo eci cyà Bukènkè bwà dilòòlò, bwà ne, pàdì mîdimà mibwikile buloba ne bukalenge bujimà bwà èkèleeziyà mukanci mwà kubwela mu Nsangilu wa Maèkèleeziyà apa. Nènkù àbìdì mmale àsàtù mmîpi nebàteete kulamika citaata ku ciibi eku ne: "Mukàngìbwe!" Ne dîbà adi nebikèngele bwà twètù kwikala tudisangishila mu myaba mikwàbò, bwalu ncyà bushùwà ne nebàkangè èkèleeziyà eyi òmwè dyà ku matùkù àdì pànshì aa patwiikalà twètù babèngè kwangata cimanyinu cyà nyama wa lwonji. Nènkù butùdì naabu mbwà kushààla ne lulamatu kùdì Nzambì too ne pàatùsùlulà lufù, ne cyòci aci ki citùdì ne meeji à kwenza.

10 Mpindyewu buludi ku . . . Nènkù ndi muswè kulomba ne, dîbà kanà dyònsò diikalà cyònsò cyà ku bintu ebi mwà kwediibwa mpatà, mukàbà wà mèyì ewu wèdiibwe kumpàla kwà bidimba byà èkèleeziyà ewu, nwamònu's, mu masangisha ènú, anyì kumpàla kwà disangisha, ànu kumpàla menemene

ne disangisha kubangadi. Nùkangule cisanji nwèlè mukàbà wa mèyì ewu! Nènku beena mu disangisha edi biikalèku bumvwe ne bantu aba mbeena dibànzà kùdì Nzambì, bu mucipu wàbò mu èkèleeziyà ewu, bwà kwambulwisha ku dilama dya mèyì makùlù aa. Wèwè udi mwà kubèngangana naabo bôbò ku mèyì; kadi bu mèmè mwà kukulekela umulombola wèwè, dîbà adi mèmè's ki wabènganganà neebè ku mèyì. Bidi bikèngela bwà twikalèku ne mushimi kampànda mu mwaba kampànda mùdì mwà kusanganyiibwa nkàmisha kampànda. Nènku wa mwîmpè menemene wûndiku mèmè mumanye, ki wûndi nnpùèsha ku Nyumà Mwîmpè ewu, mwikàle ngèza bwà ne Yèyè ikalè wanyì Nkàmisha. Nènku mukàbà wa mèyì ewu wikalè wenù nkàmisha pa bidi bitàngilà nkonko eyi.

Mpindyewu, lwà kumpàla lùdì ne:

220. Èkèleeziyà neikalè wènza maalu bishi pa bidi bitàngilà malòmba à dyambulwisha mu mfranga a . . . bwà byàkudyà ne byà kuvwàla? Ncyenzi kaayi—kaayi, ncinyi—ncinyi civwà cikèngela bwà èkèleeziyà kwenzayè?

¹¹ Mpindyewu tudi bamanye ne èkèleeziyà mmwambùle bujitu bwà bèndè yèyè, bwà bidimba byètù twètù byà èkèleeziyà kaaba aka, tudi bambùle bujitu bwònsò nkòong patùdì ànu ne mùshindù wà kubàkùmbajila majinga awu. Tudi bambùle bujitu bwà bèètù twètù, mbwena kwamba ne, bidimba bishimàte, ne bya tabernacle ewu bitù bilwa mwaba ewu dîbà dyònsò ne bikuukwila neetù. Tudi beena dibànzà kùdìbò, bôbò bu bânà bèètù bàà balùme ne bàà bakàjì bàkaadi bafile cijaadiki cyà ne mbidimba byètù byà disangisha edi.

¹² Mpindyewu, tudi bamanye ne kùdì miliyò dilòlò edi bàdì kabàyi ne byàkudyà to, kabàyi ne byà kuvwàla to, ne twètù tudi bafwànyine kunanga bwà kwikalakù bakùmbàne bwà kwambulwisha cisumbù cyàbò cijimà aci, bwà kwenza cyònsò citùdiku pèètù bakùmbàne bwà kwenza aci; kadi pa bidi bitàngilà mfranga katwèna ne mùshindù wà kwenza nàнку to, katwèna mwà kwambulwisha buloba bujimà to. Kadi tudi beena dibànzà kùdì bèètù twètù. Ne ndi ngeela meeji ne, mu cyòci aci, ne dîbà adi bu twètù mwa kwikala ne kantu kanà kwònsò kashààle pamutù kanùdì nujinga kwambulwisha naaku bantu bàdì kabàyi bidimba byà èkèleeziyà ewu kaaba aka, cintu kampànda cinùdì baswè kubàpèèsha, bivwa bikèngela bwà aci kutangidiibwaci kùdì kasumbù kàà balami.

¹³ Balami ki bàdì—bàdì bakùmbàne mwà kusùnga mvità ayi, anyi bwalu abu, eyowa's we; mbwalu mu Bible pàakajuukàku dikòkangana pa bwalu bwà byàkudyà ne bivwàlù, ne bikwàbò, mu Mukàndà wà Byenzi, bàakabìikidisha bàpostòlò pa bwalu abu, ne bôbò bàakamba ne: “Ndàayi nùkadikèbèlè nwènù biine balùme mwandamutekete bàdìbò bàfidila bujaadiki ne mbàà kweyemena, ne bùle tente ne Nyumà Mwîmpè bwà bôbò

bààmòna mwà kudifila ku bintu ebi. Bwalu twétù netùdifile díbà dyónsò ku Diyí dyà Nzambì ne ku disambila.”

¹⁴ Nenku kí mmudimu wà mpaasàtà wà kudifila ku. . . ku byàkudyà ne ku bikwàbò abi to. Cidi ne cyà kwenjiibwa kùdì balami. Kí mbalubuludi to, mmudimu wà balami bwà kwenza cyôci eci. Nènku díbà adi bìvwa bikèngela bwà cyôci eci kwikalaci. . . Vùlukàayi ne mu Bible, bàvwa bàmbùlwisha bààbò bóbò, beena Ngelika ne beena—ne beena Yuda, pàakajuukà dikòkangana dyà ne bàmwè bàvwa bàpeta byàbùngì ndambù kutàmba bakwàbò, kadi bàvwa mbantu bàvwa bàpàane bintu byàbò byónsò ne babifile ku èkèleeziyà bwà dikwàcishangana, ne díbà adi bwà—bwà kubyàbànyinanganabo munkaci mwàbò nzevu mwongo. Kadi kujuukaku ndambù wa dikòkangana, nenku apu ki patùdì bapetèlè balami bèètù bàà nzànzànzà. Ne awu ki wùmwè wà ku midimu yàbò, ngwà kwenza cyôci aci.

¹⁵ Ndi ngeela meeji ne, bwà bèètù twétù, bwà bantu bèètù twétù, bìvwa bikèngela twikalè tucyuka bwalu bwàbò. Ne bìvwa bikèngela bwà kwikalà kufila bwalu abu, didyàbakeena kanà dyónsò, kùdì mulombodi wa kasùmbù kàà balami, ne díbà adi bìvwa bikèngela kucitàngilabò kùdì kasùmbù kàà balami bwà kumònabo ne cidìbo bakùmbàne mwà kwenza ncinganyì pa bwalu abu. Nenku bintu byónsò ebi bu bìvwàlù, ne byàkudyà, ne dyambulwisha dyà ne mfranga, anyì ní ncinyì cyónsò, bìvwa bikèngela bwà kupicilabi kùdì balami. Pashiishe balami, pàdìbo bàngata dipàngadika dyà ne bàdì—dyà ne bàdì. . . ciikalàbo mwà kwenza pa bwine bwalu abu aci, pashiishe bìvwa bikèngela bwà kufidiibwaci díbà adi kùdì—kùdì mulami wa cibucilu, bwà kumòna ní mulami wa cibucilu pa diine díbà adi mmukùmbàne mwà kufuta bùngì bwà mfranga ebu anyì, anyì—anyì kusùmba biine bìvwàlù ebi, anyì ní ncinyì cyónsò pa bwalu abu. Kadi bìvwa bikèngela bwà kasùmbù kàà—kàà balami kudisangishaku bwà bwalu abu, ne kacýèna ciya kùdì balubuludi anyì kùdì mpaasata to. Bwalu abu mbwà balami, cyónsò mu kaabujimà.

Mpindyewu, pashiishe, lukonko lwibìdì.

221. Mbikùmbàne bwà kwambila pa bùtòoka ku cyambilu ne bìvwa bikèngela bwà dyakula dyà mu myakulu ne dyandamuna kwikalabi byènjiibwa mu didisangisha kampànda kumpàla kwà disangisha anyì?

Alu ndukonko lwibìdì lwà pa kabeji kàndì naakù mwaba ewu aka, kàdì kaakarta kakesè aka.

¹⁶ Mpindyewu, eci neifwànyìne kwikalà citangila mpaasàtà mwaba ewu, nwamònu’s. Bwalu yèyè—yèyè, twamb’eku twamb’eku, ngudi kumutù kwà citùpà cyà maalù à nyumà, yèyè ki udi mfùmù wa cyôci aci. Balami bóbò mbampùlushì mu èkèleeziyà, bwà kwikalabo bàlama bulongame ne bàtàbaleela bintu ebi, ne bàdiisha bapèlè, ne bikwàbò. Balubuludi bàdì bàtàngila lupetu ne nzùbu; ki bìdì bikèngela kwikalabò

bàtàngila mbyòbì abi. Kadi mpaasàtá yéyè ngudi kumutù kwà—kwà ditàngila dyà citùpà cyà maalu a nyumà, nènku bivwa bikèngela bwà eci kuyaci kùdi wêwè, Mwanèètù Neville.

¹⁷ Mpindyewu, kùdi...kùkaadi cikondo kampànda pàvwà bulongame butèèkiibwe, èkèleeziyà. Mémè ntu bulelèlè ngiitabuuja dyakula dyà mu myakulu, ne dyandamuna, ne mapà malenga ónsò à Nyumà àdi Nzambi mutèèke bwà kwikalawù mu èkèleeziyà awu. Kadi tudi tusanganyibwa ne mwoyi mu ditùkù didì menemene ànu bu dyà cikondo cyà Bible, mùdi maèkèleeziyà...Mpindyewu, monaayi Pòlò, wàkajuula èkèleeziyà ku Efèsò, èkèleeziyà wa beena Efèsò awu, uvwa èkèleeziyà mushindàmija bímpè awu. Nukààvwakù bamòne anyi? Tudi twitabuuja ne Pòlò, ne yéyè wàkamba yéyè mwine nànkù ne, ùvwa wàkula myakulu yàbùngì, ne tudi bamanye ne yéyè ùvwa ne mapà a myakulu. Kayiyi yìvwàye mulonge ayi to, kadi yìvwàye mupèèshibwe mu mùshindù wà nyumà ayi, bwalu mmùdiye ùcyàmba mu Kolintò amu. Nènku bwà kulaminyina díbà, ncyèna ànu mbuulula mu Bible bwà mémè kunùbàdilaci to, bwalu ncifwànyine kutùfikisha ku—ku dishààla kaaba aka ntàntà mupitèpité bule dilòlò edi, bu mùndi neiyi ne díbà dipitèpité bùngì to. Nènku mpindyewu...kadi ànu bwà nùfikè ku dimòna bitòoke tòò.

¹⁸ Mpindyewu, kacya kabyàkakèngelakù bwà Pòlò kwakulaye ne èkèleeziyà wa beena Efèsò anyi ne èkèleeziyà wa beena Loomo, anyi nànsha umwe wa ku mikwàbò èkèleeziyà ayi, pa mapà àbò à Nyumà, pa mùshindù wà kuàtèèka mu bulongame to. Kadi ncyà bushùwà ne byàkakèngela bwà yéyè kwakula mu mùshindù wà kashèndèndè pa bwalu abu ne beena Kolintò, bwalu bòbò bàkaavwa bacìvwije cilumbù cyà bàkòkàngana díbà dyònsò. Ki Pòlò kwambayè, pààkafikàye munkaci mwàbò ne, bòbò basangane ne kùvwa muntu mwikàle ne mwakulu ne mukwàbò mwikàle ne musambu, ne yéyè wàkasàkidila Mukalenge bwà mapà àbò ónsò malenga ne bikwàbò bintu byà muùshindù awu abi. Nènku bu nwènù mwà kumòna mu nshapità wa kumpàla anyi mwibìdi wa Kolintò amu, Pòlò ùvwa ùbàmbila, bilondeshile myaba, cìvwàbo mu Kilistò, mùvwàye...mùvwàbo mu Kilistò bilondeshile myaba.

¹⁹ Pashìshe pààkamanàye kubàmbila, díbà adi byenze bu mùdi tààtù ki kubangaye kulekelela mfimbù pambìdi pààbò, ne kwambayè ne: “Ndi muumvwe ne nudi ne makokyanganyi munkaci mwènù, ne ndi muumvwe ne nudi nukwàcika maala ku meesa à Mukalenge.” Yéyè kààkabànyènga bwena Kilistò bwàbò to; ne nwènù bânà bèètù kanwenjiku nànkù awu to, kubànyènga bwena Kilistò bwàbò, kàdi bwalu mbwà mùshindù wùdìbo bàditwàla mu nzubu wa Nzambi. Ki mwaba wùdi bwalu ngòwò awu.

²⁰ Mpindyewu, ndi mufwànyine kwamba nùnkù, ànu mùvwà Pòlò wa kale mwàmbe amu, ne: “Panùdi nudisangisha,

umwe yêyè wakula, mukwàbò àndamunè. Kwòkò kakùyì mwandamunyi to, díbà adi nùpuwàayi. Kàdi kwòkò kwikàle mwandamunyi. . .”

²¹ Mpindyewu, nkàadi mutàngile èkèleeziyà ewu, ne nkàadi mumòne ne nukàadi nukola, ne nkàadi mumòne mapà a Nyumà àbùngì àkwàta mudimu munkaci mwenu. Bwà kwamba menemene, byàkakèngela bwà mémè kulwa kùdì Mwanèètù Neville bwà Díyì kampànda dyà kùdì Mukalenge bwà òmwè dyà ku ówò, bwà kumulongolola pa cintu kampànda cìwàyè wènza.

²² Nènku bu ne mémè . . . pìikalàbi ne Mukalenge udi . . . Nyumà Mwimpè mmumvwije mutàngidi wa Cisumbù cyà mikooko, díbà adi's mmudimu wànyì bwà kunwàmbila Bulelèlà. Nènku ndi ne disàkidila dyàbùngì kùdì Mwanèètù Neville, mùdiye mubawule maci ku Bulelèlà. Mémè ndi mwà kuBwamba ànu mùdìYe Yèyè ùngambila amu.

²³ Mpindyewu, pa bwalu ebu, pàngámònu èkèleeziyà wenù wènda ùkola, nènku ki mémè kucimòna's. Nènku mu èkèleeziyà, mùshindù wutùvwà tucyènza ku cibangidilu ngwòwò ewu, ne wòwò mùshindù ewu ki wutùdì—wutùdì baciswe cyàkàbìdì.

²⁴ Mpindyewu, nwènù kanùyì nutàngila to, pàdì bânà bàà mu mabòko . . . Cintu cyà kumpàla cidi mwànà wa mu díbòko wènza nkuteeta kwakula kadi pèndè kàyi mumanyè mwà kwakula to. Nwamònu anyi? Ùdi ùpàtula ntutu bùngì cyanàànà, ne mutooyi, ne—ne bikwàbò, kadi ùdi wèla meeji ne yèyè udi ànu . . . ùdi mwà kupita ne muyiishi ku dyakula pa díbà adi. Ee, tudi tusangana aci kî ng'ànu mu nsòmbelu wa mubidi to, kadi tudi tusangana aci ne mu nsòmbelu wa nyumà kabidi. S'mmwànà *mukesè*. Kadi wèwè muteete kulongolola mwine mwànà awu ne kumunangulaku ndambu wa mapi kumfundu aku ne bwalu nyawu “ùsàmanana ne mwadi” ne ùteeta mwà kwakula, s'neùnyange mwànà awu. Nwamònu's, ne neùmutàpè ku mwoyi. Nènku mbitàmbe bwimpè bwà kulekela mwànà awu ùkolakù ndambù too ne pààmányàye cyà bushùwà mwà kushindumuna myàku yèndè bilenga, ne díbà adi kumwambila *dìbà* dyà kwakula. “Kì mpàdì papa wàkula apu anyi pàdì maman wàkula apu to.” Kàdi pàkaadìbi mu cikondo cikumbàne, àkulè pèndè. Nudi bangumvwè anyi? Mpindyewu, ùmulekèlè àkulè pàdì cikondo cyèndè cyà kwakula cìlwa.

²⁵ Mpindyewu, pìikalàku ne nkàadikù mémè ewu mupete cintu kampànda cìtù bu dyèbà mu musunya wànyì, mu masangisha a pântù mpàtuka, mpàtù muntu ujuuka pàndì munkaci mwà kuyiisha apu ne díbà adi yèyè ufilà mukenji mu myakulu ne mwikàle ùkòsa Nyumà ku díyì. Nèidi mfùminakù mu disangisha kampànda mu New York ne mu myaba mishiileshiilangane mùtù bambi bàlekela bya nànu awu byènzeka, ku musangu ne ku musangu, ne ciine aci's cidi ànu—ànu cibwejàkàji pa cyòci. Nwamònu's, pàdì Nzambi

munkaci mwà kukwàta mudimu mu lùpòndà lùm̀wèpelè lwà meeji, Yèyè. . . aci ncifwànyine kwikala—ncifwànyine. . . Yèyè's mmufwànyine kwikala munkaci mwà kunyangakaja kiipacila Kèndè Yèyè mwine, piikalàYe uteeta bwa kukufikishila wèwè lùpòndà kampànda lwà meeji, kufikishila disangisha, bwà kwenza dibiikila dyà ku cyoshelu kadi cintu kamàanda cìlwa cìmanyika.

²⁶ Cileejilu, bu mùdi eci. Tudi basòmbe ku mèèsà, tuyiikila, biikàle munkaci mwà kwakula bwà Mukalenge. Kadi Junior ubwela lubilu ulwa ku meesa aku, ne lukasa lwònsò, ùtùumusha ntèmà yònsò ku citùdi munkaci mwà kwenza aci, nènku ùdi, ùtuuta mukobolo, wèla lubila lukolè ne: “Papa! Maman! Ekeèlekèle! Ekeèlekèle! S'ndi mfuma ku dyela ndundu ku dinaya kwaka! Ne tudi munkaci mwà kwenza *bikampànda*, *bikansanga*, ne *bikankènga's!*” Kadi pèètù biikàle batukine mu cyena-bwalu cinsantu menemene's. Mpindyewu, yèyè mwele ndundu, abi's mbìmpè; mu ndundu wa baseball, aci kaayi ncìmpè. Kadi mmwenze cyà cyanàànà pàdiye ukabwelakana mu bwalu bùdi kabùyi bumutangile pa bìdi bitàngilà mukenji wutùdi twètù twakwila. Mbìmpè yèyè kwindila too ne pàalwà dyende dîbà nenku dîbà adi kaayi yèyè àtwàmbilè cìdiye mwenze mu dinaya dya ndundu wa baseball.

²⁷ Mpindyewu, ncintu ànu cìmwècìmwè aci menemene citùdi tusangana mu mapà leelù ewu. Ki bwà cinyi Nzambi kènàku mwà kufila mapà à Nyumà mapitèpitè búngi kùdi bantu to, kî mbamanye mwà kuàkòntonona to. Ki lutàtù lùdiku leelu ewu ndwòlò alu, cìdi cyènza ne katwikadi naawu mapite atùdi naawu aa to.

²⁸ Ne ncyà bushùwà ne tudi tusangana ditentula búngi cyanàànà dyà mapà à Nyumà. Kadi mèmè ncyèna ngeela meeji ne bìdi *nànkù* mwab'ewu mu wètù èkèleeziyà ewu to. Ndi ne kusàkidila bwà bwalu abu. Ncyèna ngeelaku meeji ne nditentula nànsha kakesè to. Ndi ngiitabuujà ne tudi ne mapà mashùwashùwàlè, kadi tudi ne cyà kumanya mùshindù wà kukòntonona òwò mapà awu.

²⁹ Ne pashìshe paùdi udìtwa mu dyenza dyà cintu kampànda cyà cìmpè. . . Mbyenze ànu bu wèwè munkaci mwà kukwàcila mfùm̀wèbè mudimu kampànda ne wèwè mubange kwenza mudimu wèbè wa kumpàla ne mwikàle ne budiswìlè bwà kwakidila mèyi matùma, dîbà adi mfùm̀wèbè wa mudimu awu's neikalè ne dyeyemena kùdi ne neàtùngùnukè ne kukubàndisha myànzù ne wènza kukupà mwànzù mubàndile misangu yònsò.

³⁰ Mpindyewu, ndi ngeela meeji ne dîbà adi dyàkànyì bwà Branham Tabernacle, dyà kumanya cìdi. . . dyà kwangata mapà àdi Nzambi ùtùpèèsha, mùdi Nzambi mwà kufila kutùdi mene cintu kampànda citàmbe citùdi naaci bunène. Kadi katwèna mwà kutùngùnuka. . . kadi nwènù biikàle numòna muntu udi

misangu yônsò bikèngela ànu kwikala kumwambila ne bikwàbò byônsò. Nènku nùvulukàayi ne: “Nyumà wa baprófetà útu ùkòòkela muprófetà,” mùdì Mifùndu yàmbà. Panùdì numòna muntu mulùme udibì bikèngela ànu nwènù kwikala kulongolola, anyì muntu mukàjì, kadi muntu awu ùpàtuka mu bulongame, kadi pèènù biikàle numwambila Bulelèlà bwà mu Mifùndu, díbà adi bìdì bìleeja ne nyumà udi pambidi pèndè awu kí ngwà kùdì Nzambi to. Bwalu Bible mmwambe ne: “Nyumà wa baprófetà,” anyì, “kwamba kwà ciprófetà,” mbwena kwamba ne, kufila kwà bujaadiki, kuyiisha, kwakula kwà mu myakulu, anyì nì ncinyi cyônsò, bwalu dyakula dyà mu myakulu dyòdì dyandamunyiibwe didi nciprófetà. Pa nàнку cìdì cikookela muprófetà, ne Díyì ki yèyè muprófetà awu. Pa nàнку tudì—tudì tumòna ne nkwikala pambèlu pàà bulongame díbà didì muntu mulùme anyì mukàjì ùtùpika ùya muulu ne ùfila mukenji, nànsha byòbì ne mmuswè kucyènza bishi, díbà dicìdì muiyiishi mu cyambilu adi.

³¹ Mpindyewu ndi nganji kwamba eci bwà Branham Tabernacle, bwà ne bu mùdì ètù—ètù mapà atùdì tusangana aa . . . Ne twètù biine tudì ne bantu bàà maalù mimpè menemene kaaba aka bàdì ne mapà. Mpindyewu, dyônsò dyà ku mapà awu mmudimu wà bwambi wa pabwàwù. Àdi mmapà, ànu mùdì kuyiisha kwikàle dipà, mùdì dyondopa diikàle dipà, mùdì bintu bikwàbò abi biikàle mapà amu, ôwò aa mmapà, mmidimu yà bwambi yà pabwàyi. Ne muntu ne muntu mmulòmbiibwe bwà kwikalaye windila mudimu wèndè wà bwambi sungasunga.

³² Ki bwà cinyi Branham Tabernacle àlombodiibwè mùshindù ewu, ne ciine aci mu ditùkù edi, nangananga mu ditùkù ditùdì babipete bùngì cyaanàna edi (ncyèna muswè kwamba cyòcì eci to, kadi), byà budingibudingì bùngì cyaanàna. Katwèna twètù baswè byà budingibudingì abi to. Muntu nànsha umwe, muntu wa kweyemena nànsha umwe kàtu muswè kwikala ne byà budingibudingì to. Tudì . . . Twètù katùyì . . . katùyì mwà kwikala ne cilelèlà to, katwikadi naaci to nànsha cyà bishi, twindilàayi too ne patwàpetà cilelèlà aci. Mpindyewu, ndi ngiitabuuja ne nwènù—nwènù aba nudi bafwànyine kwitaba aci. Katwèna baswè cintu nànsha cimwè cyà budingibudingì to. Bànà bèètù, katwèna mwà kubangila pa cintu kampànda cyà budingibudingì kadi kuumuka pa buloba ebu to. Bìdì bikèngela bwà twikalè ne cidì cilelèlà, ne cidì cishùwashùwàlè. Twètù katùyì naaci to, twindilàayi too ne patwàcipeta apu, ne díbà adi twàmbè cintu kampànda pa bwalu abu. Nwamònu ànyi?

³³ Mpindyewu, ndi mufwànyine kwamba, bantu balùme ne bakàjì bwònsò bàdì bààkulà mu myakulu, ne bàmba biprófetà, ne bàfila mikenji aba . . . Nenku ndi—ndi mémè ngiitabuuja pàmwè neenù ne mbishùwashùwàlè. Mpindyewu, Bible mmwambe ne: “Nùkenketè bintu byônsò; ne nùkwatè bikolè ku cidì cimpè.” “Bwalu ku mishiku yidì yikükuminà

ne mu myakulu mikwàbò mmûNgààkwilà ne bantu aba ne, ki diikisha ndyòdi edi òmuvwà Mémè mwámbe ne mmùvwàbi bìikèngela bwà bòbò kubwela,” mu Mukàndà wà Yeshààyi amu.

³⁴ Mpindyewu, ndi mufwànyine kwamba eci bwà mu mwaba wa cijila emu bàkwatèmu mudimu ànu kùdi dipà òmwèpelè ku musangu, bwalu cidi citwàluja cyàkàbìdi buludì mu bulongame bwà cìndi nteeta kwamba eci ne: pàdi muntu wàkula, nyumà wa bapròfetà àkookelè mupròfetà. Nudi bumvwe anyi? Mpindyewu, aba bàdi ne mudimu kampànda wà bwambi bwà Mubidi wà Kilisto. . . Ne mpindyewu udibi byàmbiibwa ewu, mpindyewu byènjiiwbè. Aba bàdi ne mudimu kampànda wà bwambi bwà Mubidi wà Kilistò bìikalè bìndila mudimu wàbò wà bwambi, bwalu mmudimu wà bwambi wà kùdi Kilistò bwà èkèleeziyà. Kadi kanwèna mwà kukwàta mudimu bwònsò musangu ùmwè to, bìdi bìkèngela cìikalè muntu umwèpelè ku musangu.

³⁵ Branham Tabernacle neikalè mùshindù ewu. Aba bàdi bààkulà mu myakulu, ne aba bàdi bàndamunà myakulu, ne aba bàdi ne cipròfetà cìdi cìkèngelà kufila kùdi èkèleeziyà abu, balwe pàa nkààyabò kumpàla kwa dìbà mu. . . kumpàla kwà disangisha kubangadi, bàdisangishile mu cibambalu cikaadi cimana kulongolola, ne bindilè mudimu wa bwambi wà Mukalenge.

³⁶ Ànu mùdibi bìkèngela bwà mpaasàtà yèyè mwine kwenzaye kumpàla kwà kubwelayè mu mwaba wùdi batèeleji; ùdi ne cyà kwangata Bible, kulonga mu cinyàànyà cyà mu cibambalu cyèndè amu, mu Nyumà, bwà kwikalaye mulaaba bwà kulwaye kumpàla kwà batèeleji bwà kuyiishayè. Kàyi mwenze nàнку to, neikalè mwà kupeta cibwejàkàji pààlwàye muntwamu. (Mulùme yònsò ne mukàji yònsò, udi ne dipà dyà Nyumà awu, àlwe kumpàla kwà Mukalenge.) Ne bu mùdibi ne mpaasàtà ùdi ne mudimu wà bwambi wà nkààyèndè, yèyè mmupròfetà; mwaku wa mu Anglais ewu, *muyiishi*, wùdi wumvwija ne “mupròfetà,” mbwena kwamba ne mwambi wa patòoke wa Dìyi.

³⁷ Aba bàdi ne midimu yà bwambi yìdi yikèngelà kwikalayi miswikàkaja kùdi muntu mukwàbò abu, bu mùdi wà kwakula kwà mu myakulu ne mukwàbò wà kwandamuna awu, bàdi bindila *pàmwè* mudimu wàbù wà bwambi awu. Kabeena bòbò mwà kushààla mu bìrò byà pàa nkààyààbo wàkula mu myakulu kadi pashiishe kulwa kwambila mukwèndè cidiye mwambe aci to, bwalu aci yèyè's mmufwànyine kwikala ne byònsò bìbìdi dyakula dyà mu myakulu ne dyandamuna. Nwamònu anyi? Mpindyewu, yèyè naabi, s'mbilenga be, tudi baswè kucipeta mùshindù awu. Ne tudi baswè bwà èkèleeziyà àtuucilè dyàkalenga ku mapà àdi mu èkèleeziyà wetù aa. Nzambì ngudi mutùtùminewù, ne bìdi. . . tudi baswè bwà èkèleeziyà wetù àtuucilè dyàkalenga ku mapà à Nyumà aa. Pa nàнку muntu udi wakula mu myakulu awu, ne ewu udi wandamuna, ne ewu udi ufila bipròfetà, bàdisangè kumpàla mene kwà—kwà èkèleeziyà

kàyi mwanji kudisangisha to. Bàdisangishilè mu cibambalu kampànda pàà nkààyaabò, bindile mudimu wà bwambi wà Mukalenge bwà èkèleeziyà. Mbyumvwike anyi?

³⁸ Nènku dībà adi, mùshindù ewu, bu Mwanèètù Neville, twámbe ne, èè, mpindyewu anji ndekelaayi, numfwileku luse, ndekeelaayi ngámbe núnku: Mwanèètù Collins yéyè wákula mu myakulu ne Mwanèètù Hickerson ùfila dyandamuna, dībà adi bàdi ne mudimu wà bwambi *wa benzela pámwè* bwà èkèleeziyà. Mpindyewu, awu kî mmudimu wà bwambi wà Mwanèètù Neville to; awu mmudimu wà bwambi wènù *nwènu* bwà èkèleeziyà. Ndi mfila eci bu cileejilu. Dībà adi bìvwa bikèngela bwà nwènu bānà bèètù nwikalèku basànkishiibwe bwà kuteeka mudimu wènù wà bwambi awu pa kaaba kàawù mu nzùbu wa Nzambi ànu mùdi mpaasàtà musànkishiibwe bwà kutèeka wèndè pèndè amu, bwalu bìdi mbyà musinga wàbùngì bu nwènu mwà kucyènza. Kadi kanwèna mwà kucyènza muntu pàà nkààyèndè mu cibambalu cyèndè yéyè mwine to, panwikalà *wèwè* wakula ne *wèwè* wandamuna, bìdi bikèngela bwà nwènu kudisanga pámwè. Mpindyewu, nulwayi kudisangishila mu èkèleeziyà, ku luseke mu cibambalu cyà pàà nkààyeenù, bwalu nudi ne mudimu wa bwambi wà pàà nkààyeenù. Kî mmudimu wa nwenza bantu bitwilàngàne to, ngwà kwambulwisha naawù èkèleeziyà. Nwamònu anyi? Ncintu kampànda bwà kwambulwisha èkèleeziyà, kàdi kî ngwà wènjiiibwa mu disangisha dyà bantu bònsò to, ànu mùshindù wùngiikalà mèmè mwà kunwambila ne bìdi bikèngela bwà kwenjiiibwawu awu. Nwamònu anyi? Dībà adi, cyònsò cidi Mwanèètù Collins wamba, ne cidi Mwanèètù Hickerson ùfila mu dyandamuna aci, mbu cileejilu's, dībà adi Mwanèètù *Kampànda* acifùndè, mùdici amu. Ne pashìshe pìikalàci cìlwa . . .

³⁹ Mpindyewu, twètù bwònsò tudi bamanyè ne Mukalenge ùlwalwa, bwà aci tudi bacimanye. Kadi bu Mwanèètù Neville mwà kwikala ùjuuka dilòlò dyònsò ànu ne: “Monaayi, Mukalenge ùlwalwa! Monaayi, Mukalenge ùlwalwa!” aci ncifwànyine kwikala ànu cìmpè, nwamònu's. Kadi aci ùdi ùcyamba (mmpaasàtà) ku cyambilu, bwalu yéyè ngudi ne Dìyi bwà cyòci aci. Nènku yéyè pìikalàye mpaasàtà, mupròfetà bwà èkèleeziyà. . . anyi mpaasàtà's we, eyowa, bùdiye naabu mbwà kulonga Dìyi dyà Mukalenge ne kunwambila cidi cifùndiibwe mu Dìyi dyà Mukalenge pà bìdi bitàngilà dilwa dyà Mukalenge, nenku nudi nudimwijiibwa ku cyòci aci. Mudimu wà bwambi wà cyanààna (bwà èkèleeziyà) wùdiye kàyi mufwànyine kwikala muswikàkane naawu to, ndyakula dyà mu myakulu, dyandamuna dyà myakulu (cidi ciikàle cipròfetà), anyi mupròfetà mwikàle wákula, aci ncintu kampànda cidi kaciyi cifùnda mu Dìyi to. Cidi cifùnda mu Dìyi, bìdi bikèngela bwà *yéyè* acitwale; kadi cidi kaciyi cifùnda mu Dìyi to, aci ncidi cikèngelà bwà *wèwè* kumwambila. Bu mùdi, cileejilu: “Ambila

Mwanètù Wheeler, EMU MMÙDÌ MUKALENGE WÀMBA: ‘Màalabà, mu ciina cyende cya lusenga amu, kàyikù to, bwalu nekwikalè màshinyi a cisemuna ikalà mwà kubùnguluka,’” anyi cintu kampànda cyà mùshindù awu, ne bìdi bikèngela cyènzekè. Nènku wèwè wacyámbi ne yéyè wácyándámùnù, ne pashìishe nùcitéeke pa cyambilu paanyimà pàà mudimu wènù wà bwambi awu mumane kujika, díbà adi, mu dilòlò adi, paanyimà pàà èkèleeziyà (musambu) mubange kwimba misambu ne bikwàbò; mudimu wènù wà bwambi wòwò mumane kujika díbà adi, bàlwe ne cidi cifiðiibwe mu ciprófeta aci.

⁴⁰ Ne ncyèna ngeela meeji ne tudi ne . . . Anyi panwikalà naaci, nùcyèlè mwómò amu. Pàdi bantu aba bàdisangisha, aba bàdi ne lungenyi bǎnji kulwa dyambedi. Bwalu, nudi numòna’s, muntu yéyè mwakùle mu myakulu ne mufile dyandamuna bilondeshile Mifundu, aci kacyèna mwà kwitabuujiibwa pàdici kacyi cipete bujaadiki bwà bantu bàbidi anyi bàsàtù to, bantèmu bakwàbò bàbidi anyi bàsàtù, nwamònu’s, bikèngela bacifidile bujaadiki, bwà ne bàdi biitabuuja ne n’Dìyi dyà Mukalenge. Bwalu. . . Ne misangu mikwàbò wà midimu yà bwambi yà mu bukesè eyi, ànu mùdibi mu mudimu mukwàbò wà bwambi kanà wònsò ewu, nudi nusanganamu nyumà yà mashimi; nwamònu’s, yidi yìbuuka yikabwelamu. Kadi twètù katwènaku baswè byà nàнку nànsha. To. Tudi baswè bwà yòyi midimu yà bwambi eyi yikalè midilongolole bwà kuleejiibwayi patòoke piikalàbi bikèngela bwà kuyitandulabo, bwalu cintu kanà cyònsò cyà kùdi Nzambi cidi mwà. . . kwena ulubakana bwà ne kabàlù kucitandula to, ndi muswè kwamba ne, neci—necitambè diteeta bukolè, piikalàci cyà kùdi Nzambi.

⁴¹ Ànu mùdi mpaasàtà, muntu yéyè mumwele kadyòmbò pa bìdi bitàngilà Dìyi, kabyèna bikèngela bwà kutwàye cimpingà pa bwalu abu to, yéyè’s mmumanye ànu menemene cidiye wàmba aci ne: “Vwilabi apa.” Nwamònu anyi? Nènku mbyà mwomùmwe ànu ne midimu mikwàbò yà bwambi eyi, bikèngela biikàle mùshindù wùmweùmwe awu.

⁴² Mpindyewu, muntu yéyè—yéyè wàkula mu myakulu ne ùfila mukenji. . . Mpindyewu, bàmwe bantu bàtu bààkulà mu myakulu pàdibo ànu “bàdikolesha bòbò biine,” mùdi Bible mwàmbe, bàdi ànu bàdicyonkomoja cyanàànà. Bàdi bààkula mu myakulu, bàdi bàdyùmvwa nàнку. Ne bàdi bààkula mu myakulu *cyà bushùwà*, bàdi bulelèlè bààkula mu myakulu, ne Nyumà ngudi ucyènza awu. Kadi byòbi ne nkusòmba mu bateeleji mwàmwa, mwikàle wàkula mu myakulu, ùdikolesha ànu yéyè mwine, díbà adi kí ncintu cidi ne dikwàcisha nànsha dikesè kùdi èkèleeziyà to; muntu mulùme awu ùdi ùdikolesha yéyè mwine, anyi mukàji, anyi ní nganyi yònsò udi munkaci mwà kucyènza awu. Nwamònu anyi?

⁴³ Kwakula mu myakulu ndipà dyà kùdi Nzambi bwà dikoleshangana, mùdi Pòlò wàmba mu Mifundu, bwà ne mbwà

kukolesha èkèleeziyà. Pa nàнку bivwa bikèngela kwikalaci mukenji wà buludi wà kùdi Nzambi mutùmina èkèleeziyà, pambèlu pàà bìdi bifùnda mu Bible emu. Nwamònu anyi? Ncintu kampànda cidì. . .

44 Bu wèwè mwà kunkonka ne: “Mwanètù Branham, ndi ne cyà kubàtijiibwa bìshi?” S’ndi mufwànyine kukwambila ne lùkàsà lwònsò. Kabyèna bikèngela bwà wèwè kwakula mu myakulu bwà wèwè kungambila aci to, ncifùnda mwab’ewu mene mu Bible bwà cyà dyenza pa bwalu abu. Nwamònu anyi? Kabyèna bikèngela bwà mèmè ku-. . . kabyèna bikèngela bwà wèwè kwela nkonko pa bwalu abu ne kwambila muntu bwà akule mu myakulu bwà kukwambilaye to. Wamònu’s, aci ncimana kufùnda.

45 Kadi wèwè mwambe ne: “Mwanètù Branham, cìndi ne cya kwenza ncinyi? Ndi ne dipàngadika mwab’ewu didi dikèngelà bwà mèmè kwangata bwà ne bivwa bikèngela bwà mèmè kusungula ewu èkèleeziyà anyi kuya ku mukwàbò èkèleeziyà,” anyi cintu cyà mùshindù awu. Anyi ne: “Bivwa bikèngela bwà mèmè kwenza *cikampànda*, *cikansanga* anyi?” Mpindyewu, bivwa bikèngela bwà aci kufùminaci kùdi Nzambi. Nwamònu’s, bikèngela bwà Nzambi Yèyè àtwàmbilè aci. Kadi aci bikèngela cifùminè ku mudimu mukwàbò wà bwambi, bwalu Dìyi kadyèna dyàmba ne: “Orman Neville ùmukè mu Branham Tabernacle àye ku Fort Wayne Gospel Tabernacle to.” Nwamònu’s, kî mbàmbe aci mu Dìyi emu to, nwamònu’s, pa nanku ki mudimu wà mapà aa ngwòwò awu.

46 Byènze mùdi muntu ulwa apa wàmba ne: “Wèwè udi witabuuja dyondopa dyà kùdi Nzambi anyi?” Aci’s ncitùtù tuyiisha, tutu tuciitabuuja, tutu twitabuuja dilaabangana, dyà maanyì.

47 Kadi ki muntu kampànda ewu wàmba mùdiye “Kàyi mwà kufika ku dituuta dyà dyàkalenga, bwalu bùdi cinyi?” Dìbà adi bìdi bikèngela Nzambi, ku dyakula dyà mu myakulu, ku dyandamuna, ku cipròfetà, anyi mùshindù kampànda wà dibwela mu nsòmbe wà muntu awu ne kujoomona cintu cidìye mwenze aci, ne kumwambilaci. Awu mmudimu wà bwambi wùdi kawùyi wa mpaasàtà to, ngwà mapà à midimu ya bwambi aa, kadi kabyèna bikèngela bwà kwenjiibwayi mu mwaba wùdi bateeleji awu to. Nwamònu anyi?

48 Mpindyewu, kacya kabyàkakèngèlakù musangu nànsha ùmwè bwà Pòlò kwambilaye bóbò—kwambilaye bóbò beena èkèleeziyà wa Efèsò abu kantu nànsha kàmwe pa ciine aci to, bóbò bàvwa mu bulongame, èkèleeziyà wa Loomo, anyi nànsha umwe wà ku mikwàbò èkèleeziyà ayi; anu èkèleeziyà wa Kolintò, ne bóbò kabàvwakù mwà kuditèeka bóbò biine. . . Mpindyewu, Pòlò ùvwa witabuuja dyakula dyà mu myakulu. Ùvwa ne dyakula dyà mu myakulu mu èkèleeziyà wa Efèsò, ànu dimwedimwe

divwàye naadi mu èkèleeziyà wa Kolintò adi, nwamònu's, kadi ùvwa mwà kwambila beena Efèsò maalu manène matàmbe byà ànu dyakula dyà mu myakulu cyanààna, ne dyandamuna dyà myakulu abi.

⁴⁹ Mpindyewu, dībà adi muntu yéyè mufunde mukenji mufila ku dyakula dyà mu myakulu anyi mufila mu cipròfetà, ne muwùtèèke pà cyambilu, wùdi ne cyà kubadiibwa kùdi mpaasàtà kumpàla kwà disangisha kubangadi, wa “EMU MMÜDÌ MUKALENGE WAMBÀ” mwà kùdi bantu biine bàdi baakùle ne bandàmùne aba. Nènku aci cyòci cyenzèke ànu menemene mùdi dyandamuna dyambe amu, tudi twela byanza muulu ne twela Nzambi twasàkidila bwà Nyumà Wendè munkaci mwètù. Cyòci kaciyi cyenzèke to, dībà adi kanùcyènjiku kàbìdì to too ne piikalà nyumà mubi awu muumuke munkaci mwènù. Nzambi kàtu ùshima to, Yéyè ùtu misangu yònsò ànu bulelèlà.

⁵⁰ Dībà adi, nudi numòna's, nukàadi mpindyewu bakolè mu mùshindù mukùmbàne bwà nwènù kwikala nwenzakù maalu bu bantu bakùlumpè, kabìyi bu bânà batekète to (“guu, guu, guu”), bikèngela wikalèku ne cintu kampànda cyùdi wamba ciikalè ne cìdici cyùmvwija.

⁵¹ Èkèleeziyà mpindyewu, pàkaadiye wènda ùshàalakù mu bulongame apa, àfikeku ku bulongame *ebu*. Muntu yéyè mwambe diyì dyà cipròfetà. . . Muntu yéyè mulweè munkaci mwènù, kàyi mulongeshiibwe to, kàdi nwènù nwakula mu myakulu, wèwè's newikalè musenji kùdiye yéyè, kì mmumanye cyùdi wamba aci to. Nwamònu anyi? Ne bushùwà leelù wa Ndayà ewu udikù cibwejàkàji búngicì pa ciine aci, s'cidi cìfila cilendwishi. Kadi umwe àkule mu myakulu, ne mukwàbò àndàmùnè ne àfile mukenji, ne bàwùbadilè ku cyambilu eku, bwà ciikalà mwà kwenzeka aci, ne pashiishe cyènzèkè, nudi numòna cidi cyènzèkà. Nubàmbilè ne: “Màalabà pa dībà *kampànda*,” anyi “lumingu lùlwalwà elu pa dībà *kampànda*, nekwenzèkè cintu *kampànda*,” dībà adi mwena bupidya ùdi musòmbè mwaba awu awu ikalè mutèèleje cyòci aci ne àmonè ne neidyanjila kwamba kumpàla kwà kwenzekaci. Dībà adi yéyè neàmanyè ne nyumà udi munkaci mwènù nnyumà kaayi, neciikalè Nyumà wa Nzambi. Ki cyàkambà Pòlò ncyòci aci ne: “Dībà adi bu muntu mwà kwamba cipròfetà ne kusokolola maalu masòkòme, disangisha dijimà kadyàkudyèlakù panshi, anyi, mwena bupidya, wamba ne: ‘Nzambi ùdi munkaci mwènù anyi?’ Nwamònu anyi? Bwalu kacyèna mwà kwikala. . .

⁵² Kadi mpindyewu katwèna baswè. . . “Pancìvwà mwànà,” mùdi Pòlò mwàmbe, “mvwa ngèza maalu bu mwànà,” mwàkambilàye beena Kolintò mwaba awu, “mvwà ngàakula bu mwànà.” Úvwa ne meeji à bwànà. “Kàdi pàngaàlu muntu mukùlumpè, ngatèèki ku luseke maalu à bwànà.”

⁵³ Mpindyewu, ndi nzwambila nwènu bwònsò, nwamònu's. Mpindyewu, kùkaadi ndambù wa bidimu, nuwua bàna ne mapà aa, nunaya nwàtwa kumpàla nwàtwa paanyimà. Kadi nudi bapicile mu kàlaasà kà matùkù àbùngì mpindyewu, dîbà dyàkànyì dyà nwènu kwikala bantu bakùlumpè, kanùyì mwà kukwàta naawu mudimu ànu bwà kunàya naawu to. Mapà aa, mmansantu, ngàà kùdì Nzambi, nènku kanwèna nunàya naawu to. Tushiilàayi Nzambi kaaba àkwatè naawù mudimu. Ki cidì mudimu wènu wà bwambi muswè kwikala ncyòci aci. Mùshindù wà kutèeka Branham Tabernacle mu mudimu ngwòwò awu. Ne—ne cyòci eci piikalàbo mwà kucyèla mpatà, nànsha dîbà kaayi, mukàbà wà mèyi ewu wùshaalè bu ntèmù wa ne mùshindù wà kucyèza mu Branham Tabernacle ngwòwò awu.

⁵⁴ Bu kwòkù mwà kubwela mwenyi, bwalu nutu naabò dîbà dyònsò, bu mùdibi ne ewu tabernacle kàtu wa usungulujangana bilondeshile màngumba to, kùtu kùbwela bantu bàtù kabàyi bapetè dilongesha edi bilenga to, kabèna naadi to, kî mbamanye ciine cyà nsongo to. Ne wabò mpaasàtà mwine, bòbò nebatupike bàya muulu ne bàkòsoloja mukenji wèndè, ne banyangakaja dibiiikila dyà ku cyoshelu, ne bàakula mu myakulu ne bikwàbò byònsò mùshindù awu. Nwènu nudi bantu bàdì balongeshiibwe bìmpè kutàmba abi. Nwamònu anyi? Nènku paanyimà pàa disangisha, yèyè mupàtuke mu njila wa bulongame, dîbà adi mmudimu wà mulami bwà kuya kùdiye. Kabikèngedi bwà mpaasàtà wènu kucyènzayè to ambà ànu bikafike mu mùshindù wà kakùyì mulami nànsha umwe mwaba ewu, kàdì mulami ngudi ne cyà kutàngila bwalu abu. Nwamònu anyi?

⁵⁵ Mpindyewu, paanyimà pàa disangisha. . . Muntu awu yèyè ànu ùjuuka ne ùfila mukenji, mpaasàtà, piikalàye muswè kwanji kwimana ndambù bwà kushiisha kutùngùnuka, mbilenga be, nwamònu's, aci nciàngile mpaasàtà. Kadi pashiishe dyàkàmwè, kumpàla kwà muntu awu kupàtùkaye mu nzùbu, mulami àmwangàte àye nendè ku luseke ne ayiikilangane nendè pa bwalu abu.

Kadi yèyè mucyèlè mpatà, nda nendè ku mukàbà wà mèyi ewu wàmbè ne: “Èci ncidì mwepiskopo, anyi, mutàngidi wa èkèleeziyà. . .” (Kî cidì *mwepiskopo*, ne. . . mutàngidi kanà yònsò ewu, nwamònu's, ki mùdibo bacibiikila mu Bible ne, “bwepiskopo,” nwamònu's, pa nànkù ki yèyè awu udi mukùlù—mutàngidi wa èkèleeziyà.) “nènku. . . mèyi matùma ki òwò aa ne mùshindù wùdì èkèleeziyà wetù ùbyènza. Mpindyewu, tudi banange bwà wèwè kwikala kulwa kufila mukenji webè. Kadi wèwè ne mukenji wa kùdì Mukalenge kadi mwikàle. . . wùdì mwà kufidiibwa, wèwè ùbandè kuneeku ùwùtèèkè pa cyambilu cyètù apa, nènku mwambi wetù neàwùbadilè disangisha, mukenji bwà disangisha edi.”

Kàdì kaciyèna ne cyà kwikala ànu dyambulula dyà Mifundu to, ne bintu byà mùshindù awu. Cidi ne cyà kwikala mukenji

wa buludi wa bàmabila bantu, wa cintu kampànda cìdì cyàmba kwenzeka, anyì cintu kampànda civwà cikèngela bwà bôbo kwenza. Mbyumvwike anyì? Eyo.

222. Mpindyewu, kùdikù mùshindù kampànda mwîmpè wa kulama bulongame mu èkèleeziyà ùdiku mutàmbe kwikala kuvulwija bantu ku—ku dyambulula dyà balami bilondeshile cyòci aci anyì?

To, aci, ngǎfumu ku dicyumvwija. Alu ndukonko lwisâtù.

⁵⁶ Nwênù balami, wênù mudimu ngwà kulama bulongame mu èkèleeziyà, ne musangeelu ne ngiikādilù wa bulunda. Ne dîbà adi ki cinùdì ne cyà kwenza, pàdì muntu ùpâtuka mu bulongame mu èkèleeziyà, anyì ùbwela mwaba ewu mwenzè bu muntu mukwàcike maala, anyì muntu kampànda ùbwela.

⁵⁷ Byenze bu mwàkaasàbo mwambi awu cingoma pa cibumba cyà ku cyambilu dilòòlò adi kuntu kwàka. S’nuvwa bumvwe bwalu abu, muntu ùvwa mukwàcike maala awu ubwelamu ne cingoma cyà tundimba cyà mbungu yibidì. Ùvwa wèla mbila mikolè ùbiikila mukàjèndè, ne—ne mwikàle ùkeba mukàjèndè, kadi kuyaye buludi mutangile kùdì mpaasàtà. Ki mpaasàtà kumuleejayè mukàjèndè musòmbe mwaba awu, kadi yèyè ùvwa muswè kumwashila cingoma ànu mu èkèleeziyà mene amu, ki mpaasàtà kubangayè kwakula nendè. Kàdì pamutù pàà—pamutù pàà. . . Muntu awu ne—ne cingoma kadi kukùdimukayè e kwashilaye mpaasàtà ànu ku cyambilu aku, ne pashiishe kwasaye mukàjèndè, ne pashiishe kudyàsaye yèyè mwine.

⁵⁸ Mpindyewu, bu ne kùvwakù musumbà wà balami mwaba awu pààkabwelà muntu awu ku ciibi aku ne cingoma aci apu, nùnkù’s bamwele kàpa, bamunyenge cingoma aci mu cyanza cyèndè amu. Nwamònu anyì? Nwamònu’s, abu’s ki—abu’s ki balami bakwàcì bàà mudimu ne bulongame. Nènku mpindyewu, bintu ebi nyewu biye mu mushindu wùyaayàbi mpindyewu ewu, s’nudi bafwànyine kutekemena ànu cintu kanà cyònsò. Kadi, vulukaayi ne, balami mbampùlushì bàà Nzambi mu nzùbu wa Nzambi, cìdì muntu mukwàbò kanà yònsò wela meeji nànsha ciikàle cinyi. Misangu mikwàbò mpùlushì kàtu muswè kujuuka kuya bwà kakwàta muntu kampànda to, pàmwàpa umwe wa ku balunda bèndè, kadi yèyè mmudicipe bwà mudimu awu, bùdiye naabu mbwà kucyènza nànsha bishi. Awu ngwèndè mudimu wùdiye wènzela cimenga cyèndè. Nwamònu anyì?

⁵⁹ Ki mudimu wà mulami wùdiye wènzela èkèleeziyà ngwòwò awu. Nenku pàkaadi muntu ùtùpika wìmana ùbanga bwà kwimanyika mpaasàtà, anyì cintu cikwàbò cyà mùshindù awu, mpaasàtà pèndè munkaci mwà kuyiisha, balami bàdì ne cyà kuya kùdì bantu abu, bàbidì anyì bàsàtù, bààmba ne: “Tudi mwà kuyiikilaku neebè anyì, mwanèètù wa balùme?” Nwamònu anyì? Kupâtuka nendè pambèlu pàà èkèleeziyà, kubwela nendè mu birò, *emu* nùnkù anyì mu birò bikwàbò kampànda, nènku

kuyiikila nendè pa bwalu abu, kwamba ne: “Kabyèna bikèngela bwà wèwè kwimanyikangana to.” Nudi bamanye’s, ncibawu cinènè cyà—cyà bàkukòsela ku tubàdi nànsha bishi bwà wèwè mwimaâyike disangisha. Nwamònu anyi? Kadi bamwè bantu, bu mùdi muntu mwenzavi anyi cintu kampànda, wa ùlwa munkaci mwènù, nudi bamanye’s, ne—ne mukoleshi wa maalu kampànda wa mu maalu a ntëndeleelu, wa—wa ùbanga kwenza bintu byà lukutukutu, dîbà adi balami. . . Ne piikalà—ne piikalà balami kabàyi bamweka bu bàdi ne bukolè bwà kucifùdisha, dîbà adi kasùmbù kàà balubuludi anyi muntu kampànda mukwàbò kanà yònsò mu èkèleeziyà ùdi mwà kujuuka bwà kwambulwisha muntu bu nànkù. Aci nudi bamanye.

⁶⁰ Nenu—nenu mpindyewu ngànji ngeelululebi lukonko alu mwaba ewu.

Kùdikù mùshindù kampànda mwîmpè wa kulama bulongame mu èkèleeziyà ùdiku mutàmbe divulwija dyà bantu ku dyambulula dyà balami, mpindyewu, ku musangu ne ku musangu anyi?

⁶¹ Mpindyewu ndi ngeela meeji ne—ne mpaasàtà, ku musangu ne ku musangu. . . Anyi kwela mukàbà wà mèyi ewu, kwenza bwà kushààlawù bu ntèmù. Balami mbampùlushi, ne díyi dyàbò mmukenji ne díyi ditùma. Nwamònu anyi? Ne bôbò bàdi ne bukòòkeshi bwà kùdi èkèleeziyà ne nànsha mene kùdi mikenji yà ditùnga bwà kuvwija nzùbu wa Nzambi awu mwaba mujaalame. Nenu muntu nànsha bamwamba ne nganyi mudidinge ànu mubengangane ne mulami ku mèyi mùshindù awu, ngwà bakòsela bidimu kuumukila ku—ku bìbidì too ne ku dikumi byà bùlòko bwà cinsangànsàngà. Wèwè mumwambile bwà kuya kadi yèyè kàyi uya to, anyi cintu kampànda cyà mùshindù awu, muntu kampànda wà nsòmbelu wa cimvundù, kèna ànu mumanye cidìye wènza aci bwà. . . Ùdi ùdizanjika yèyè mwine, anyi mukùmbànyine yèyè mwine manyooka a bibawu byà mishindù yònsò, cintu kanà cyònsò.

⁶² Ne pashiáshe pàkaadibi bikafika ku ne muntu kampànda. . . Mpindyewu, bu mùdi. . . Nenu muntu yèyè ùkàtamuka ùbanga nsòmbelu wa cimvundu. . . Pàmwàpa ànu kwakula kwà mu myakulu cyanàànà eku anyi cintu kampànda, mèmè ncyèna mufwànyine kuya ne aci kule to. Nwamònu’s, numulekelaayi àye, bwalu pàmwàpa ní mmwenyi. Bôbò biikàle beetu twètù, dîbà adi nulekele anu, diloolo dyàlondà, nwènù balami nwangate anu mukaba wa mèyi ewu, nwàmbè ne: “Mpindyewu, netwélè mukàbà wa mèyi matuma à èkèleeziyà kumpàla kwà twètù kubanga disangisha, ndi muswè bwà bantu bònsò bàwùmwè.” Nenu nwènù bampaasàtà ne nwènù bònsò nudi mwà kukwacishangana mu mudimu mùshindù awu.

223. Mpindyewu, Mwanèètù Branham, kadi bishi bwà kàlaasà kàà Dyàlumingu? Mwanèètù Branham, pa bidì bitàngilà

kàlaasà kàà Dyàlumingu (eyo), bivwa bikèngela bwà kwikalaku kumpala kwà diyiiisha anyi?

⁶³ Eyowa, ki mùshindù wutùtù tukènza misangu yònsò ngwòwò awu. Ikàlaayi nwenza kàlaasà kàà Dyàlumingu kumpala kwà diyiiisha. Nenku aci cidi cipèeshakù bânà batekete bàtù bàbwelà mu kàlaasà kàà Dyàlumingu mùshindù, bwà kutangalajabò tùlaasà twàbò atu. Nènku bóbò—nènku bóbò baswè. . . nènku bânà batekete kabàtu babyumvwa to, ne byòbì bikèngela bwà kushàalabò basòmbe mutanci wònsò wà diyiiisha awu ne pashìishe kubwelabò mu kàlaasà kàà Dyàlumingu, bânà batekete's bàdi bàcyòka. Kàlaasà kàà Dyàlumingu kiikalè kènzeka kumpala, ikalaayi ne dībà dimana kukòsa, ànu pa dībà kampànda dikòsa dīdī kàlaasà kàà Dyàlumingu kàbwela. Mulombodi wa kàlaasà kàà Dyàlumingu ngudi ne cyà kutàngila bwalu abu, bwà ne kàlaasà kàà Dyàlumingu aka kàbwelè pa dībà kampànda, dībà dikòsa. Ne kàdi kàtangalaka pa dībà kampànda. Kàlaasà kàà Dyàlumingu kajimà, ikalaayi bakòse cikondo kampànda bwà cyòcì aci, ne pashìishe kàtangalakè.

224. Bivwa bikèngela bwà mulongeshi wa kàlaasà kàà bakùlumpè kwikalaye muntu kampànda mukwàbò udi kàyi mpaasàtà anyi?

⁶⁴ Piikalàbi ne ki munùdì bumvwàngàne nànkù's. Mpaasàtà yèyè muswè kulongesha kàlaasà kàà Dyàlumingu ne pashìishe kulwa kuyiisha diyiiisha paanyimà, abi mbilenga ne bĩmpè be piikalàye muswè kubàmbàkaja midimu yibìdì ayi. Kadi yèyè kàyi muswè to, dībà adi ikalaayi ne mulongeshi wenù wà kàlaasà kàà Dyàlumingu kàà bakùlumpè, nwamònu's, bwà kàlaasà kèènù kàà bakùlumpè. Nènku dībà adi mpaasàtà yèyè—yèyè ne muntu kampànda mukwàbò mu meeji, ne mwine muntu awu muswè kucyènza, ikalaayi badikòsele nwènù biine tusunsa makumi àsàtù, anyi búngì bwònsò bunwikalà mwà kukòsela kàlaasà kèènù kàà Dyàlumingu abu, tusunsa makumi àsàtù anyi makumi àsàtù ne tutaanu, anyi makumi ànaayi, cyònsò ciikalàku aci.

⁶⁵ Nènku bivwa bikèngela kwikalakù ngonga mutèèka kaaba aka. Ne pàdì ànu ngonga awu wèdiibwa, mbwena kwamba ne. . . anyi ngonga wa èkèleeziyà, pàdiye wèdiibwa pambèlu, ki ditangalaja dyà kàlaasà kàà Dyàlumingu ndyòdì adi. Nènku pàdì ànu ngonga awu ùdila, mbwena kwamba ne byònsò bibwelè mu bulongame ànu mwaba awu mene.

⁶⁶ Kwikalè cikondo bule kampànda dībà adi bwà musambu ùmwèpelè anyi yibìdì, cyònsò cinwikalà mwà kwimba aci. Kì ndībà dipitèpitè búngì to, nenücyokeshe bantu pa kubalama ntàntà mupitèpitè bule, nwamònu's. Nènku elàayi ànu ngonga cyanàànà, nwĩmbè musambu ne cyònsò cinwikalà mwà kwenza aci, ne pashìishe nùtumè tùlaasà twènù mu myaba yàtù. Nènku dyàkamwe pàdì ànu cikondo aci cikumbana, twàmbè

ne neciikalè pa—pa díbà dikumi jaajaaja, anyi dikumi ne tusunsa makumi àsàtù, anyi dikumi ne tusunsa dikumi ne tùtaanu, cyònsò cidìku aci, bélé ngonga awu ne mulongeshi yònsò ùdi utangalaja kàlaasà kèndè, ùlwa mu batèèleji emu. Nènku díbà adi. . . Nènku nùfilè mulubù, mulubù wa kàlaasà kàà Dyàlumingu, ne pashiishe nùtangalajè cintu cyònsò aci, ne bònsò bàdi baswè kushààla bwà diyiisha bàlondelè bóbò. Nwamònu's, díbà adi bìdi mu bulongame.

Ndukonko anyi? **Mbúngì kaay-. . .** [Mwanèètù wa balùme kampànda ùdi wàmba ne: **“Nènku díbà adi's tudi ne tùlaasà tutàpululà's, mu ngaakwilù mukwàbò?”**—Muf.]

⁶⁷ Kaa, èyowà's, bìvwa bikèngela bwà nwènù kwikalà naatù nàнку. Mwàna wa—wa bidimu bisàtù kèna mwà kuumvwa bìdi wa bidimu dikumi ne bìnaayi mufwànyine kuumvwa to. Ngeela meeji ne ndi ne lukonko alu kumpàla eku ndambù.

225. Bivwa bikèngela kwikalakù tulaasà búngì kaayi?

⁶⁸ Bivwa bikèngela bwà nwènù kutèeka tulaasà twènù mu. . . Bu mùdi kàlaasà kàà twàna tukesè twà menemene tùdi tükèba bwà kwikalakù ne bimfwànyì, aci's ndutàtu lukolè be bwà mwàna wa balùme anyi wa bakàji wa bidimu dikumi ne bìnaayi. Nwamònu anyi? Bivwa bikèngela bwà nwènù kwikalakù ne muntu kampànda bwà kwangatayè yèyè kàlaasà aku bwà bàna bàà bakesè bàà mu mabòko abu, maamù kampànda mukùlumpè anyi kampànda udi mumanye mwà kubàbèja. Tukwàbò tulaasà, ngeela meeji, bìvwa bikèngela kwikalatù ne muntu kampànda mutàmbe kukumbanyina bwà kutwàla Díyì. Nwamònu anyi? Nènku bivwa bikèngela bwà kwikalakù tulaasà. Twánjibi kwamba mpindyewu ne, nkufwànyine kwikalà kàlaasà bu kàà kuumukila ku. . . Tulaasà túsàtù bwa twòtò tukesè.

⁶⁹ Bivwa bikèngela bwà kwikalaku kàlaasà kàà bàna bakesè menemene, bìvwa bikèngela bwà kwikalamu bàà bidimu byà byùmukila ku bitaanu nàнку. Nènku bakwàbò bwònsò bàà mwìnshì mwà bidimu abi bìvwa bikèngela kwikalabò babàlamè kùdi baamamwàbò, ne kwikalabò baya naabo mu mwaba wa dibààmushila mabèèle pùikalàbi bikèngela nàнку munda mwà díbà dyà—dyà diyiisha adi, bóbò babangè mukòdi. Ki katèèkèlè kàà mwaba wa dibààmushila mabèèle muntwamu nkòkò aku.

⁷⁰ Nènku ndi ngeela meeji ne bìvwa bikèngela bwà—bwà tulaasà atu kwikalatù tulongolola bwà bàna bakesè bu mùdi bàà kuumukila ku bidimu byà bìipacila ku bitaanu anyi bisambòmbò, too ne ku bidimu mwandamukùlù anyi citèèmà, dikumi, cintu bu nàнку awu. Ne pashiishe bàà kuumukila ku bidimu dikumi too ne ku dikumi ne bitaanu bìvwa bikèngela kwikalabò mu—mu kàlaasà kàà bansongà. Ne pashiishe kàlaasà kàà bakùlumpè bàà bidimu bipite pa dikumi ne bitaanu, bwalu bóbò bàdi. . . bóbò ne cipimu cikumbàne cyà—cyà. . . mu matùkù etu aa's bàdi mwà kupeta mudimu ne bàjinga mwà kwenza

masungulangana pàkaadibo bwine bukolè abu, pabwìpì ne pòpò apu; pa nàнку bivwa bikèngela bwà bòbò—bòbò kwikala bakùmbàne bwà kutèèleja Dìyì, kàdi kulwabo mu cibambalu cinènè ne kutèèlejabo.

226. Bivwa bikèngela bwà banganyì kwikalabo balongeshi?

⁷¹ Kàdi's ki bwalu mbwòbù abu, abu bwalu mbunùtangile ànu neenù biine bwà kudìsungwila balongeshi beenù. Nènku bivwa bikèngela bwà nwènù kwenza aci, kubàtèekamù, kupeta muntu kampànda. Nènku kudìsangisha ne èkèleeziyà, kwamba ne: “Nganyì udikù...Nganyì udikù mwaba ewu mudyùmvwè mulombòdìbwe kùdi Mukalenge?” Nènku dìbà adi kwangata mulongeshi wa mupilùlùke awu. Nènku pashìshe aci cyènjiibwe. Bìdi bikèngela ciikalè bwalu bwà dísù dikolè, bânà bèètù. Mulongeshi awu yèyè kàyì mwà kwikala mupilùlùke bwà cyòci aci to, dìbà adi nushintululàayi balongeshi.

⁷² Pààkùmbanà cikondo, ku bulombodi bwà Nzambì, mèmè muumvwe ne Orman Neville kaciyèna kàbìdì mukùmbànyine bwà kwikala mpaasàtà mwaba ewu to, nèngiikalè mwà kucyambila èkèleeziyà. Pàngiikalà mumòne cintu kampànda cimwèpelè kaaba aka, ngeela meeji ne nwènù balami kanwèna bafwànyine kukùmbànyina kwikala balami to, nèngiikalè mwà kucyambila èkèleeziyà, ne: “Ndi mujandule ne kùdi mulami kampànda mwaba ewu wènza cintu kampànda cìvwà kaciyì cikèngela kwenzaye to, ne kèna ulama mwaba wèndè wa mudimu to,” ne bikwàbò byà mùshindù awu, anyì mulubuludi anyì ní nganyì yònsò. Kì mmèmè udi mwà kwenza disungula bwà kucìitaba anyì kucibènga to, bìdi bikèngela bwà èkèleeziyà kwenzaye yèyè aci, kàdi ncyà bushùwà ne mèmè nèncileejè kumpàla kwà èkèleeziyà. Nwamònu's, bwalu cìvwà cikèngelà kwenza ncyòci aci. Kì cìndì mèmè ne cyà kwikala ncyòci aci, mèmè bu mutangidi, ndi ne cyà kutangila bwà kumòna ne cìdì munkaci mwà kwenzeka ncinyì. Twètù aba mutuyààya's mmu Dyulu, kì mmu mwaba kampànda lwà pambèlu apa ku didìkungwija kampànda anyì cintu kampànda bwà kwenza bikàsà búngì cyanàànà ne kudyatangana muntu ne mukwèndè, ne kunaya ndundu wa baseball nànsha. Tudi mwaba ewu bakwàte mu byanza byètù cintu cyà citàmbe kwikala cyà mushinga mukolè cìdiku pa buloba, Dìyì dyà Nzambì, ne bìdi bikèngela bwà kucikùmbaja mu bulongame bwà cijila.

Bivwa bikèngela bwà banganyì kwikalabò balongeshi?

⁷³ Dìbàsòbola ndinùtangile ànu nwènù. Kàdi mèmè ndi mufwànyine kwangata, bwà bânà bakesè abu, ndi mufwànyine kwangata mukàji mukùlumpè, wa bwena udikù mukùmbànyine mwà kwenza ciine aci. Kàdi bwà bansongà, ndi mufwànyine kwangata mulongeshi wa dísù dikolè, kàyì wa wènza ànu kupàtuka pambèlu apa ùya kadyà minyiinyi mikàlanga nànsha. Mbifwànyine kwikala ànu bilenga yèyè muswè kwikala ùya

kadyà minyiinyi mikàlanga, kàdi cintu cyònsò yéyè mucitume ànu ku byà nànkù. . . Nucitumaayi ku Dîyi, nùteekè muntu udi mukùmbàne bwà kukwàta Dîyi. Ne nebyènzeke ne, èkèleeziyà ewu kàtu ùtwakù nyama ku mikòlò. . . Kudyà kwà minyiinyi mikàlanga kùdi ànu kulenga, ne—ne twine tuupikìnikì tukesè tukesè tunùdi ànu bajinge kwikala kuya kenza panùdi nusangila bwà kwenza bwobùmwe atu, s'bidì ànu bilenga, aci—aci ncivwà cikèngela kwenza bwà nwènù kucyònkòmoja bânà. Kàdi mu ewu mwaba muneemu *emu*, eci n'Dîyi dyà Nzambi. Kudyà kwà minyiinyi mikàlanga mpanùdi nudisanga, anyi cintu kampànda cyà bu nànkù, kàdi kî mmu nzùbu wa Nzambi emu to. Ne bôbò aba mbamanyè, mu bushùwà bwà bwalu ne twètù aba tudi bamanye ne katwèna twitabuujà lukutukutu lwà byà—byà—byà maafètes elu ne byònsò byà nànkù awu mwaba ewu nànsha, twètù—twètù. . . nwènù's nudi bamanyè cidi cimpè kupita abi.

227. Bivwa bikèngela bwà nganyì kwikalaye kumutù kwà kàlaasà kàa Dyàlumingu bwà kukàlamayè mu bulongame?

⁷⁴ Mutàngidi wa kàlaasà kàa Dyàlumingu. Nènku ki wèndè mudimu ngwòwò awu. Yéyè kèna ne cyà kwenza nànsha cimwè ne balami, ne balubuludi, ne bampaasàta, anyi ne muntu mukwàbò nànsha umwe to, yéyè ùdi ne mudimu ànu wèndè yéyè sungasunga. Mulongeshi wènù wa kàlaasà kàa Dyàlumingu nànsha yéyè mwikàle nganyì, mèmè ncyèna mumanyè to. Kàdi mulongeshi wa kàlaasà kàa Dyàlumingu awu ùdi ne cyà kwenza bwà ne kàlaasà ne kàlaasà kònsò kiikalè pa mwaba wàkù, ne mulongeshi yònsò ìkalèpu, anyi kupingaja mulongeshi mukwàbò pa kaaba kàa yéyè mulongeshi awu piikalàye kàyipù ditùkù adi.

⁷⁵ Nènku ànu kumpàla kwà Dyàlumingu. . . Pàcidi ànu—ànu màleesònà munkaci mwà kulongeshiibwa apu, bidì bikèngela bwà mutàngidi wa kàlaasà kàa Dyàlumingu kuvwilapu bwà kwangata milàmbù yidibo basangishemu ayi (milambu yàbò misangisha yà kàlaasà kàa Dyàlumingu ayi), ne mulubù wa búngi bwà bàvwàmù, búngi bwà Bibles yìvwàbò naayi mu kiine kàlaasà aku, ne bikwàbò, ne kwenzaye mulubù wa byòbì abi. Ne pashiishe kwimana kumpàla kwà batèèleji kumpàla menemene kwà diyiisha, pàdibo bàmupèèsha cipòlò cyà dîbà bwà kucyènzayè, pàdibo benza mulubù wa kàlaasà kàa Dyàlumingu paanyimà pàa kàlaasà kàa Dyàlumingu kamanè kujika apu, kwamba búngi bwà balongeshi, búngi bwà bàvwàmù, búngi bwà bantu bònsò basanga ntete bàvwà mwine mu kàlaasà kàa Dyàlumingu amu, milàmbù yònsò—yònsò búngi bwàyì, ne bikwàbò byà mùshindù awu. Balami, balubuludi, bampaasàta, kabèèna bôbò ne cyà kwenza aci nànsha. Kabèèna ne cintu nànsha cimwè cyà kwenzamu to, awu mudimu ngwà mutàngidi wa kàlaasà kàa Dyàlumingu.

⁷⁶ Ne pashiishe yéyè mumòne ne kàlaasà kàa Dyàlumingu kàdi kàkèngela bintu kampànda, bidì bikèngela dîbà adi bwà yéyè kubileeja kùdi—kùdi kasumbù kàa balubuludi, ne balubuludi

bàdi bànji kwenza cisangilu pa bwalu abu, dyàmbedi. Ne pashìishe balubuludi, bòbò basangàne ne mu cibùcilu mùdi mfranga mikumbane ne bikwabo, kupicila kùdi mulami wa cibùcilu, dîbà adi byòbì abi bìdi mwà kusùmbiibwa; yèyè ùkèba cikwàbò cintu bwà mikàndà yà kubala, anyì ní ncinyì cyònsò, anyì ndambù wa Bibles anyì cintu kampànda, pàdîbo baswè kusùmbila muntu kampànda Bible, nudi bamanye's, ùdi mwà kupeta myaku yàbùngì menemene awu ne kutèèla Mifùndu yà yàbùngì menemene awu, matàpishì kampànda anyì cintu kampànda cìikalàbo mwà kupèèshangana aci, matàpishì, ne biikàle bàswa kuwùsùmba ku mfranga ya èkèleeziyà. Dîbà adi aci cileejibwe kùdi—kùdi—kùdi—kùdi balami. . . ne pashìishe bòbò bàkebè bwà kumanya ní mùdi—ní mùdi—ní mùdi kantu mu cibùcilu. Nwamònu anyì?

⁷⁷ Nènku dîbà adi ngeela meeji ne aci ncifileku dyàndamuna ku nkonko yìtaanu ayi pa bwalu abu.

Mpindyewu lùdi lulondèle alu, lùdi ne:

228. Mwanèètù Branham, pa bìdi bitàngilà bulongame bwà èkèleeziyà, tudi baditàcishe bwà kwenza bilondèshile mùshindù wutùdi tuumvwa mèyi matuma mafidiibwe dîbà dyà dilambula dyà èkèleeziyà mupyamùpyà. Kàdi mu kwenza kwà nàнку, bàmwè mbafike too ne ku difika dyà munda buumuke ne mu èkèleeziyà. Ne bakwàbò kî mbaswèku kutèèleja kantu nànsha kàmwè katùdi twamba to, nangàngà bàna. Tudi baakùle ne baledi pa bìdi bitàngilà bàna bàabò balela, kàdi kî mbaswè kutàngila bwalu bwà bàna biine abu to. Mpindyewu, twètù mbàdi bùmve bìbì anyì? Anyì, tudi tucyènza mu mùshindù wùdi kawùyi wówò? Twasàkidila.

Mpindyewu, ngànji ngàndàmune elu mu mùshindù ùdiyì yenda yilondangana ewu.

Bwà bìdi bitàngila bulongame bwà èkèleeziyà, tudi baditàcishe bwà kwenza bilondèshile mùshindù wutùdi bacyùmve cifiidiibwe dîbà dyà dilambula dyà èkèleeziyà mupyamùpyà.

⁷⁸ Mpindyewu, aci's mmu cyòci, nudi nwenza bu mùdici. Mpindyewu, elu lùdi ne cyà kwikala lwà balami, mùndì ncinka, bwalu cidi mwaba ewu mene, mmudimu wà bulami. Èyo.

Kàdi mu kwenza kwà nàнку, misangu yàbùngì tudi. . . misangu yàbùngì bantu mbafike too ne ku ditùfikila twètù munda.

⁷⁹ Ne mèmè, bàtu bamfiikila pàanyi munda! Nebafiikile muntu kanà yònsò munda. Nwamònu anyì? Muntu udi wenza nàнку awu awu, kùdi cintu kampànda cipampalamuke mu muntu awu. Yèyè awu kèna bîmpè kumpàla kwà Nzambì to, bwalu Nyumà wa Kilistò ùdi ùkòkela dilongesha dyà Kilistò, nzùbu wa Kilistò, bulongame bwà Kilistò. Nwamònu anyì? Ne muntu mulùme

kanà yònsò udi . . . anyi muntu mukàji kanà yònsò, anyi bantu kanà bònsò, bânà, bàdi bafwányine kufiikila mulami wa difwànà dyà Nzambì munda udi muswè kubambila bwà kwikalabo . . . ne, anyi muledi kanà yònsò udi mufwányine kufiikila mulami munda . . . Cyà bushùwà, tudi baswè bwà bantu bònsò batùdi mwà kupeta mu èkèleeziyà emu bàlwe; kàdi aci cyòci cifwányine kufila ànu ndululu mwaba mukwàbò kampànda, kùdi dyèbà anyi “kabwe kavùngila mu lukonyi,” mutùvwà ne ciibidilu cyà kucyàmba. Muntu awu kèna bimpè to.

⁸⁰ Yèyè muumuke muye, kùdi cintu ànu cimwèpelè cyà kwenza: kumulekela aye, kàdi kumusambidila. Nwamònu anyi? Dìbà adi pàmwàpa bàmwè bàà ku balami bàye ku èkèleeziyà wend- . . . anyi, bàya kumbèlu kwèndè musangu kampànda, bwà kuya kajandula ne mmuumuke bwà cinyi, ne kumukonka ne bubì bùvwà pa cinyi. Dìbà adi, ne yèyè. . . Àteetè bwà kumòna ní ùdikù mwà kumupungisha. Yèyè kàyì mwà kumupungisha to, dìbà adi àngatè bantèmù bàbìdì anyi bàsàtù bàkamufile, bwà bààfikakù ku dibùmvwa bóbò. Dìbà adi bóbò kabàyi mwà kubùmvwà to, dìbà adi cyàmbiibwè kumpàla kwà èkèleeziyà piikalàye ncidimba cyà èkèleeziyà mwaba ewu. Dìbà adi ùdi . . .

⁸¹ Nènku dìbà adi bóbò kabàyi bidimba byà èkèleeziyà to, mu bushùwà bwà bwalu bóbò kabàyi bidimba byà disangisha edi to, bìvwà bikèngela *kubàfikisha* ku dikòokeshiibwa. Nwamònu’s, bìdi bikèngela bwà bóbò—bwà bóbò kutèeleja mèyi ètù matùma à kaaba aka, bwalu òwò aa ki mèyi matùma à èkèleeziyà. Ebi mbintu bitùdi katùyì baswè kwenza to, bintu bìndì mèmè nciyi munange kwenza to, kàdi ki bintu mene bìdì ne cyà kwenjiibwa. Nènku ndi ndifileeja mèmè mwine: ne ndi mbàmbila mwaba ewu ku mukàbà wà mèyi ewu ne, mmèmè, bàdi mwà kungumvwa ngàakula ne kumanyabo ne mmèmè, kî nwènù abu to. Unùdi béle nkonko eyi *mmèmè*, ne ki mèmè ewu nnwambilabi ne mwanyì mwònsò mùndì pàànyì mumanye bilondèshile Dìyi dyà Nzambì.

⁸² “Mpindyewu, bantu abu bóbò bafiike munda ne bapàtùke munkaci mwènù, Mifùndu yidi yàmba cinyi pa bwalu abu, Mwanèètù Branham?”

⁸³ “Mbapàtùke munkaci mwètù bwalu kabàvwà bàà kutùdi to.” Nènku aci’s cidì cikosa bwalu. “Bapàtùke mu èkèleeziyà,” cidìbo benze’s ncyòci aci. Eyo.

Bakwàbò kî mbaswèku kutèeleja kantu nànsha kàmwè katùdi twamba to, nangàngà bânà.

⁸⁴ Bânà bàdi ne cyà kumanya dikàzamuna, bìvwà bikèngela kudìpetelabo kwàbò kumbèlu. Kàdi nànsha byòbì ne mbàànyì mèmè, bânà bàànyì’s bàtu bàbwela mwab’ewu dìbà kanà dyònsò, bóbò babangè nsòmbelu wa cimvundu, ncyèna muswè bwà nwènù kwenza kansungànsungà nànsha kakesè to; Sarah, Rebekah, Joseph, Billy, anyi ní nganyì yònsò udi mufwányine kwikalaku awu. Nungambilaayi mèmè, nèntàngilè bwalu abu.

Bôbò kabàyi mwà kuditwàla bilenga to, díbà adi nebàshaale kule ne èkèleeziyà too ne pàayiilàbo mwà kuditwàla bilenga. Eci kî ncipalu cyà manàyi to, eci nnzùbu wa Nzambì. Ewu kî mmwaba wa dinayila, ne dinyeemena ne bisàbaatà byà tukàta, ne difùndilangana dyà tubeji, ne dikenyinamu ku mènù, ne dyelelamù bilèlè to, ewu nnzùbu wa Nzambì; ngwà dyenzelamu maalu ne cijila cyònsò.

⁸⁵ Nudi nulwa mwab'ewu mbwà kukuukwila, kî nnànsha bwà kumòngana to. Eci kî—eci kî ncipalu cyà dyenzela pikìniki to, ewu kî mmwaba wa dilwa kukùmbwilanganamù to; ewu mmwaba wà dikwimbwilangana dyà Nyumà Mwimpè, ikalaayi nutèèlaja cidiYe naaci cyà kwamba, kabìyi byà muntu wambila mukwèndè to. Katwèna tulwa apa bwà kubwela mu bwobùmwè muntu ne mukwèndè to, tudi tulwa apa mbwà kubwela mu bwobùmwè ne Kìlistò. Ewu nnzùbu wa dikuukwilamu. Nènku bânà bàdi ne cyà kukàzamunyiibwa, ne bôbò biikàle. . . kùdi baledi. Bìmanyiibwè ne balami aba. . . baledi bàà bânà aba bôbò kabàyi baswè kutèèleja cidi balami aba bambe to, díbà adi baledi aba bidì bikèngela kubalongolaku bôbò biine.

Tudi baakùle ne baledi pa bidì bitàngilà bânà, kàdi kî mbaswè kutàngila bwalu bwàbò to.

⁸⁶ Piikalàbo bidimba byà èkèleeziyà ewu, díbà adi bìvwa bikèngela bwà nwènù kwangata bantu bàbidi anyì bàsàtù ne kubìikila muledi awu nùdisangìshè mwaba wa nkààyenù, mu bimwè byà ku maabìrò. Nànsha yèyè mwikàle nganyi, nànsha mwikàle mémè, nànsha mwikàle Mwanèètù Neville, nànsha mwikàle Billy Paul ne mwanèndè mukesè wa balùme, nànsha mwikàle Mwanèètù Collins ne umwe wa ku bânà bèndè, anyì ní nganyi wa kunùdi nwènù bakwàbò abu. Tudi. . . Tudi banangangane muntu ne mukwèndè, kàdi tudi beena dibànza kùdi Nzambì ne kùdi Dìyi edi. Yèyè mwikàle Doc, kùdi. . . nànsha yèyè mwikàle nganyi, bidì bikèngela bwà twètù kubìikilangana ku luseke muntu ne mukwèndè ne kwikala ne meeji matòòke muntu kùdi mukwèndè. Mmunyi mùdi Nzambì mufwànyineku kukwàta neetù mudimu, patwìkalà katyi ne meeji matòòke muntu kùdi mukwèndè? Netwìkalè ne meeji matòòke kùdiYe munyi? Nwamònu anyì?

⁸⁷ Edi ndìyi dituma, tudi ne cyà kulama nzùbu wa Nzambì! Ne balami bàdi ne cyà kumanya mwà kwenza cyòci aci. Nwamònu anyì? Nènku kì bwà cinyì ndi nzwàmbila mpindyewu ne, nùtábaleelàayi maalu awu. Nènku eci, paùdi wambila baledi kàdi kabàyi baswè kutèèleja eci, kabàyi baswè kucitèèleja to, díbà adi angàtà mulami mukwàbò anyì umwe wa ku balubuludi, anyì muntu kampànda wa mwimpè wa mu èkèleeziyà ewu, nènku ubiikile. . . angàtà mulubuludi wen-. . . Angàtà kasùmbù kèènù kàà balami, balami bèènù bònsò ubàkungwije, wàmbè ne: “Mwanèètù Jones, Mwanèètù Henderson, Mwanèètù Jackson,” anyì ní nganyi udi mufwànyine kwikalaku awu, nwamònu's,

“bàna bààbò balela bàdi bàditwàla bibi, tudi babàmbile misangu yibìdi anyi yisàtù bwà bwà bwalu bàna bààbò balela abu, kàdi kî mbaswè kucitèeleja to.”

⁸⁸ Dìbà adi nudi nubìikidisha Mwanèètù Jones, anyi Mwanèètù *Nî-nganyì-apa*, ne nwamba ne: “Mwanèètù Jones, tudi bakubìikidisha mwab’ewu bwà cisangilu. Tudi bakunange, ne tudi . . . udi citùpà cyà ku twètù, udi umwe wa kutùdi. Itabaku ngànji ànu kwela mukàbà kampànda wà mèyi ewu bwà ütèeleje cidi Mwanèètù Branham mwambe pa bwalu abu, wamònu’s. Mpindyewu, tukàadi bakwambile bwà wèwè kwambila bàna abu bwà kuditwàlabò mu mùshindù mwímpè. Wamònu anyi? Pàdìbo kabàyi baswè kuditwàla mu mùshindù mwímpè, ne wèwè pèèbè kùyi mwà kubàfikisha ku diditwàla mu mùshindù mwímpè mu èkèleeziyà to, ikàlà ubàshiya ne muntu kampànda paùdi wèwè ulwa mu èkèleeziyà too ne piikalàbo bayiile mwà kuditwàla mu mùshindù mwímpè mu nzùbu wa Nzambi.” Nwamònu anyi? Kàdi eci ndíyi ditùma, bìdi bikèngela bwà kutèekiibwadi mu cyenzi! Nwamònu anyi?

Mpindyewu, lukonko lukwàbò alu lùcidi lutùngùnuka.

Mpindyewu, twètù mbàdi bumvwè bibi anyi?

⁸⁹ To, mukalenge. Kanwèna bùmvwè bibi to, aci cidi mu cyôci. Nyèwù ncyàmbulula, mèyi matùma awu. Mu búsàlaayi, kabèèna bakukonka ne: “*Udikù mwà kuswà* bwà wèwè kuya kenza cintu kampànda anyi?” Wèwè mu búsàlaayi, udi *mwenzèjìibwe* bwà kucyèenza. Nwamònu anyi? Nèku mùshindù awu ki wùdibi mu . . . Mémè ndi mwenzèjìibwe bwà kuyiisha Èvànjeeliyò. Ndi mwenzèjìibwe bwà kutwà Cyôci eci nyamà ku mikòlò ncíyi ntanga cidi bakwàbò bantu bàanyi mémè ne bàna bèètù ne bakwàbò bònsò bàmba pa bwalu bwàCì to, ndi mwenzèjìibwe bwà kwenza cyôci eci. Bidi bikèngela bwà mémè kutapangana ku mwoyi ne kukòsa bantu bitùpà bitùpà, kàdi byòbi ne ndi . . .

⁹⁰ Kwèna muswè kushààla bu Oswald to. Nwamònu anyi? Wèwè kùyi mwà kubengangana ne muntu pa bìdiye wàmba to ne bikwàbò, kàdi pashìshe kumulabula ku cyanza ne kutùngùnuka ànu ne kwikala ne njiyà yimwèyimwè ayi kùdiye, dìbà adi kùdi cintu kampànda cipampàlámùke mu wèwè amu. Mémè ncíyi mwà kubengangana ne muntu pa bìdiye wàmba (ànu byà meemene ebi, byà yèyè ku ewu ntengu mémè ku mukwàbò) cibi mémè kutungunuke ànu ne kumutwà musinga wàbùngì mùdì—mùdì Kilistò mufwanyine kumutwa, dìbà adi’s kùdi cintu kampànda cipampàlámùke mu nyumà wanyì, ncyèna ne Nyumà wà Kilistò to. Nwamònu anyi?

⁹¹ Yèyè wàmba ne: “Èè, Mwanèètù Branham, ndi—ndi ngeela meeji ne dilongesha dyèbè didi *bikampànda, bikansanga*.”

⁹² “Èyo, mwanèètù, lwàku túsombè tùnanèbi lungenyi kaaba kàmwè, wèwè ne mémè. Netùditàngidileci twètù biine. Netùkabwele mu cibambalu emu pàà nkààyetù, tubùyiikile.”

Kàdi yéyè mwikàle ànu ùnkosolola tutùpa tutùpa, ne bikèngela bwà mèmè pàanyi kumwandamuna bintu kampànda. Munda mwà mwoyi wànyi mèmè ncìyi mwà kudyùmvwa mùshindù wùm wèwùm wè awu bwèndè yéyè to, bwà ne “yéyè ùcidi ànu mwanèètù ne ndi nteeta bwà kumwambulwisha,” dìbà adi ncyàdyàkumwambulwishaku to, kakwènakù mùshindù wà mèmè kumwambulwisha to. Mèmè ncìyi mumunange to, bìdi ne dikwàcisha kaayi bwà kuyamù? Umwambile ne: “Dyàmbedyambèdì, Mwanèètù, ncyèna mukunange to, nèku itàbàku mpatule aci mu mwoyi wànyi ànu mwab’ewu mene kumpàla kwà twètù kubwela muntwamu, bwalu ncyèna mwà kukwambulwisha pàndi ncìyi mukunange to.”

⁹³ Ne aci ncyà bushùwà’s, ne ki mùshindù ngwòwò awu. Nwamònu’s, nùtùngunuke naaci, nudi bacyènzè ànu mu cyôci menemene, ki mùshindù wùvwàbi bikèngela kwikalabi ngwòwò awu. Kanùtukù bacyùmvwè bibì to.

Tudi tucyènzà mu mùshindù wùdi kawùyi wòwò anyi?

⁹⁴ To, mùshindù mujaalame wa dicyènzà ngwòwò awu. Diyì ditùma adi dilamiibwè! Bwalu cidi ku musangu ne ku musangu. . . Mpindyewu, bânà bakesè ne baamaamù, bânà bakesè bàà mu mabòkò ne bikwàbò, bôbò—bôbò nebàdilè myadi, nèku bôbò baditwe mu didila dyà myadi mipitèpitè bungi ne bìimanyika mpaasàtà wenù kuntu kwàka, nwavùlukaayi ne, nwènù nudi bamulami bèndè, nwènù nudi bamulami bèndè bàà mu Èvànjeeliyò. Nwamònu anyi? Kàdi cyôci cìimanyika mukenji wa Mukalenge, dìbà adi’s nwènù mbàdì balami, bìdi bikèngela bwà nwènzè cinyi? Mbyenze ànu mùdì, muntu wàkula mu myakulu, yéyè’s mmwenzèjìibwe. Nèku muntu udi uyiisha awu, mmwena dibànza kùdì Diyì, mmwena dibànza kùdì bintu ebi. Yònsò wa kunùdì mmwena dibànza kùdì mudimu kampànda, nèku aci’s cidi—nèku aci’s cidi ànu citùdì—citùdì ne cyà kwenza mwab’ewu.

⁹⁵ Mpindyewu, katwèna baswè kwindila ntàntà mupitèpitè bule to, ne mèmè ndi mumanye ne ndi ne cipungidi kampànda mu tusunsa tukesè emu, pa nànkù nèngiikalè—nèngiikalè ànu mwà kuteeta bwà kulwijakaja ne lukasa lwònsò.

229. Mwanèètù Branham . . .

Kùdi nkonko yisàtù, yibìdi pa karta aka.

Mwanèètù Branham, bìvwa bikèngela bwà ngenzèlù wa disangishila bantu milambu mu èkèleeziyà kwikalaye cinyi? Bìvwa bikèngela bwà ciine eci kwikalaci cyènjiibwa mùshindù kaayi?

⁹⁶ Ngeela meeji ne kabìvwa bikèngela bwà disangishila dyà bantu milàmbù mu èkèleeziyà kwenjiibwadi to amba ànu byòbì ne mbwà mpaasàtà wenù. Kàdi ndi ngeela meeji ne bu muntu kampànda mwà kubwela ùlòmba kàà pa luse, anyi cintu kampànda cyà mùshindù awu, udi. . . Anyi muntu kampànda

mu—mu lukengelu lwà menemene, bu mùdì umwe wa ku bidimba byètù kaaba aka, mu disangisha dyètù, twámbe ne umwe wa ku bâna bèètù, yéyè ne lutátu kampànda; èè, ndi ngeela meeji ne bìvwa bikèngela dîbà adi kumanyishiibwaci ku cyambilu, ne mpaasàtà àcyènzè yéyè, ndi ngeela meeji ne mmudimu wèndè yéyè bwà kucyènza; mwanèètù kampànda mwikàle mu lukèngelu lwà cintu kampànda, yéyè àcyàmbilè èkèleeziyà, piikalàbi bikèba bwà mulambu kusangishiibwawu mùshindù awu.

⁹⁷ Byôbì ne mmuntu kampànda mu lukèngelu ne—ne nwènu dîbà adi kanùyì baswè kusangishila muntu udi mu lukèngelu awu mulàmbù to, dîbà adi beena tusumbù bàdisangishè bwà kupetanganabò pa bidì bitàngilà búngi kampànda bwà mfranga ya mu cibùcilu yidìbo baswè kupèesha mwine muntu awu. Kàdi mfranga yà mu cibùcilu ayi yôyi mikesè pa diine dîbà adi ne kabàyi ne mùshindù wà kukumbaja bwalu abu to, dîbà adi bidì bikèngela bàwùsangishè, èè, wikalè—wikalè... bàciyiikilè ne kasumbù, bape mpaasàtà milubù, nènku mpaasàtà àlombè yéyè bwà cintu ciine eci. Àmbè ne: “Mpindyewu, dilòlò edi (Mwanèètù Jones, mmupetè njiwu ya—ya mìbì be, nzùbu wèndè mmwoshike yònsò mubùtùke.), nènku dilòlò edi, twètù bu beena Kilistò, netùdisangè cimùkù, muntu ne muntu wa kutùdì netùlayè bwà citùdiku mwà kwenza bwà kwambulwisha Mwanèètù Jones bwà kupetululayè nzùbu wèndè.” Nwamònu’s, anyì—anyì cyònsò ciikalàku aci. Nwamònu’s, tudi tu... netwènzè cyòci aci. Bàcyàmbè mu cyambilu, ki mùshindù wà kucyènza ngwòwò awu. Ne pashiishe milayi yà mfranga yifidiibwe, ne dîbà adi bàyifile kùdì mulami wa cibùcilu wà èkèleeziyà. Nènku milayi yà mfranga eyi bàkayifucilè kùdì mulami wa cibùcilu wa èkèleeziyà awu, ne bàmpupèeshè yéyè. Ne—ne yéyè àpeeshè muntu awu kabeji kàà mfranga bwà bwalu abu, bwalu ncyèna mumanye ní mbyà balondolwelangana bwà bitàdì anyì ní kí mbyôbì; ndi ngeela meeji ne bìdì nànkù bwà cintu cyà mùshindù awu.

⁹⁸ Mpindyewu, kàdi pàkaadibi byà bu mùdì muntu—muntu mwenyi kampànda ùbwela—mwenyi kampànda ùbwela byenze bu ne ùdì... muntu ubwela, mwambe ne: “Èè, nudi bamanye mùdì bwalu anyì? Ndi—ndi—ndi mu lwendu kàdi ndundu wa màshinyì mmungeele kàpatà, nènku ndi dijinga ne ndundu mupyamùpyà. Nsangishilaayiku mulàmbù dilòlò edi bwà mpetè ndundu mupyamùpyà.” Mpindyewu, aci kabìvwa bikèngela bwà kwenjiibwaci nànsha. To, aci kabìvwa bikèngela bwà kwenjiibwaci to. Kàdi byôbì bimwekaku ne—byôbì bimwekaku ne ncintu cyà musinga, cyà muntu kampànda unùdì bamanye, kasumbù nkafwànyineku kudìsangisha ne kwamba búngi kampànda bwà mfranga yà kulombesha kùdì mulami wa cibùcilu bwà kusumbila muntu awu ndundu wa màshinyì anyì ní ncinyì ciine aci. Anyì mene piikalà cibùcilu cyà èkèleeziyà

cikèpèlè, kàdi kasumbù kàngatè dipàngadika dyà ne yôyi eyi. . . Kabivwa bikèngela bwà mpaasàtà kwelaye dìyi mu ebu bwalu to, balami bôbô—bôbô mbàdi ne cyà kwenza cyôci aci, nwamònu's, anyi tusumbù atu. Nènku mpindyewu piikalà cyôci eci. . . Bôbô bapetàngane ku mèyi, dîbà adi kufila bwalu abu kùdi mpaasàtà, mpaasàtà ngudi mufwànyine kusangishisha mulàmbù awu. Kàdi, mònaayi, piikalàbi ne mmwenyi, ùsanganyibwa mu bwalu bwà lukasalukasa, muntu kampànda ne dijinga dyà ndambù mukèsè wa mfranga ne nwènù nuumvwa ne mbwà kabingila kajaalame, (mpindyewu edi ndyànyì pàànyì dimòna's), cyôci ciikàlè bwà kabingila kajaalame menemene ne nwènù bamanyè ne mbwà kabingila kajaalame. . .

⁹⁹ Mpindyewu, dyàmbedi, nwènù bayè kuntu kwàka bakatàpe dísù mu mikàndà yànyì kumbèlu, ya bantu bàdi balwaku bàmba ne: “Ndi Révérend *Kampànda* wa mu èkèleeziyà *kansanga* ewu, ne ndi—ndi mupeté lutàtu mu njila emu, ne ndiku—ndiku dijinga ne ndundu ya màshinyi yinaayi yà mwomùmwè,” ne mémè mumanyè ne ncivwa ànu mfùminakà ku disangisha ne mvwa mupeté mulàmbù kampànda, anyi cintu kampànda cikwàbò cyà mùshindù awu, mvwa mmupeshawu, pàmwè ne wònsò awu, bwà kuyaye kapeta ndundu ya màshinyi yinaayi yà mwomùmwè. Kàdi dyà ndwa kutàpa dísù mu bímvwà mufunde anyi, kacya kakùvwakù mwambi wa nàнку awu to, wa ukàadikù musòmbèle mu mwaba bu nàнку. Kàdi kùdi ndola binunu dikumi anyi makumi àbidì pa mikàndà ayi yà bidimu bìdi panshì ebi yínkaadi mupèeshangane mùshindù awu, nciyikù mumanyè kantu nànsha kàmwe kàà ne bôbò biine abu bàvwa penyì to. Mémè kulwa kujandula, bakwàbò bambi bàmba ne: “Mòna's, yéyè awu's mundye búngì *kampànda* ne búngì *kansanga*.”

¹⁰⁰ Mpindyewu, èkèleeziyà mmwàmbula bujitu, ànu bwà bèndè yéyè. Ncyà bùshuwà. Bèndè yéyè, ki bàdibo bambwila bujitu.

¹⁰¹ Kàdi kwòkò kùmwèka ne kùdi kabingila kàà musinga, ne dîbà adi nwènù, kùdi, nwènù balubuludi bafwànyine kwamba ne: “Èè, mpindyewu anji indilaayi kakesè. Muntu ewu, *nyéyè* wàwa, kàshinyi kèndè nkòkò kàka mwaba wàwa, eci eci, ncyenzèke cyà bushuwà, ne *cikampànda*. Kí ngwa mu disangisha dyètù to, nwamònu's, kàdi ncyenzèke.” Dîbà adi bôbò baswè kucyènza mùshindù awu, ne bafwànyine kwamba cintu kampànda cyà pabwàci bwà muntu wa pambèlu. . .

¹⁰² Kí mbwà bèètù twètù to, mpindyewu, nwamònu's, bwà bantu bèètù twètù to, bwà bèètù twètù bìdi bikèngela kusangisha ànu kaaba aka mene munkaci mwà bààbò—bààbò bôbò, bàna bààbò kaaba aka, nwamònu's.

¹⁰³ Kàdi yéyè mwikàlè muntu kampànda wa pambèlu, ne muntu awu wàmba ne ùdi ne nzala anyi. . . ne muntu kampànda muswè kwela cyaanza mu mpaaya bwà kumupèeshaku kàà pa luse, aci's ncikutàngile, kàdi mémè ndi ngamba bwà cidì cífuminà kùdi

èkèleeziyà. Ne pashiishe beena mu èkèleeziyà bôbò *balômbùbwe* bwà kupèeshangana kantu, dîbà adi . . .

104 Mpindyewu, nwênù bapete mutangadiki, mu bushùwà bwà bwalu, mwikàle ùyiisha mwab'ewu, dîbà adi kaayi nudi nwangata . . . nwênù . . . aci ncyà dyumvwangana kumpàla kwà kulwaye, nudi bamanyè's, bwà ne nenùmupèeshe mulàmbù kampànda, anyi nenùmufutè difutu kampànda, anyi cyônsò cyàswàye kwenza aci.

105 Kàdi dîbà adi pìikalàbi ne muntu ewu ùdi kaaba aka, ne ciikàle bwà kabingìla kajaalame, ne mpaasàtà . . . ne kasùmbù kaswè bwà kupetangana ku mèyi ne kwambila mpaasàtà bwalu abu, dîbà adi mpaasàtà àmbè ne: "Muntu *kampànda* mmusòmbe kaaba aka, katwèna bamanyè muntu awu to, mmubwele ne mutùlòmbe . . . ùdi wàmba mùdi bânà bèndè ne nzala. Katwèna ne dîbà . . . katwèna bapete dîbà dyà kulondolola cidiye—cidiye—cidiye—cidiye wàmba aci to." Nwamònu anyi?

106 Kwôkò cintu cyà mùshindù awu, dîbà adi wetù—wetù . . . Kwôkò cintu kanà cyônsò munkaci mwà bèètù twètù, balami bèètù—bèètù twètù nebàye kalondolola bìdiye mwambe abi. Nwamònu anyi? Ne pashiishe cyôci cyà mushinga, dîbà adi nùcyènzàayi. Cyôci kaciyi cyà mushinga to, kanùcyènjì to, kabyèna bikèngela bwà nwênù kucyènza to. Kàdi mpindyewu yèyè mwikàle muntu mwab'ewu, nushiile—nushiile mpaasàtà yèyè àmbè ne: "Mpindyewu, kasùmbù kàà balubuludi nkangambile ne kí mbamanye muntu ewu to. Kàdi muntu awu mmusòmbe kaaba aka, ùdi wàmba ne dyèndè n'Jim Jones," anyi ní ncinyi cyônsò cidi cìfwànyine kwikalaku aci, "ne nyèyè ewu musòmbe kaaba aka mene. Udikù mwà kujuukila kuulu anyi, Mukalenge Jones? Mpindyewu, Mukalenge Jones, kundekeelu kwà disangisha, wimanyine ànu ku ciibi cyà kumfundu cyàcya, paùkaadi upàtuka bwà kuya apu. Nènku bantu kampànda bôbò bùmwele mu mwoyi wàbò, anyi ní ncinyi cyônsò cinùdiku baswè kwenzela muntu ewu aci, numupèeshaayici panùdi nwenda nupàtuka apu." Bwà aci nàнку, ncyumvwike mpindyewu anyi?

107 Nudi bakwàte aci pa bisanji byènu abi anyi? Bwà aba bàdi batèeleja mukàbà wà mèyi . . . Ne umwe wa ku . . . Mwanèètù Collins mmucipangile pa mukàbà wèndè wa mèyi. Ndi muswè bwà kwambulula díyi dyamba adi pìikalàbi ne . . . bwalu yèyè ngumwe wa ku balami.

108 Kwôkò—kwôkò muntu kampànda wa ku, muntu ùbwela unùdi . . . kàdi mwikàle mu bwalu bwà lukasalukasa ne ùjinga mulàmbù wa kùdi èkèleeziyà, balubuludi anyi balami bàdisangishè, nènku bânji . . . bàdisangishè, ne bàngatè dipàngàdika edi, ne pashiishe bàmbilè mpaasàtà ne mbifwànyine kwenjiibwa mùshindù *kampànda*. Bôbò abu . . . Mpaasàtà àmbè, ne: "Muntu kampànda ewu," amutèele mu dîna, "katwèna bamumanyè to. Kàdi wetù ngenzèlu kaaba

aka wùtu ngwà kulondolola kumpàla kwà kusangishila bantu milàmbù, ne, aci citu, mbwà bèètù twètù. Kàdi ewu muntu yêyè, nyèwù wàmba ne mmupeteke ne lutàtu, mupetè bwalu bwà lukasalukasa, ùdi ne bânà bàsaama, yêyè, ùdi ùkèba bwà kupetelakù bânà bèndè manga,” anyi ní ncifwányine kwikala cinganyi, bwalu bwà lukasalukasa abu. “Mpindyewu, nyèwù mwimane kaaba aka mene. Udikù mwà kujuukila kuulu anyi, mukalenge?” Nwamònu’s, nènku ajuukile kuulu. Nènku àmbè ne: “Mpindyewu nwènù nudi bamòne cidi...ne n’nganyi’s. Mpindyewu, kundekeelu kwà disangisha edi muntu ewu nèikalè mwimányine lwà ku ciibi cyà kumpàla cyàcya, nènku bantu mu dipàtuka amu, wèwè udyùmwa ne udi muswè kufilaku dyambulwisha mu bwalu ebu, udi mudishikàmìne; twètù tudi ànu bamanyishe cyanààna bwalu abu mu èkèleeziyà.” Wèwè kwèna munkaci mwà kubwányisha to, udi wèwè ànu ubùmanyisha cyanààna. Nwamònu’s, ki dyakidila dyà mwenyi ndyòdi adi. Nwamònu anyi? Bwà mpindyewu nùmvù anyi? Eyo.

¹⁰⁹ Ngeela meeji ne aci ncikòse bwalu bwà lukonko alu.

230. Kàdi bìshi bwà mikàbà ya mèyi? Mpindyewu. Bu mùdi...Kàdi bìshi bwà mikàbà ya mèyi? Lùdi ne cikonkelu. Bu mùdìbi ne, bààbùngi bàdi bàfùndila birò mikàndà bakudyula wèwè bwà dipàngadika dyà bìdi bitàngilà mikàbà ya mèyi. Kàbìdi, bwà bakwàbò bàdi mu nyungulukilu wa èkèleeziyà bàdi bàsùmbisha mikàbà ya mèyi, piikalàbi bikèngela bwà Mukalenge Maguire kwikalaye yêyè ùfuta lubèlèèsà lwà bwena cintu pa yòyi.

¹¹⁰ Eyo. Mikàbà ya mèyi yìdi nku mukàndà wa dyumvwangana. Ne piikalàbi ne mèmè...Ncyèna mumanyè ànu bìmpè menemene ne mukàndà wa dyumvwangana awu mmujikile matùkù díbà kaayi to, kàdi balubuludi, ebu mbwalu bwà balubuludi; kí mbwà balami to, mbwà balubuludi; kí mbwà mpaasàtà to, mbwà balubuludi. Balubuludi, ku musangu ne ku musangu, bóbò—bóbò mbàtù bàfùnda mukàndà wà dyumvwangana awu, mùndi mucyùmwa. Kàdi piikalàbi ne kí—kí mmwòmò to, díbà adi balubuludi bàlongololè. Balubuludi aba mbenze mukàndà wa dyumvwangana ne muntu udi ukwàta mikàbà ya mèyi, ne mikàbà ya mèyi ayi yìdi nku dyanyishila.

¹¹¹ Muntu mukwàbò nànsha umwe kèna mwà kwenza mikàbà ya mèyi to amba ànu bamwanyishile kùdi muntu udi ne dyanyishila awu, ne kayènakù mwà kusùmbishiibwa to amba ànu byanyishiibwe kùdi muntu udi ne dyanyishila awu, bwalu aci ki mukenji wà ditùnga, nwamònu’s, bwà ne dyanyishila ndidì dicilamè. Nwamònu anyi? Nènku piikalà dyanyishil-...ewu udi mulame dyanyishila awu yêyè muswè kulekela *Kampànda* wènza mikàbà ya mèyi, aci ncimutàngile yêyè. Yêyè muswè kulekela bantu bònsò bènza mikàbà ya mèyi, aci ncimutàngile yêyè; yêyè muswè bwà bantu bònsò kwikalabò bàpàányisha mikàbà ya mèyi, aci ncitàngile muntu udi mulame dyanyishila awu. Bìvwa

bikèngela bwà yéyè kwikalaku ne—ne kabeji kakesè kafùnda katwà cyàlà kùdi muntu udi mulame dyanyishila awu, bwà kwikalayè wènza mikàbà yà mèyi ne ùyìpàànyisha, bwalu dîbà adi yéyè mmubinge kumpàla kwà mukenji wà ditùnga. Bwalu yéyè kàyì mwenze nàнку to, muntu awu, ùdi ne dyanyishila pa cyôci aci awu. . . Bu mùdi mwambule bujitu, wèwè mwine awu, bwà. . . (Bu ne kùvwa muntu wa—wa munwine kutùbùke uvwa muswè kukeba katàmbà kàà kwapuka naakù, yéyè's ùvwa ànu mufwànyine kucyènza cyà bushùwà.) bwà wèwè kusambuka dyanyishila adi, bwalu aci cidi ànu bu bukenji bwà bwena-cintu, nudi numòna's, cintu ànu cyôci cìmwècìmwè aci. Kwèna mwanishiibwe bwà kucyènza to; ncibawu cinènè bu wèwè mwà kwenza nàнку.

¹¹² Pa nàнку pìikalàbi ne bantu bàdi bènza mikàbà yà mèyi, pàmwàpa mbapetè dyumvwangana dyà kùdi Mukalenge Maguire ùdi—ùdi ne. . . ùdi—ùdi wàngata lubèlèèsà lwà bwena cintu pa mikàbà yà mèyi awu's. Nènku mpindyewu. . . ne mèmè ncyèna mumanye pa bìdi bitàngilà aci to, bwalu nciutu ntàmba kwikala neenù kaaba aka bwà kumanya mùdi biine bintu ebi ne nganyi udici cìfwànyine kwamba to. Ndi ncinka ne Mukalenge Maguire ngucìdi naadi, bwalu kwaka nàka, ntu mu Californie anyi mu Arizona, mùndi nsanganyiibwa amu, ntu ngumvwa ne bàcìtu ànu bàsùmba mikàbà yà mèyi yà mu Californie. Mwanèètù Sothmann, tatwèndè—mwenu wa Mukalenge Maguire, yéyè udi mmwanèètù mu èkèleeziyà emu awu. Ngeela meeji ne Mukalenge Maguire ngucìdi naadi, diine—diine dyanyishila adi pa yòyi ayi.

¹¹³ Nènku mpindyewu, nkwenzeke madyàbakeena ànu kwine kwònsò aku pa bìdi bitàngilà mùshindù wùdi mikàbà yà mèyi myenjiiibwe. Mpindyewu, pàdiku didyàbakeena pa cintu kanà cyònsò cidi cìtàngile mpetu mu èkèleeziyà ewu, ndibanza dyela balubuludi bwà kwenzabò bwà ne cintu aci nciitòòkèshiibwe bilenga. Nwamònu anyi? Kabivwa bikèngela, nànsha byà munyi, bwà kwikalaku bwalu nànsha bùmwè to.

Mpindyewu nudi numòna apa, mbàmbe pa kabeji aka, ne:

Bàdi bàfùndila bìrò mikàndà bakudyula wèwè.

¹¹⁴ Bwà kwamba menemene, mèmè ndi mupetè mikàndà bùngi cyanàànà mimfùndila pa bwalu abu, ne mbaswè kumanya ne bwà cinyi kabèèna bapeta mikàbà yàbò yà mèyi. Mpindyewu nwènu's mbàdi bamanye mukàndà wènu wà dyumvwangana ne ewu udi ne dyanyishila, mùndi muumvwe. . . Mikàbà yà mèyi, mèmè—mèmè ncyèna muswè kwelamu dîyi to, mèmè mwine, pìikalà muntu ùkwàta mudimu ne mukàbà wà mèyi bwà ditancisha dyà Èvànjeeliyò, "Amen!"

¹¹⁵ Kàdi, dyàmbedi, Mwanèètù Roberson ne bakwàbò mbàvwà babange kuyènza, Mwanèètù Beeler ne bààbùngi bàà kùdìbo bààkabanga kuyènza; ki pashiishe nsongàalùmè yibidi ayi,

Mwanèètù Mercier ne Mwanèètù Goad, mbayènzè munda mwà bidimu; nènku, mu bushùwà bwà bwalu, pàdì yònsò wa ku biine bantu abu muyènzè, nkupàtuke madyàbàkeena pa yònsò wa kùdìbo. Kàdì, ànu àbìdì àdì aa mwab'ewu, mbyenze ànu bu ne nkwenzeke didyàbàkeena dinène bwà dibènga kupeta dyà mikàbà yàbò yà mèyì. Bantu mbambiikile ku tèlèfonè eku ne eku kwà ditùnga. Ne pashìishe mukwàbò, mwikàle ne, mikàbà yà mèyì myenzulula yìkalà mwà kupàtula cintu kampànda munda mwà kasunsa kàmwè, kàdì dyà bawela kasunsa kawkwàbò, ùpàtula cintu cyà cyanààna, ne pashìishe kabàciyì mwà kumvwa mene ne mbinganyi biine abi to.

¹¹⁶ Mpindyewu, bantu bàdì bàfila mfranga bwà mikàbà yà mèyì eyi abu's bìvwa bikèngela kupetabò mukàbà wà mèyì mushùwashùwàlè. Cidìbo benza bwà kuyipeta nànsha ciikàle cinganyi, tudi baswè kumòna baakidiyà bèètù ne bânà bèètù (bwalu's mbaakidiyà bèètù ne bânà bèètù, ne bikwàbò), bàdì ne cyà kupeta mukàbà wa mèyì “Wa kapelu” awu. Mpindyewu, nwènù balubuludi ikalà nutàngila bwalu abu, bwà ne bantu aba bìikalè basànkishiibwe. Bòbò kabàyi basànkishiibwe to, bàdì ne cyà kubàalujila mfranga yàbò dyàkàmwè.

¹¹⁷ Ne muntu kampànda mmumbiikile ku tèlèfonè, wàmba ne mmwindile mikàbà ya mèyì ngondo ne ngondo. Mpindyewu, ncyèna mumanyè ne Mwanèètù Maguire ùdì utàngila bwalu ebu bishi to. Mèmè—mèmè ncyèna mumanyè ne bidi bishi to, bu múndì nciyì mumanyè kantu nànsha kàmwè pa bwalu abu. Nènku ndi. . . Kì ncintàngile mèmè bwà kumanya cintu nànsha cimwè pa bwalu abu to, ncimutàngile yèyè ne bòbò ne balubuludi. Nènku mèmè ncyèna nteeta bwà kwelamu mukòlò to, kàdì ndi ànu nnwambila cidì mukenji wa ditùnga bwà cyòci aci. Nwamònu anyi? Mukenji wà ditùnga bwà cyòci aci wùdì wàmba ne mikàbà yà mèyì eyi, kwangacila ànu dîbà didìbo bayilombesha adi, mikàbà yà mèyì ayi yidi ne cyà kwikala mu njila mu ditùkù dìmwè, anyi matùkù àsàtù, anyi ànaayi, anyi àtaanu; paanyimà pàà bamane kulombesha mikàbà yà mèyì ayi, bìdì bikèngela bwà kwikalayi mimana keela ku poste anyi dyanyishila ndifwànyine kunyèngiibwa dîbà kanà dyònsò pàdì mèyì matùma aa kabàyi baàtùmikìle. Nwamònu anyi?

¹¹⁸ Mpindyewu, munda mwà ngondo yisambòmbò yònsò anyi cidimu cyònsò, bìdì bikèngela bwà cyòci eci kucyènzululabò, bìdì bikèngela bwà dyumvwangana edi kudyènzululabò. Nudi ne cyà kutwilàngana mu matùkù à ngondo búngì *kampànda* àdì dyanyishila dyàmba ne bidi bikèngela bwà nwènù kutwilàngana awu. Ne dîbà adi bìdì ne cyà kwenzeka ne, aci, bakwàbò bantu bàdì ne cyà kubwela pa dîbà adi, ne nwènù nudi ne cyà kufùnda bwà kumanyisha bakwàbò bàtù bèèla nkonko pa bìdì bitàngilà mikàbà yà mèyì abu, bwà kulwabò ne dyumvwangana dyàbò ne kusòmbabò bwà kuyiikilangana pa bwalu abu.

¹¹⁹ Mpindyewu, mèyì matùma aa àdì ne cyà kutèèkiibwa mu

cyenzi! Nwamònu anyi? Ne àdi ne cyà kutèèkiibwa mu cyenzi mu mshindù mujaalame, bwalu's nyāwù kùkaadi madyābakeena. Bôbò nyāwu mbadyābākèène bwà Leo ne Gene, mbadyābākèène bwà muntu ne muntu, s'ndidyābakeena bwà Mwanèètù Maguire adi, ne bôbò's nebadyābākèène bwà muntu mukwàbò yònsò, kàdi twānji tūjandulāāyi ne didyābakeena diine edi didi bìshi.

¹²⁰ Mpindyewu, kàdi mikàbà yà mèyi pàkaadiyi yibanga kuungwila mishiki, mishèètè mijimà, mikàndà mitufundila makumi ne makumi yilòka bu mvula, ne bôbò. . . Nwamònu's, bwalu abu kabwèna bùpona pambidi pàà mwenji wa mikàbà yà mèyi to, bùdi bùpòna pambidi pàànyi mèmè. Bàdi misanga yònsò bantandisha mèmè bwà bwalu abu. Mpindyewu, mmudimu wanyi mèmè bu mwena Kilistò bwà kutàbàleela bwà bantu kupetabò cìdìbò bāfidila mfranga aci, ne ndi muswè bwà nwènù balubuludi nwènzè bwà bàcìpetè. Byôbì bikèngela bwà kutwàbò mushinga mubànde, petāāyi mukàbà wà mèyi mutàmbe bwìmpè, petāāyi cisanji cyà dikwàta naaci mèyi citàmbe bwìmpè, tudi baswè bwà muntu udi wenza mukàbà wà mèyi awu àwènzè mu mshindù mujaalame. Ki cyètù cìdì cītùsānkisha ncyôci aci. Mukàbà wà mèyi wùdi ne cyà kwenjiibwa mu mshindù mujaalame! Ne kidiyā ùdi ne cyà kusankishiibwa, anyi nudi nwimanyika byònsò biine byà dyenza dyà mikàbà yà mèyi abi, katwàkwikala ne mikàbà yà mèyi to, nùlekelè ànu muntu kanà yònsò udi muswè awu àyènzè. Kàdi piikalābi ne nebāyitwile mushinga, batabaleelè aci bwà bāpetè cìdìbò bāfidile mfranga, bwalu ki bwena Kilistò mbwôbù abu. Kì mbipite byà kwenza. . .

¹²¹ Nènku pādìbò bàlwa mwab'ewu bwà kutèèleja Èvānjeeliyò, ndi muswè kubàpèèsha cìdì citàmbe bwìmpè cìndiku pàānyi mumanye mwà kubàpèèsha aci, nwamònu's, ne pādìbò bàlwa mwab'ewu ndi muswè bwà nwènù bònsò kutàbaleela ne bintu byònsò mbitungùnukè ne kwenzeka. Ki bwà cinyi ndi nzwāmbila nwènù balami, balubuludi, ne bampaasàtà, mwaba ewu dilòlò edi ne, nudi ne cyà kutèèka cyôci eci mu cyenzi ku dileeta ne ku dileeta, bwalu bantu bàlwalwa kaaba aka mbwà kupeta Nzambi, nènku bidi bikèngela bwà twètù kwikala ne bintu ebi mu bulongàme.

¹²² Ne mikàbà yà mèyi kàbìdì yìdì ne cyà kutèèkiibwa mu mwaba wùdi wùkèngediibwa. Byôbì bikèngela bwà kutwàbò mushinga mubànde, mikàbà yà mèyi yìdìbò bàkwàta naayi mudimu ní nyà mishāādìle, dībā adi kebaayi mikàbà yà mèyi yìdì mitàmbe bwìmpè. Byôbì bikèngela bwà kuyitwilabò mushinga mukolè, nuyitwilaayi mushinga mukolè, cìbì muntu apete cìdì cikumbānāngane ne mushinga wùdìbò batwè awu.

¹²³ Mèmè ncyèna njinga lubèlèèsà lwà bwena cintu to nānsa kakesè, dyeyā nānsa dimwè, nānsa tabernacle pèndè kēna ùlùjinga to; ncyèna muswè bwà nwènù kwikala nānku to. Kanwikadi nujinga aci to, kùdì—kùdì lubèlèèsà lwà bwena

cintu. Bu bôbò mwà kulùfucila, ndi ngeela meeji ne bìvwa bikèngela bwà nwènù kufucisha kakesè bwà lubèlèèsà lwà bwena cintu bu mùdìci cyenjiibwa kaaba aka. Ndi ngeela meeji ne ncintu kampànda cìdìbo bambe, Mukalenge Miller, ne bakwàbò, pa bìdì bitàngila mukenji wà ditunga, wutùvwà bapete wà ne, kufucishakù kantu kampànda kàà lubèlèèsà lwà bwena cintu anyì bikwàbò. Aci ncinùtàngile nwènù bônso bwà nwatàbàleelaayi bwalu abu. Mémè ncyèna, ncyèna ne cyà dyenza nànsha cimwè mu—mu cìdì cilongolola aci to; nwènù bônso nùtábaleelàayi bwalu abu. Mémè ncyèna mwà kucitàbaleela cyònsò to, ndi mémè nkwambila ànu mùshindù wùvwàbi bikèngela bwà kwikalaci ne wùdìci ne cyà kulombodiibwa. Aci. . . Nudi bùmve, ngàm̀̀bi ne “cìdì ne cyà kulombodiibwa.” Pa nànkù tudì baswe bwà cyòcì eci kulombodiibwaci mu mùshindù mujaalame.

¹²⁴ Nènku pùikalàbi bikèngela bwà kwikalabò ne cisanji cyà citàmbe bwìmpè bwà kuyìkwàta, dìbà adì petàayi cisanji cyà citàmbe bwìmpè. Pùikalàbi bikèngela bwà cyòcì kwikala. . . Mpindyewu, ntu mubàmbile, ntu mwambe ne: “Disangisha dyòns-. . . lwendu lwònsò lùndì ngenza pàndì nya mu budimi bwà bwambi, kumpàla kwà mémè kuya, nènnumanyishe ne mmayiisha kampànda àngùikalà mwà kayiisha kuntwaku, cintu kampànda cínkaadi mumane. . .” Ne ntu munulaye bônso, cyà bwalu nèngùikalè mwà kucishintulula kàbìdì mu dyàlumingu dilòlò, ne: “Kumpàla kwà mémè kuyiisha diyiisha dipyadipyà kanà dyònsò, dìvwa mwà kufùmina ku tabernacle eku dyàmbedi, bwalu mbimwèneke ne bôbò mbàdì bapeta nkwacilu mulenga wa mikàbà yà mèyì.” Nudi bavùlùke aci anyì? Dìbà adì ndi ndwa mwab’ewu, nyiisha mayiisha àànyì, pashìishe mpàtuka nya ne mmanyisha muntu udi ukwàta mikàbà yà mèyì awu ne mmasangisha kampànda. Yèyè ùkonka ne: “Ngèpì awu? Cìwikalà mwà kuyiisha ncinyì?” Mémè kumwambila ne: “*Edi* dilòlò nényiishè *cikampànda*, *edi* dilòlò, *cikansanga*,” pa nànkù bàdì mwà kwikala naayi mimana kukwàta ne milongolola bwà kidiyà kuyipeta ànu mwaba awu; mwikàle ànu naayi, mukàbà wà mèyì wà mwìmpè kutàmba wùdìbo bapeta mu disangisha dyà pàntù mpàtùka, bwalu mbawènzèle apa mene ku tabernacle eku kùdì bipàtudi byà mèyì biikàle bìmpè. Nwamònu anyì?

¹²⁵ Kàdì, mpindyewu pàndì nya mu butangadiki bunène ebu apa, cìngùikalà mwà kwenza mpindyewu dyàmwamwa dyà mbù dyàdya ne bikwàbò, ncyèna mwà kulaya aci to, nudi numòna’s, ncyèna mwà kulaya ne nényiishè diyiisha dyànyì dyà kumpàla mwaba ewu nànsha. Bwalu paùdì uyiisha eku ne eku apu, mayiisha awu, bìdì bikèngela wìkalè ne cintu kampànda cìdì. . . Cìdì cishààla cisaapuluke kùdì, ne necìikalè mwà kushààla cisaapuluke bwà aba bàdì bacitèeleja. Bikèngela wènzèku cintu kampànda cyà cishiilàngane, nudi numòna’s,

ne kutwàla Mukenji ànu mùdiwu ùkuvwila *kuntwaku*. Kàdi bàteekè cisanji cyà dikwàta naaci mikàbà yà mèyi mu budimi bwà bwambi amu, anyi cyònsò cidìku aci, cyàkwàtà mikàbà yà mèyi eyi mu mùshindù mupwàngàne.

¹²⁶ Nènku nwéñzàayi mukàbà wà mèyi mupwàngàne, ne mukàbà wà mèyi wònsò nwánji kuwela ne kuwukontonona kumpàla kwà kuyawu, anyi nwimanyikaayi byònsò abi; kanüyi mene ne cyà dyenzamù nànsha cimwè to, nulekele muntu ne muntu ùdyènzela yéyè mwine mukàbà wèndè wà mèyi. Nwamònu anyi? Kàdi nùbyéñzàayi mu mùshindù mujaalame, nwamònu's, bwà didyàbàkeena edi dyàmónaku mwà kujika. Katwèna baswè madyàbàkeena to nànsha kakesè. Pàdiku didyàbàkeena, tütàngilàayi bwalu bwàdi, dîbà adi tudijikija.

¹²⁷ Mpindyewu, néndwijakajè ne mwànyì mwònsò. Billy ùcidi ne nkonko mikwàbò bu yìbìdì nàнку awu mwab'ewu, anyi yìsàtù, pashìshe netùjikijè.

231. Ntoo ne penyì, Mwanèètù Branham, pàdi mulami mwà kuya anyi pàvwàbi bikèngela kuyaye bwà kulama bulongame mu èkèleeziyà? Bivwa bikèngela bwà twètù kulama bulongame anyi kwindila too ne pààtwàmbilà Mwanèètù Neville cidi cìkèngelà bwà twètù kwenza anyi?

¹²⁸ Awu kî mmudimu wà Mwanèètù Neville to, awu's mmudimu wènu nwènu. Nwamònu anyi? Nwènu kanùtu nwambila Mwanèètù Neville cyà kuyiishayè, mùshindù wà kuciyiisha to. Nwamònu's, awu mudimu ngwènu, nwènu balami, nwènu mbàdi ne cyà kwenza aci. Tàngilàayi nwènu bwalu abu. Aci kî nцитàngìle Mwanèètù Neville mu kantu nànsha kàmwè to, awu mudimu's ngwènu nwènu. Nwamònu anyi?

¹²⁹ Mpindyewu, mpùlushi yéyè ùsanganyibwa pambèlu apa mu mùsèsù ne ùmòna muntu wiba bintu paanyimà pàà kàshinyi, bivwa bikèngela bwà kubiikilaye mulombodi wa cimenga anyi, wàmba ne: “Mpindyewu, Mulombodi wa cimenga, Wa kuneemekiiibwa, mukalenge, mèmè ewu's ndi munkaci mwà kunùkwàcila mudimu muneemu emu mu bumpùlushi; mpindyewu, nyèwu ndi musangane muntu kumutu kwà mùsèsù eku, ùdi—ùvwa munkaci mwà kwiba ndundu yà màshinyi mu kàshinyi kampànda makèlèlè dilòlò awu; mpindyewu, ndi ànu ndikonka's, dyèbè pèèbè dimòna pa bwalu abu didi bishi?” Huh! Nwamònu anyi? Nwamònu's, aci kî ncifwànyìnekù kwikala cyà meeji to, kî mmwòmò anyi? To, mukalenge. Pìikalàbi ne yéyè ùvwa wènza cintu kampànda cyà cibi, mukwàtè's.

¹³⁰ Nènku muntu yéyè wènza cintu kampànda cyà cibi mu èkèleeziyà emu, anyi ní nganyi ní nganyi, ùmwimànyikè, ùyiikilè nendè. Kwikadi ne dyambu to; kàdi yéyè kàyi muswè kutèeleja to, akula mu mùshindù wa yéyè kumanya ne cyùdi wamba ncikampànda. Nwamònu anyi? Nwamònu's, byenze bu

mùdì mwà kwambila mwànà mutekète, wamba ne: “Alukila kuntwaku,” kàdi yéyè ùditwàla bibì. Nwènù balami, shààlaayi pa kaaba kèènù! Tèèkaayi. . . Nudi banaayi, shààlaayi bàbìdì lwà kumpàla ne bàbìdì lwà mundekeelu, mu matumba emu anyì mwaba kampànda wà mùshindù awu. Ne nwikalàayi nutàngila ne ntèmà yónsò, bwalu bantu bapidye diitabuuja ne bikwàbò byónsò bàtu bàbwela ànu mùshindù ewu, nudi numòna’s. Nènku nwikalàayi batàlame, nuyaayi ku kaaba kèènù kàà mudimu ne nùshaalàayiku, ki kèènù kaaba kàà kusòmba nkòkò aku; anyì nùshaalàayi biimane pabwìpì ne cimanu menemene biikàle nujooja bantu bònso bàdi bàbwelà.

¹³¹ Mulami ùdi ùkùba nzùbu wa Nzambì. Muntu kampànda yéyè mubwele, yikilà nendè; ikàlà mwaba awu bwà kumwelaku mwoyi, kumulabula ku cyanza. Mbwenà kwamba ne, wèwè udi mpùlushì: “Tudikù mwà kukuleeja cibambalu cyà dikùdikila bìzakù anyì?” anyì ne: “Udi mwà kusòmbelakù panshì anyì?” “Tudikù mwà kukupèèsha mukàndà wà misambu anyì cintu kampànda anyì?” anyì ne: “Mpindyewu tudì baswè bwà mwaba ewu wukusànkishèku, ne—ne usambile, nènku—nènku tudì ne disànka bwà mùdìku neetù mwab’ewu dilòlòlò edi.” Umulombole buludi too ne ku mwaba kampànda, wàmbè ne: “Udi muswè bwà wikadile pabwìpì menemene anyì udi muswè bwà wikadile lwà paanyimà apa?” anyì mu mwaba mukwàbò kanà wónsò. Ki dyakidila dyà beenyi ndyòdì adi.

¹³² Mpùlushì (anyì mulami) udi mpùlushì bwà bàsàlaayi mu cilwilu, nsòmbelu wa bukàlànga, kàdi pèndè mwikàle ne dīyì dyà bukòokeshi. Nwamònu anyì? Nudi bamanyè cidì mpulushi wa bàsàlaayi, mu bushùwà bwà bwalu, yéyè ùtèeka mu cyenzedi makenji èndè, ngeela meeji ne yéyè ùdi ànu bu mùdì muiyishi wa bàsàlaayi. Nudi numòna anyì? Cintu’s nsòmbelu wa bukàlànga ne bikwàbò byónsò, kàdi pèndè’s ùdi ne dīyì dyà bukòokeshi. Nwamònu’s, nudi ne cyà kumutùmikila. Nwamònu’s, yéyè ùdi utèeka. . . Baadiikidì aba bàdi bàpàtuka kwàka bàkakwàcika maala, mòna’s, yéyè’s ùdi ùbàtèeka pa kaaba kààbò. Ki mùdibi kàbìdì bikèngela bwà mulami kubàtèekayè pa kaaba kààbò.

¹³³ Mpindyewu, vùlukàayi ne, mulami mmpùlushì, ne mudimu wa mulami mu bushùwà bwà bwalu ngùdì wa dīsù dyumisha kutàmba mudimu kanà wónsò mu èkèleeziyà. Mèmè ncitukù mumanyè mudimu wa dīsù dyumisha kutàmba mudimu wa mulami nànsha. Ncyà bushùwà’s, bwalu yéyè ùdi ne—ùdi ne mudimu wà bushùwà, ne yéyè mmulùme wa Nzambì. Yéyè mmulùme wa Nzambì menemene ànu mùdì mpaasàtà mwikàle mulùme wa Nzambì amu. Cyà bushùwà, ncìdiye. Yéyè mmusadidi wa Nzambì.

¹³⁴ Mpindyewu balubuludi, cintu cìmwèpelè, mbapètè kùdì Nzambì mudimu wà kutàngila mpetu ne kutàbàleela cyòci aci, bintu bìdì byènzekà mùshindù awu abi. Ndi munwàmbile bwà mikàbà yà mèyì ayi, ne—ne bwà bikwàbò bintu mwaba ewu

bìdì byènzekà, bwà nzùbu ne midimu yà dimulongolola, ne kusangisha kwà mpetu ne bikwàbò, aci—aci ncidibo biikàdile balubuludi: bintu byètù, mpetu ne bikwàbò. Balami kabèèna ne cyà dyenza mu abi nàнку to. Ne ki mùdìbì kàbidì ne—ne mulubuludi kèna ne cyà dyenza mu mudimu wà balami nànsha.

¹³⁵ Mpindyewu, balami bôbò baswè kulòmba dikwàcisha dyà balubuludi pà cintu kanà cyònsò, anyì—anyì balubuludi bàlòmba dikwàcisha dyà balami, nènku nwènù bònsò nudi nukwàta mudimu pàmwè. . . Kàdì ki midimu yènù nyôyì ayi, midisungùlùje. Nwamònu anyì? Èyo.

¹³⁶ Mpindyewu, to, kanùlumbu Mwanèètù Neville to. Mwanèètù Neville yèyè munùlòmbè bwà kwenza cintu kampànda, dîbà adi awu's—awu's mmpaasàtà wenù, ne nsòmbelu wa bukàlàngà ne dinanga ne bikwàbò byònsò. . . Bu yèyè mwà kwamba ne: “Mwanèètù Collins, Mwanèètù Hickerson, Mwanèètù Tony, anyì muntu *kampànda*, ùdikù mwà kumòna ne ncinyì cidì kacyì cyènda bilenga paanyimà pààpa mu ditumba mwàmwa anyì?” Ku mwaba wà mudimu bu nàнку, nudi bamanye's, bu mulùme wa Nzambì wa bushùwà.

¹³⁷ Vùlukàayi ne, unùdì nukwàcila mudimu kî m'Branham Tabernacle, anyì kî m'Mwanèètù Neville anyì mèmè unùdì nukwàcila mudimu nànsha, unùdì nukwàcila mudimu n'Yesù Kilistò. Nwamònu anyì? Nudi. . . Ki Yèyè udi ukèngela bwà nwènù. . . Ne Yèyè—Yèyè ùdì ùneemeka lulamatu lwènù alu mùshindù ànu wùm wèwùm wè wùdì Ye ùneemeka lwà mpaasàtà wàwa anyì nî ndwà nganyì mukwàbò kanà yònsò, Yèyè mmwindile lulamatu lwènù alu! Nènku tudi baswè kuleeja lulamatu lwètù.

¹³⁸ Mpindyewu, mîngà misangu bitu bilwa bikolè boo. Mbinkolèlè mèmè bwà kumòna mwambi kampànda musòmbè mwaba awu ùndì munange ne mwoyi wànyì wònsò, bwà bulelèlè bikèngela mèmè mmwambile; nwamònu's, kàdì mu mùshindù kampànda wà dinanga, ndi mèmè ne cyanza cyolola bwà kumwambulwisha. Kàdì, nwamònu's, bôbò bàtu bàlwa kùndì bàmba ne: “Mwanèètù Branham, wèwè's udi muntu mulenga be, bwà cinyì kùyì mwà kudyàku cibàngà kakesè pa dibatiiza adi, ne pa *cikampànda*, *cikansanga*, ne *cikankèngà*, ne dikubiibwa adi, ne dimiinu dyà nyoka?”

¹³⁹ Mèmè ndi ngàmba ne: “Mwanèètù, ndi mukunange, kàdì mpindyewu twànjìku kwangat- . . . twàngatebi ànu Mifùndu bwà tùmònè ne udi mubinge nganyì anyì udi mupùile nganyì.” Nwamònu's, bìdì bikèngela ngùikalè mukùmbàne bwà. . .

¹⁴⁰ “Kaa, mpindyewu, Mwanèètù Branham, ndi nkwambila ne, wèwè ngudi mupùile mu byònsò.” Nwamònu's, ùbìnduluka.

¹⁴¹ “Kaa,” ndi ngàmba ne, “èè, pàmwàpa ndi mupùile's. Dîbà adi, pùikalàbì ne ndi mupùile, ncyà bushùwa ne (nènku wèwè ùngambile, bu mùdì. . . udi mumanye ne mpa mwaba kampànda

pândi mupiile), dîbà adi ndeejààku wêwè ne mpa mwaba kampànda pândi mupiile.” Nènku mémè ndi muswè kuciitaba, nwamònu’s.

¹⁴² Ncintu cimwècimwè aci ne: “Ê, kî mbwalu bwèbè bwà kwambila mwànà awu bwà kusòmbayè to.” Mpindyewu, mulami ngudi—ngudi mukubi ku nzùbu wa Nzambi. Nwamònu anyi? Mpindyewu bu wêwè mwà. . . Yèyè ùdi ùkùba nzùbu wa Nzambi ne ùmulama mu bulongame. Aci ncidi Mufundu wàmba, kàdi wêwè ne cikwàbò cintu cìvwà cikèngelà bwà mulami kwenzaye, ulwe ungambile. Nwamònu’s, kùdi cintu cimwècimwè aci, kàdi aci—aci’s mmudimu wènu bwà kwenza cyôci aci, èyowà, ànu bwà kutwà nyama ku mikòlò.

¹⁴³ Nènku kabivwa bikèngela bwà nwènu kukonka muntu nànsha umwe to, awu’s—awu’s mmudimu ànu wènu nwènu. Mwanèètù Neville kèna ùkonka muntu nànsha umwe to, kabyèna bikèngela bwà èkèleeziyà kukonkaye. . . Ndi njinga kwamba ne, kabyèna bikèngela bwà—bwà—bwà balubuludi kuyabo kakonka Mwanèètù Neville ní—ní mmuswè bwà kwelabo musàkà ku tabernacle to. Nwamònu anyi? To, to, aci kaciyèna ne cintu nànsha cimwè cyà citàngila Mwanèètù Neville to, kaciyèna ne cintu nànsha cimwè cyà cintangila mémè to, aci ncinùtangile nwènu. Kabyèna bikèngela bwà balami. . .

¹⁴⁴ Mbyà mwomùmwe kàbìdi ne mpaasàtà. “Newikalè mwà kuyiisha pa cinyi? Mémè ncyèna muswè bwà wêwè kwenza *cikampànda* to.” Abu kî mbwalu bwàbò bôbò bwà kwambabo nànkù to, yèyè ùdi mwinshì mwà bukòokeshi bwà Nzambi, nwamònu’s, mpaasàtà wabò awu. Nènku dîbà adi bu ne—bu ne—bu ne. . . Mwanèètù Neville, yèyè ùdi ùyiisha diyiisha didi Nzambi mutùpèeshe, ne twètù tudi bônso pàmwè mu cyôci eci. Ne mémè mwambile Mwanèètù Neville cintu kampànda cyà cìbì, Nzambi ùdi ùngoomekela bujitu bwàci. Ncyà bushùwà. Nwamònu anyi? Pa nànkù Nzambi ngudi Mfùmù waci cyônso. Nwamònu anyi? Nènku twètù tudi tukwàta mudimu ànu bu milòpò Yèndè, nudi numòna’s, pànwàpa mu midimu eyi.

232. Bu wêwè mwà kuswà umvwij- . . .

Lukonko lùdi lùlondà, ne pashiishe ndi ngeela meeji ne tudi ne lukwàbò kàbìdi, ne pashiishe netwi—netwimànyikè.

Bu wêwè mwà kuswà umvwijàku menemene mùdibi bikèngela bwà mapà à dyakula dyà mu myakulu kwikalawu àkwàta mudimu mu èkèleeziyà wetù. Aci nkàadi mucyùmvwije. Ndibà kaayi didi èkèleeziyà mwà kutèèkiibwa mu bulongame pàdi. . . anyi mmwaba kaayi menemene wùdibi bikèngela bwà mapà kwikalawù àkwàcila mudimu? Aci twàfumu ku dicyumvwija.

233. Mbùngì kaayi menemene bwà m-a-l-e-d-i-i-b-w-a. . . Udikù mwà kumòna ne ncinyi aci anyi? [Mwanèètù Billy Paul ùdi wàmba ne: “Byombelu.”—Muf.] Kaa. **Byombelu.**

Mbyombelu bûngi kaayi bìdì bikèngela bwà twètù kwikala naabi mu èkèleeziyà pa kuumusha cisanji cyà orgue ne cyà pyànô?

¹⁴⁵ Èè, mbilààle kunùdi panwikalà ne cisùmbù cyà bimbi bàà ne byombelu byà nshinga anyi cyònsò cinwikalà naaci aci, nùdi numòna's. Ncyèna mumanye ne cinùdi naaci ncinyi to, cìdì eci cyumvwija, ncyèna ncyùmvwà to. Kàdi cisanji cyà orgue ne cyà pyànô abi mbintu byàbendè byà èkèleeziyà. Mpindyewu, bu mulombodi wa misambu mwà kupeta meeji à kwikala ne mpungi ne mpandalala ne bikwàbò byà mùshindù awu, kàdi bantu bàlwe mu èkèleeziyà ne bimba ne biine byombelu ebi. . . Ne biikàle mu cisùmbù kampànda cyà bimbi, ne—ne pashiishe, mu bushùwà bwà bwalu, dîbà adi aci ncyà balubuludi bèènù, bwà kucitàngila pàmwè ne balubuludi bwà kumòna ní bàdi ne mfranga bwà kusùmbabò byombelu byàbò abi ne bikwàbò, anyi ní ncinyi cyònsò cyà mùshindù awu. Ngeela meeji ne ki cìdì lukonko lwàbò.

¹⁴⁶ Kàdi bôbò biikàle ne byombelu byàbò bôbò, mbilenga be. Bôbò kabàyi ne byombelu byàbò bôbò to, kàdi biikàle bidimba byà cisùmbù cyà misambu mwab'ewu, kàyi ànu muntu wa ùbwela mwab'ewu ne wimbakù ànu kasangu kàmwè nànkù, ùpàtuka lubilu nyèyè uyààya wàwa mùshindù awu to, bìvwa bikèngela kwikalaci cisùmbù cyà bimbi bàà misambu mu èkèleeziyà. Èkèleeziyà kî mmufwànyine kusùmba mpungi bwà—bwà—bwà muntu udi umwimba kaaba aka ne mààlabà dilòdòlò ùtùpika ùkaadi mûngà mwaba, ne mûngà mwaba, cibì mwikàle ùlwa ku misangu wimbakù ndambù to. To, mukalenge. Bìdì bikèngela ciikalè cisùmbù cyà bimbi bàà misambu cyà kaaba aka mene, cisùmbù cyà bimbi bàà misambu cilongolola ciikalè ne—ne mulombodi, ne dîbà adi èkèleeziyà, kuyiikila naabò pa bìdì bitàngilà kusùmbà kwà byombelu.

234. Bu wèwè mwà kuswà umvwijaku bîmpè mùdibi bikèngela bwà twètù ku- . . . mùshindù kaayi wutùdiku twètù balami mwà kulama cisàmbà ànu mu mwaba wà cijila emu kumpàla anyi paanyimà pàa...Bu wèwè mwà kuswà umvwijaku.

[Mwanèètù Billy Paul ùdi ùbala lukonko alu: **“Balami bàdi balama cisàmbà mu cinyàanya mùshindù kaayi mu mwaba wa cijila ewu kumpàla ne paanyimà pàa èkèleeziyà?”**—Muf.]

Kaa. Èyo.

¹⁴⁷ Ndi mufwànyineku kwamba nènku, bàna bèètù. Mpindyewu, aci ncintu cinène. Mvw'a kujinga bwà twìkalakù ne dîbà dyàbûngì dyà kupicishilapu, bwalu cìdì—cìdì. . . cìdì—cìdì ne mushinga wàbûngì kutùdì, nwamònu's. Mpindyewu, èkèleeziyà kèna. . .

148 Nwênù baswè bwà...Nwênù baswè bwà kwendesha mukàbà wà mèyi ewu dilòòlò kampànda bwà kuwèla kumpàla kwà masangisha, bwà bantu kuwùmvwabò, nùwèlàayi wówò ewu; ànu katùpà kàà mukàbà wà mèyi aka kàdi kanùyì nupicisha to, ànu aka nkààyaakù. Katùpà kanà kònsò kàà wówò ewu kanùdi baswè kwela bwà cintu kampànda, nutùngunuka ànu ne kuwendesha too ne panùdi nukacìpeta, nènku pashìishe nùwèlàayi. Nwamònu's, bwalu nnkonko.

149 Mpindyewu, balami bàà èkèleeziyà, ne bu—bu mungãmbi, bôbò mbampùlushi bàà èkèleeziyà. Kàdi èkèleeziyà kí nnzùbu wa dilwa kutwilàngana bwà maalu ónsò nàka bwà—bwà bwobùmwe ne bulunda ne disàngala dyà kanùyì nucyùka maalu to. Èkèleeziyà mmwaba wà cijila wà Nzambi! Tudi tulwa mwaba ewu...Mpindyewu, patwìkalà baswè bwà kutwilàngana muntu ne mukwèndè, lekela ndwile kwèbè kumbèlu, wèwè ulwile kwànyì kumbèlu, anyì nùyaayi kumbèlu kwà muntu ne mukwèndè ne nukàtwilànganaayi muntu ne mukwèndè. Kàdi byà kulwa kusangeela mu èkèleeziyà byà kanùyì nucyùka maalu abi, ne miyiiki ne bintu byà mùshindù awu, kí mbìmpè to, bàna bèètù; patùdi tulwa mwab'ewu, tudi tuumusha cintu cyònsò nkòòng mu meeji ètù. Patwìkalà baswè kulwa mwab'ewu... .

150 Tàngilàayi numòne mùshindù wutùvwà ne ciibidilu cyà kubyènga kùkaadi bidimu. Mwanèètù wa bakàji Gertie nguvwa mwimbi wa cisanji cyà pyànò. Pàncìvwà mèmè mpaasàtà kaaba aka, byàkakèngela bwà mèmè—mèmè kwìkala mpaasàtà, mulami, mulubuludi, bikwàbò byònsò musangu wùmwe, nwamònu's, kàdi bìvwa bìkèngela mèmè—mèmè kucyènta. Bwà mpindyewu kaayi kabìcyèna bìkèngela bwà nwênù kucyènta mùshindù awu to, nwamònu's, bwalu nukàadi ne bantu bwà kubyènta. Kàdi pàdi... .Mvwa ne baawisiyè, Mwanèètù Seward ne bònsò abu ku ciibi. Bàvwa ne mikàndà myungwija mishikì lwà mwaba wàwa, ku ciibi aku, mitèeka pa nkwasà, anyì cintu kampànda cikwàbò. Nènku pàvwà ànu muntu ùbwela, bàvwa bàmulèeja mwaba wà kukùdikayè cizakù cyèndè anyì bàmwambulwisha bwà kuya pa kaaba kàà kusòmbayè, bàmpupèsha mukàndà wà misambu ne bàmulòmba bwà “kwìkalayè mu disambila.” Nènku díbà adi muntu yònsò ùvwa ùsòmba mu nkwasà wèndè ne ùsambidila mundamunda too ne pa díbà dyà kubanga. Nwamònu anyì? Nènku pashìishe pa díbà dyà kubanga, Mwanèètù wa bakàji Gertie, mwimbi wa cisanji cyà pyànò awu, ùvwa ùjuuka mwaba awu ne ùbanga mujiki kumpàla kwà... .pàvwà bantu bènda—bènda badisangisha apu.

151 Ndi mufwànyìneku kwamba bwà nwênù kwambila mwimbi wenù wa cisanji cyà orgue bwà kubàndayè kuntwaku ne kwimbaye mujiki wà mulenga menemene awu. Yèyè kàyì mwà kwìkalapu to, nwìkalè bakwàte mujiki awu pa mukàbà wà mèyi ne pashìishe nùwèlè mu cisanji, anyì cintu kampànda cikwàbò. Nènku nwèlè mujiki, mujiki munsantu menemene wènda wimba

ne kalolo kwónsò. Pa nànkù...Ne kulòmba bantu...Kàdi bantu bóbò baditwe mu miyiiki ne mu dyènza dyà bintu byà lukutukutu mùshindù awu, umwe wa ku balami ajuuke aye ku cikolokolo ku cyambilu kwàka àmbè ne, “sh, sh, sh,” mùshindù awu. Àmbè ne: “Mu tabernacle emu, tudi—tudi baswè bwà nwikalè nulwa bwà kukuukwila. Mpindyewu katwenjiku mutooyi to, tèèlejaayi mujiki awu. Nda pa nkwaswa webè, sòmbelà panshì, ikàlà mu kaneemu, wamònu’s, ikàlà usambila anyi ubala Bible. Apa, mu mwaba wa cijila ewu, ki mùdì Mukalenge musòmbele. Nènku tudi baswè bwà bantu bònsò bìikalè mu kaneemu kàà menemene ne mu dikuukwila, kabiyi byà kwikala kunyeemakana eku ne eku, byà diyikilangana kumpàla kwà masangisha abi to. Ikalaayi nudikungwija, ne nudi nulwa mwab’ewu bwà kuyiikila ne Mukalenge. Nwamònu anyi? Anyi udi mu disambila dyà usambidila mundamunda, wamònu’s, anyi udi ubala Bible webè.”

¹⁵² Pàngààkabwelà mu Èkèleeziya wa Marble kwàka ku...mwà Norman Vincent Peale mwàmwa, nukààdiku bumvwe bàmba bwà bwalu bwèndè, nudi numòna’s. Nènku mèmè kubwela mu...Mumanyi mupiluke wa maalu à nsòmbelu, mulongeshi, nudi bamanyè’s. Nènku mèmè kubwela mu èkèleeziyà wèndè awu, ki mèmè kudyàmbidila ànu mwómò amu, ne: “Mvw’a kujingaku bwà wanyì tabernacle kwenzaye cyàkàbìdì nànkù.” Balami abu bàdi bàkiimana buludi ku ciibi aku panùdì ànu ne nwàbwedi. Bóbò, mu bushùwà bwà bwalu, bàdi bàkwambika dibèji dyà byà mu kàlaasà kàà Dyàlumingu mu cyanza, ne bàya neebè buludi bàkakusòmbesha panshì. Bìvwa bikèngela bwà yèyè kumùshiyà munda mutupu misangu yisàtù, nudi bamanyè’s, mùvwa mukumbana ànu bantu bàmba kutwà ku nkàmà yinaayi anyi yitaanu, nudi bamanyè’s; ne New York pèndè’s ùtu mwaba munène, ne yèyè wa bwalu muntu mumanyike. Ne ndi ngeela meeji ne bìvwa bikèngela bwà kwikalabò ne kàlaasà kàmwè pa dîbà dikumi jaajaaja ne kakwàbò pa dîbà dikumi ne umwe, diyiisha ànu òmwèdìmwè adi badyàmbulula, disangisha ànu òmwèdìmwè adi menemene, dibèji òmwèdìmwè adi. Kàdi pàvwàbò bàtangalaka, bàvwa (ngeela meeji) ne tusunsa tutaanu bwà èkèleeziyà kwikalaye menemene...Muntu mukwàbò nànsha umwe kàvwa mwà kubwelamu to pàvwàbò kabàyi banji kupatuka, pashiihe balami bàvwa bàfila njila ne èkèleeziyà mukwàbò ùvwa ùpàtamù tètè. Bàvwa ne byà disòmbela byà kale byà bishèètèshèètè ebi, nudi bamanyè’s, bàvwelamu mùshindù awu, ne bàvwa basòmba mu bibàsà mùvwàbò bunzulula ciibi amu. Wa cyena kale, mmushààle mwimane mwaba awu kacya—kacya kùkaadi bidimu nkàmà yìbìdì bulubulu, ngeela meeji, mwine Èkèleeziyà wa kale wa Marble awu.

¹⁵³ Ne nuvwa mwà kuumvwa mùvwà mpengele wetù ewu ùmata panshì mwaba kanà wònsò mu èkèleeziyà amu, ne bantu

bònsò munkaci mwà kusambila munda mwà tusunsa twôto tukesè mmakumi àsàtù kumpàla kwà kaacyona kàmwèpelè kàà musambu kufidiibwaku ku cisanji cyà orgue aku, kaamusambu kàà dibanga naaku aku. Nwamònu anyi? Nènku bantu bònsò ànu munkaci mwà kusambila. Mémè kudyàmbidila ne: “Bilenga byà kacya’s!” Pashiishe pàvwà mwambi awu. . . Kaamusambu kàà dibanga naaku aku, kàà ne. . . Ngeela meeji ne bàvwa bimba kaamusambu kàà dibanga naaku kàmwèpelè munda mwà tusunsa bu tùsàtù anyi tùtaanu nàнку awu ne: *Mùshindù Mwinè Wùdì Wèwè Munène’s Wè*, anyi cintu kampànda cyà mùshindù awu, bitùngùnùke mùshindù awu. Ne pashiishe pàvwàbò bàmana kwenza nàнку, bantu bònsò bàvwa biimanyika kusambila, bàshààla batèèlèje kaamusambu kàà dibanga naaku aku. Nwamònu’s, ki cìvwà cìfila dishintuluka, bùùmuka ku disambila bàya ku kaamusambu kàà dibanga naaku aku. Nènku dìbà adi pàvwàbò bàkimba kòkò aku apu, pashiishe mulombodi wa korale ùvwa ulombola korale awu. Pashiishe bàvwa bimba musambu wa disangisha mu ciibùngì *pàmwè ne* korale. Ne pashiishe bàvwa bàshààla badilongòlòle bwà kàlaasà kààbò kàà Dyàlumingu. Nwamònu anyi? Ne pashiishe—ne pashiishe pàvwàku kùjika, kakùvwa cintu nànsha cimwè cìvwà cyènzekà to pa kuumusha dikuukwila dyà Nzambi, dìbà dyònsò adi, ne cyòci aci ki citùvwà bayiilemu.

¹⁵⁴ Nènku ndi ngeela meeji ne mbifwànyinekù kwikala cintu cìmpè bu èkèleeziyà wetù ewu. . . Kàdi mémè ngudi wamba pàànyì ànu nùнку ewu ne, twètù, tukàadi, ki citwènzà twètù. Nwamònu anyi? Tùcyènzàayi. Muntu yèyè wènzà cintu kampànda, ne wàmba, ne: “Ndi ngeela meeji ne ncifwànyine kwikala cintu cìmpè.” Cyòci ciikàle cintu cìmpè, dìbà adi tùcyènzàayi. Nwamònu anyi? Katwèna baswè kulààdikija cintu cìmpè kanà cyònsò eci to, netùcyènzè, nànsha byà munyì. Nwamònu anyi? Nènku ndàayi ànu kumpàla ne—ne imanyinaayipu ne—ne bu bòbò mwà kubanga mu dindà kampànda, anyi cintu kampànda cyà mùshindù awu, bantu biikàle bàsàmbangana, muntu kampànda alwe ànu cyanàànà, anyi umwe wa ku—umwe wa ku balami, anyi muntu kampànda àsemenè mwaba awu àmbè ne: “Nkwediibwe mukàndu mu tabernacle emu. . .”

¹⁵⁵ Ncyèna mumanye ní bàdi bàcyènzà’s; bàdi mwà—mwà kwikala bàcyènzà. Mémè ncitukù mwaba ewu to, nudi numòna’s, ncyèna mumanye to. Kacya ncitukù mémè mwaba ewu kumpàla kwà masangisha to.

¹⁵⁶ Nènku pàdìbo bàbwela bàbanga miyiiki, muntu kampànda àjuukè kwàka àmbè ne: “Sh, sh, sh, indilaayi kakesè.” Nwamònu anyi? Kwikalè—kwikalè. . . Nwangate mwanèètù wa bakàjì mutekète, numutume kuntwaku ne nùmwambile bwà kwimbaye mujiki awu. Kanùyì benze nàнку to, nùwùkwàtè pa mukàbà wa mèyi nùwèlèmu, nwamònu’s, wa ku cisanji

cyà orgue awu. Nènku nwámbe ne: “Mpindyewu tudi. . . Kùdi mukàndu mupyamùpyà mu tabernacle emu. Pàdi bantu bàbwela muneemu emu, katwèna ne cyà kunungana, anyi kuyiikila to, ànu kukuukwila. Nwamònu anyi? Mpindyewu, ànu mu tusunsa tukesè emu disangisha nediikalè mwà kubanga. Patwamba kufika dîbà adi, udi anyi ubala ànu Bible webè anyi mwinyikè mutù usambidila mundamunda.” Nènku ndambù wa misangu mùshindù awu, bònso nebàyiile. Nwamònu anyi? Nwamònu anyi?

¹⁵⁷ Panùdi nuumvwa muntu kampànda uyiikila, dîbà adi aci’s cidi cipweka bwà. . . paanyimà pàà misangu mikesè mùshindù awu, paanyimà pàà mutanci nudi nukafika mu mwaba wa ne muntu kampànda, twámbe ne, numòna muntu kampànda uyiikila, muntu mukwàbò nànsha umwe kàyi uyiikila to, nudi numòna’s, èè, dîbà adi umwe wa ku balami àseemenè mwaba awu àmbè ne: “Tudi—tudi baswè bwà wèwè kukuukwila mu cikondo cyà disangisha.” Nudi numòna anyi? Nwamònu anyi? Nwamònu’s, kî nnzùbu wa dyoshila miyiiki to, nnzùbu wa dikuukwila. Nudi bumvwe anyi?

Ngeela meeji ne cìywa ncyôci aci. **Bu wèwè mwà kuswà umvwijaku. . . Èyowà. Twǎnjì tùmonebi. Èyowà. Bu wèwè mwà kuswà umvwijaku mùshindù wa. . . wùvwàbi bikèngela bwà balami. . . mu mwaba wà cijila.** Èyowà, ki cyònsò aci. Ncyà bushùwà. Ncyôci aci.

Èyo, mpindyewu, lwà ndekeelu ndwòlò elu.

235. Mwanètù Branham, patùtù bapetè mpungà pa bìdi bitàngilà ntwàdijilu wa disangisha. . . Ndi—ndi. . . didyàbakeen-. . . To, . . . tudi bapete madyàbakeena. . .

Mbafunde ne tuumaleeta tukesè twà menemene. Ne **“bapetè madyàbakeena,”** kî mmwòmò anyi? [Mwanètù Billy Paul ùdi wamba ne: “Uh-huh,” ne ùtúnguka ne kwambulwisha Mwanètù Branham bwà kubala bìdìbo bafunde mu tuumaleeta tukesè atu—Muf.]

. . . bapetè madyàbakeena ku ntwàdijilu kwà disangisha. Tudi ne. . . Twǎnjì tùmonebi. Tudi—tudi—tudi ne misambu, majaadiki, ne masambila, ne malomba à masambila, misambu yà pabwàyì, ne p-à-. . . pàmwàpa byòbi abi biikàle byàngata. . . kubwela mu diyiisha pa dîbà dikumi ne òmwè, bwà. . . anyi paanyimà, kàdi katùciyi tupeta dîbà búngì bukùmbàne bwà Dîyi to. Bámwè bàà ku bantu bàdi bàpangila lutùlùlù ne bikèngela bwà. . . kuumukabo kumpàla kwà dyòdi—dyòdi kwikala, kwikala. . . kumpàla kwà—kumpàla kwà kujikadi. Bidi. . . Bu wèwè mwà kuswà umvwijaku búngì bwà misambu, ne ndìbà kaayi dyà kubanga diyiisha. Ne mîngà—mîngà misangu tutu ne disambila—malòmba à masambila ne

bikuupuka ku disangisha dyà majaadiki, bintu kampànda bidì—bidì kabiyì . . . kabiyì bimweka bimpè pa dîbà adì to.

¹⁵⁸ Mpindyewu, ndi ntekemena ne ndi muumvwe aci. Billy ngudikù uteeta bwà kungambulwisha kaaba aka. Bwà bàdì bàtèèleja mukàbà wà mèyì, bidì byenzeka ne nwênù... muntu kampànda mu disangisha, mu disangisha, munkaci mwà kutèèleja eci ne civwa ncinganyi, Billy ngudikù uteeta bwà kungambulwisha bwà kubibala awu bwalu mbifundiibwe ne tuumaleeta tukesè be, tukesè twà menemene, ne mèmè ncivwakù mufwànyine kutujandula to. Ngàapeci cingenyinyenyi cyà byònsò abi, bidi, ne: “Bivwa bikèngela bwà twikalè twimba misambu búngì kaayi kumpàla kwà kubanga disangisha, ne disangisha diine bivwa bikèngela bwà kubangadi dîbà kaayi?”

¹⁵⁹ Mpindyewu, cintu cyà kumpàla cîndi muswè kwenza kaaba aka nditonda. Nènku pândi mupiile, ndi muswè kwitaba ne “Ndi mupiile.” Nwamònu anyi? Nènku ndi—nènku ndi—nèngènzè ditonda kaaba aka ne “mu mùshindù kampànda mèmè ngudi mufikishe ku ciine aci.” Bwalu mèmè ngutu wenza miine masangisha à maleemàle awu ne bikwàbò, ki cidì cilwe kubweja èkèleeziyà mu ciine ciibidilu eci, nwamònu’s, cyà dyenza nàнку awu aci, kàdi kabivwa bikèngela kwikalabi nàнку to. Nènku mpindyewu, vùlukàayi ne, mèmè ntu ne. . . ndi. . . Mvwa nzwambila bònsò ne: “Mu dyàlumingu dilòlò, bu Mukalenge mwà kwanyisha, mu dyàlumingu dilòlò, ne, ndi nteeta bwà kukosa ntàntà wa dinenga dyà masangisha àanyi kubangila ku mpindyewu, pìikalàbi bikèngela bwà ne nshaale lumingu lukwàbò lwà pamutù, bwà àshaadila mu tusunsa tutwè ku makumi àsàtù anyi makumi anaayi bwà masangisha àanyi ówò mapitèpitè bule.”

¹⁶⁰ Bwalu ndi musangane ne, disangisha didì. . . Dyòdì diikàle dilongolola bimpè, ne diyiisha diikàle difidiibwa mu bukolè bwàdì; wèwè mutàmbe kuleepesha maalu, udi ucyòkesha bantu ne bóbò biine kabèenakù badyumvwa to. Cidì cyenze ne mèmè mvwa mfila. . . Nkààvwa mumanye cyòci aci ànu kwine kwònsò aku. Nwamònu anyi? Baakudi bàkaadi batàmbe kutuutatuuta dyàkalenga ng’aba bàkaadi menemene. . . Yesù úvwa Muntu wa tuumèyi tukesèè, tàngilàayi nùmonè mayiisha Èndè. Tàngilàayi nùmonè mayiisha àà Pòlò. Mu Ditùkù dyà Mpenta, pàmwàpa byàkamwangata tusunsa dikumi ne tùtaanu, ne yèyè wàkatuuta ne bukolè bwònsò. . . mwaba awu, cintu kampànda cyà—cyà—cyàkatùmà misùukà binunu bisàtù mu Bukalenge bwà Nzambi. Nwamònu’s, muye ànu buludi ku bwalu. Nwamònu anyi?

¹⁶¹ Nènku mèmè—mèmè ngudi mupiile. Bwalu, cîndi mwenzèle cyòci eci, kí mbwà ne bwalu ncivwa mumanye civwà bwalu to, kàdi ndi munkaci mwà kwenza mikàbà yà mèyì, nwamònu’s, ne mikàbà eyi neyèdiibwe mu nzùbu munda mwà mèbà ne mèbà ne mèbà. Kàdi ànu munwàjandulà, mu dyàlumingu dilwalwà edi, cidì cyenze ne ngiikalè mwenzè cyòci aci, mu dyàlumingu

dilwalwà edi, cìdi cyenze ne ngiikalè mwenze bintu ebi... ndi mufwànyine kubyamba ànu patùdi twakulangana apa pa mukàbà wà mèyi apa. Cìndi mwenzele cyôci eci mbwalu bwà bujitu bwà bunènaanènààlè bwà Mukenji wa dîbà edi bùdi pambidi pàànyì apa ebu, bwà kuWùpàtula. Mpindyewu ukàadi Mukenji mumane kupatuka ewu, mpindyewu nkàadi ngàngata tusunsa makumi àsatù anyì cintu kampànda cyà mùshindù awu, paanyimà pàà ditùkù dyàkumpàla dyà cidimu, mu masangisha àanyì à pambèlu mu... myaba yònsò yînyaayà, ndi nteeta ne mene ndongolola ne dîbà dyànyì dyà ku dibòko pa tusunsa makumi àsatù, anyì nciyi ntamba kupicishaku pa makumi ànaayi to; kutuuta ne Mukenji ewu ne bukolè bwònsò, ne kwenza dibiikila dyà ku cyoshelu piikalàbi ne ndi... anyì cyònsò cîngiikalà mwà kwenza aci, anyì kubiikila mulongo wà babèedi; ne kubenga kwangata ntàntà wa dîbà bule abu, bwalu ncyà bushùwà ne udi ucyòkesha bantu. Aci kaayi ndi mumanyè.

¹⁶² Kàdi tàngilàayi kuneeku. Ngeela meeji ne, mu cidimu cijimà, katwènakù bapeté bantu dikumi ne bàbidi bàdi bajuuke bàpàtuke to, pààbi misangu mikwàbò's ntu mbàlama apa munda mwà mèbà àbidi anyì àsatù majimà. Nwamònu anyì? Aci's ncyà bushùwà. Bwalu mbwà dyenza dyà mikàbà yà mèyi eyi yidi yiya pa buloba bujimà, nwamònu's. Ne bantu bàà kuntwaku, bôbò nebàshaale basòmbe mèbà ne mèbà bwà kutèeleja Cyôci aci; bambi, ne bikwàbò, mu Allemagne, mu Suisse, mu Àfrikè, mu Àsie, ne mu myaba yònsò, nwamònu's, munkaci mwà kutèeleja Cyôci aci.

¹⁶³ Kàdi, nwamònu's, bwà mu mwaba wà cijila, bwà mu èkèleeziya... Nènku aci kaayi ncimpè. Panwikalà kaaba aka nwenza mukàbà wà mèyi, ne biikàle ne mukàbà wà mèyi wà mèbà àbidi, elàayipù diyiisha dyà mèbà àbidi; kàdi panwikalà kanùyì nwenza mukàbà wà mèyi bwà cintu kampànda cyà mùshindù awu to, dîbà adi kòsolojàayi diyiisha dyètù adi, nwamònu's, tukòsolojàayi diyiisha dyètù adi. Ndi nzwambila bwà cinyi, kùdi aba bàtù buukuta ànu bipeepèlè nunku, bakwàbò bôbò batu buukuta ànu pàadyàbo ntàntà mule, nwamònu's, mùshindù awu, nènku bikèngela wèwè kwikalaku mwimanyine pankaci menemene.

¹⁶⁴ Nènku mpindyewu, misangu yàbùngi twètù tutu tunyangakaja masangisha ètu mu dyenza dyà disangisha dyà majaadiki à muleebuleebu, ne ndi mumanye ne mèmè ngudi mupiiile bwà dibyènda. Kàdi nuwva nupàtuka panùvwà ne ciibidilu cyà kwenza masangisha à mu misèèsù, ne nulekela mwanèètù wa balùme kampànda mukulàkaji wimana pàapa, nènku yèyè neimane kwaka... Ne numulòmba bwà kwambaye mwàku wà disambila, kàdi yèyè neàditwe mu disambidila mulombodi wa cimenga, ne bwà nguvènà wa ditunga, ne bwà Mfùmù wa Cisangilu, ne—ne bwà bantu bònsò mùshindù awu, ne bwà bampaaasàtà bònsò bàà mu nyungulukilu abu, nudi

bamanyè's, ùbàteela ku muntu ku muntu, ne bwà Mwanèètù wa bakàji Jones udi mu lupitaadi, ne bintu byà mùshindù awu abi; ne bantu bàvwà biimane, bàvwà bendakana mu masangisha à mu mùsèèsù abu, bàvwà ànu, bàvwà bòbò bàtùngunuka—bàvwà bòbò bàtùngunuka ànu ne kwendakana. Nwamònu anyi? Yèyè ùvwa ànu ùbàcyòkeshà cyanàànà. Tudi ànu, nànsha nànkù. . .

¹⁶⁵ Nwamònu's, cintu cyà mushinga mpindyewu, bidi bikèngela bwà disambila dyèbè diikalè dyà mu musokoko, disambila dyèbè dyà mushinga, dyà dileedilè adi. Sambilàayi bònso. . . Bwela mu kazùbù kàà cisokomenu, injilà ciibi. Mwòmò amu ki mùdi mùkèngelà wèwè kusambila ditùkù dijimà, bufukù bujimà, anyi mèbà àbìdi, usambidile mwòmò amu. Kàdi bwà muneemu, mùdi ne ntèmà ya bantu bònso mitùma kùdi emu, ipìdijàku disambila dyèbè, diikalè dyà lukasalukasa, nda buludi ku bwalu. Enza bwà ne disangisha dyènù dijimà. . . Nènku tèèkaayi citùpà cinène cyà dībà dyà disangisha dyènù mu Dìyì adi. Ki cintu cyà mushinga ncyòci aci! Tuuta ne bukolè bwònso pa Dìyì adi ne mwèbè mwònso, wamònu's, fikishà Dìyì kùdi bantu.

¹⁶⁶ Mpindyewu, cìndi nganji kwamba ncyòci eci. Mpindyewu, mpindyewu vùlukàayi ne, ngàtondù ne mèmè ngudi mupìile bwà dikafikisha ku cyòci eci. Kàdi pashiishe ngánwàmbìdi ne mbwà cinyi ndi mucyènzèje, ndi ngenza mikàbà yà mèyi yà mèbà àbìdi yà ditùma dyàmwamwa dyà mbù ne ku myaba mikwàbò yònsò, yà Mukenji, nùdi numòna's. Kàdi kabivwa bikèngela bwà èkèleeziyà kutentulayè aci to (diyiisha dyà mu tabernacle emu) biikàle nulonda mikàbà yà mèyi (mèbà àbìdi) yìdi ne cyà kutumiibwa ku myaba kampànda ayi, nwamònu's, ne yipatuka mùshindù awu.

¹⁶⁷ Mpindyewu, mònaayi cìdi bulongame bwènù. . . Ngànji nnupèeshèku ànu cileejilu. Aci ncifwànyine kwikala cìmpè anyi, cìndi nganji kwamba aci? Ndi mufwànyine kwamba ne bivwa bikèngela bwà èkèleeziyà kwikalayè ne biibi byèndè byunzulula pa dībà kampànda, beena mu disangisha biikalè bènda bàbwela, misambu yikalè yimbiibwa. Nènku bantu bònso bàbwelè bwà kukuukwila, kì mbwà kusàmbàngana to. Ne kanubalekedi bwà kusàmbanganabo paanyimà to, nùbàmbilè bwà “Kutangalakabò ne kupàtùkilabo pambèlu, kì mbàsàmbanganana to. Nwènù baswe kusàmbanganana, kì pambèlu pònsò mpòpò pàapa. Kàdi ewu mmwaba wà cijila, wulamiibweku mukezuke.” Mpindyewu, piikalà Nyumà wa Mukalenge ùkwàta mudimu kaaba aka, tucilamàayi ciikàle Nyumà wa Mukalenge awu. Nwamònu anyi? Nènku—nènku Yèyè neàtùngunuke ne kukwàta mudimu. Nwènù kanùyì nwenza nànkù to, fùndaayi nùlame, nebyùpukè; ncyà bushùwà ne nebyùpukè. Nènku tulamàayi bwalu abu, ki wètù mudimu ngwòwò awu, ki bwà cinyi mèmè ndi kaaba aka dilòlò edì. Lamàayi ànu cintu eci cikùmbànangane ne—ne mèyi matùma aa.

¹⁶⁸ Mpindyewu tàngilàayi, ndi mufwànyine kwamba nènku. Pa

ciibidilu, ambà ànu twètù tufila dimanyisha dyà pabwàdì. . . ne nubambila ne nenwikalè mwà kukwàta diyiiisha kampànda pa mukàbà wa mèyi. Nwamònu anyi? Mpindyewu, Mwanèètù Neville yèyè mwikàle ne diyiiisha mwaba ewu diikalàye mwà. . . yèyè ne diyiiisha didiye muswè bwà kupàtula bwà bantu kupetabò, pa mukàbà wà mèyi, anyi cintu kampànda, nwàmbè ne: “Mpindyewu, mu dilòòlò dyà dyàlumingu dilwalwà edi netwikalè mwà kukwàta mukàbà wà mèyi wà mèbà àbìdì,” mukàbà wà mèyi wa mèbà àsàtù, anyi ní ngwà—ní ngwà bishi awu. “Netwikalè mwà kukwàta mukàbà wà mèyi wà mèbà àbìdì anyi àsàtù,” anyi cyònsò cìdì cifwànyine kwikalaku aci, “mu dilòòlò dyà dyàlumingu dilwalwà edi.” Ne dibà adi bantu mbamanyè. Ne pashiishe pààlwàbo, wàmbè ne: “Mpindyewu, netwikalè mwà kukwàta diyiiisha kampànda pa mukàbà wà mèyi dilòòlò edi. Nènku ndi ne diyiiisha kaaba aka dìndì muswè bwà kukwaciibwadi pa mukàbà wà mèyi bwà kudituminangana. Ndi. . .Ndi ndyumvwa mulombòdìbwe bwà kutùminangana diyiiisha edi. Nènku nedìikalè mwà kukwàciibwa pa mukàbà wà mèyi, didi mwà kwikala dyà mèbà àbìdì, mèbà àsàtù, anyi cyònsò ciikalàku aci.” Nwàmbè nàнку awu.

169 Kàdì, bu pa ciibidilu, ànu mùntù mèmè ngèza pàntù nya mu mwaba kampànda bu mùdì mu dimwè dyà ku masangisha à Beena Kantu-ku-byanza awu, anyi pàntù mpàtuka nya mu masangisha àanyì mwàmwa bwà mulongo wà babèedi. Bu mèmè mwà kwimana mwaba awu bwà kufila diyiiisha dyà mèbà àsàtù dilòòlò kampànda kumpàla kwà kwenza kwà mudimu wà dyondopa, nudi numòna kùdibi bikamfikisha aku anyi? Nwamònu anyi? Mòna’s, bantu, dilòòlò dyàlondà disangisha dyèbè didi dishàala cyàbìbìdì cimwè cyà mùvwàdì amu. Nwamònu anyi? Bwalu kabèena ànu mwà kukùmbànakù to, bidi bikèngela bwà bàye ku midimu ne bikwàbò byònsò.

170 Ndi mufwànyine kwanji kwamba nùku ne, pa ciibidilu. . . Mpindyewu, mwava mutàngile Mwanèètù Neville makèlèlè dilòòlò awu pàvwàye ùyiisha. Mpindyewu, ndi mumanyè ne twètù bònsò tudi bamanyè ne cìvwa ndiyiiisha dyà dipapulàngana. Ndi mufunde tuntù pa bidiye mwambe abi, ndi naatù mu mpaaya mwanyì emu, bwà kukwàtakù naatù mudimu mu mayiisha makwàbò àanyì mèmè mwine. Aci’s ncyà bushùwà. *Njila Wa Dipàndukila*, nwamònu’s, ne aci’s cìvwa diyiiisha dilenga dyà dikèma. Nuvva bamòne mùvwàye mudjikìje ne lùkàsà lwònsò anyi? Nwamònu’s, mu tusunsa tutwè ku makumi àsàtù ne tùtaanu, nwamònu’s, ne yèyè—yèyè mumbe mudjikìje. Nwamònu anyi? Mpindyewu, aci’s cìvwa cilenga cyà dikèma. Mpindyewu, ne Mwanèètù Neville mwine, pa ciibidilu èndè mayiisha àtu ànu mùshindù awu. Nwamònu’s, kì mmaleepa menemene to. Nwamònu anyi? Kàdì mwaba wunùdì nukashebeela disangisha dyènù mpa bintu byònsò byà bileepakanangane byà kumpàla kwà kufika ku

bwalu abi. Nwamònu anyi?

¹⁷¹ Mpindyewu, ne—ne panùdi nwenza aci. . . Mpindyewu, ndi mumanye, kàdi mpindyewu tângilààyi, ncyèna—ncyèna ngàmba nànkù mu mùshindù wà kufwishangana bundù to, kunùdi nwènu balubuludi, anyi balami, anyi—anyì mpaasàtà, kàdi ndi ànu nnwambila pàanyi cyanààna ne: nùmonàayi cidi Bulelèlè, ne eci ki cìdici ne cyà kwikala. Mpindyewu, nwènu. . . Cidi cìcyènza ncyini? Mpindyewu, bantu bònsò, nwènu bònsò, bàà ngiikàdilù mwímpè, muntu ne muntu wa ku kunùdi nwènu balùme bàdi ne ngiikàdilù mwímpè abu. Bu kabiyi nànkù to, mvwa mufwànyine kwamba ne: “Bònsò pa kuumusha Mwanèètù *Kampànda*, yèyè kèna ne ngiikàdilù mwímpè to, tudi bònsò tumusambidila.” Kàdi nudi—nudi bushùwà ne ngiikàdilù mímpè, kàbidi nudi ne mwoyi mule, ne kalolo, bantu bàà mùshindù wa batalale maalu. Abi’s mbilenga, kàdi kwikadi cìlùmaacìkàjì bwà ciine aci to.

¹⁷² Yesù pèndè, ùvwa ne ngiikàdilù mwímpè, kàdi pàvwà díbà difika dyà kwamba maalu anyi: “Bààkafùnda ne: ‘Nzùbu wa Taatù Wanyi mmwenza nzùbu wa disambila,’ kàdi nwènu nudi numuvwija cisòmbedi cyà bìvi.” Nwamònu anyi? Nwamònu’s, Yèyè—Yèyè ùvwa mumanye díbà òvwà dikèngelà kwakula ne òvwà kadiyi dikèngela kwakula to. Ki—ki—ki cidi cìkèngelà bwà twètù kwenza ncyòci aci. Nwamònu anyi? Kakùvwakù, kacya kakùtukù kwanji kwikala muntu bu Yesù to, Yèyè ùvwa Nzambì. Ne vùlukàayi ne, Yèyè ùvwa mene. . . Nwènu bàdi bàmba bwà kwikala mulami mu èkèleeziya, Yèyè’s—Yèyè’s wàkangata bukòòkeshi! Wàkaluka bipya byà myonji, ne Yèyè kààkindila bwà kubapatula ne kalolo kwònsò to, Wàkabàpàtula pambèlu wènda ùbàtuuta, nwamònu’s, bu mùvwabi ne mmu nzùbu wa Nzambì. Nènku Yèyè ùvwa wàngata kaaba kàà mulami, bu cileejilu cyènu *nvènu* balami. Nwamònu’s, Yèyè ùvwa Cileejilu cyènu. “Nènku mpindyewu, bààka—bààkafùnda ne: ‘Nzùbu wa Taatù Wanyi mmwenza nzùbu wa disambila.’” Mpindyewu, vùlukàayi ne, Yesù ùvwa Mulami díbà adi, nudi bamanye aci, Yesù ùvwa wàngata kaaba kàà mulami.

¹⁷³ PààkafikàYe pa kaaba kàà mpaasàtà, cyàkambàYe ncyini? “Nwènu Bàfaalèsà bafobo, balombodi bàà bampofò!” Nwamònu’s, Yèyè ùvwa wàngata kaaba kàà mpaasàtà, díbà adi.

¹⁷⁴ Kàdi pààkabàmbilàYe bìvwà ne cyà kwenzeka apu, Yèyè wàkangata kaaba kàà mupròfetà. Nwamònu anyi?

¹⁷⁵ Kàdi pààkalòmbàbo bwà ne kùvwà ne cyà kwikala difuta dyà citàdi, Yèyè wàkangata kaaba kàà mulubuludi ne: “Peetèlo, pwekàku ukeele ndobo mu musulu amu, ne mushipa wà kumpàla wuwàtùpulà awu wùdi ne cinjanja cyà mfranga mukana mwàwù amu. Ùbàfute, wamònu’s, ùfutè ànu mabànzà èbè àdi àkèngela kufuta awu.” KutwàmbilaYe twètù, ne: “Nupeeshe Kaayisà cidi cyà Kaayisà, Nzambì cidi cyà Nzambì.”

176 Yèyè ùvwa byónsò Mpaasàtà, Mupròfetà, Mulubuludi, ne Mulami. NcìvwàYe cyà bushùwà! Pa nàнку nudi numòna díbà adi cyàkenzàYe aci, cyòci aci cìikalè cileejilu cyènù mu nzùbu emu mu Branham Tabernacle, utùdi baswè bwà ikalè nzùbu kampànda mwikalàYe mwà kutwibwa mushinga mu kantu ne kantu kwònsò, mu mudimu ne mudimu wònsò, mu kaaba ne kaaba kònsò, bwà kamwikadiku ditwà dyà cìmpingà nànsha dikesè to. Mwikalè kalolo, ne bupòle, ne musangeelu, kàdi biikalè ànu buludi pa bwalu, muntu ne muntu pa kaaba kèndè kàà mudimu. Nwamònu anyi? Ki mùshindù ngwòwò awu, ki mùshindù ngwòwò awu wùdiYe mucìswe. Kacya Yèyè kàvwaku ne ngaakwilù wa makàyabwà to. Pàvwà díbà dílwa dyà kwakula, dyà kubiikila *cikampànda* ànu ne *ncikampànda*, mmùvwàYe ùcìbiikila. Pàvwà díbà dífika bwà kuleeja kalolo, díbà adi Yèyè ùvwa uleeja kalolo. Yèyè ùvwa ne bupolè, ne kalolo, ne lumvu; kàdi ne dísu dyumisha, ne kantu ne kantu kàvwa ànu pa kaaba kààkù kùdiYe Yèyè, ne Yèyè wàkenza aci bu cileejilu cyènù. Mpindyewu, aci ki cìdi Nyumà Mwimpè mufùme ku dimpèèsha. Pa nàнку mèmè ncìvwaku mudyélèle meeji à cyòci aci to, bwà ne Yèyè ùvwa Mulami, kwònsò aku, kàdi ki civwàYe. Nwamònu anyi? Yèyè—Yèyè wàkenza maalu bu mulami, díbà adi.

177 Mpindyewu, ndi mufwànyine kwamba nènku, kwamba ne piikalà masangisha enu àbànga pa díbà mwandamutekète ne tusunsa makumi àsàtù, piikalàbi ne ki díbà ndyòdi adi, nùkangulàayi èkèleziya wenù tusunsa makumi àsàtù kumpàla kwà díbà, pa díbà mwandamutekète jaajaja. Mwimbi wa cisanji cyà pyànò yèyè. . . Nwambile mwimbi wa cisanji cyà orgue. . . Nutu numufuta anyi? Nwènù bònsò nutu nufuta mwimbi wa cisanji cyà orgue anyi? Bàtu bàmfuta anyi, anyi mwimbi wa cisanji cyà pyànò? Útu wimba byà kabàyi bàmfuta anyi? Numulòmbaayi ne kalolo kwònsò. Nànsha yèyè muswè bwà kwikalabo bàmfuta bwà cyòci aci, bwà kwikalabò bàmfuta kantu kampànda bwà cyòci aci, mwambilaayi ne tudi baswè bwà yèyè kwikalapu tusunsa makumi àsàtù kumpàla kwà disangisha. Kàdi yèyè mwambe ne: “Èè, ncyèna ne mùshindù wà kwikalapu to,” anyi cintu kampànda, didyàbàkeena, díbà adi nùmulòmbaayi ànu cyanààna bwà àlwe mwaba ewu bwà kwenzaye mukàbà wà mèyi wà mujiki kampànda wà mutalale wà ku cisanji cyà orgue. Nudi numòna anyi? Nènku. . . nwèlàayi aci pa. . . Kabyèna bikèngela ànu bwà kwikalaye pòpò díbà dyònsò to, elàayi mukàbà wènù wa mèyi awu. Nwamònu anyi? Umwe wa ku balami, mulubuludi, anyi ní nganyì yònsò udi unzulula ciibi awu, mulami wa ku ntempelu, àwèlè muntwamu, mwine mukàbà wa mèyi awu, nènku wikalè wimba pàdi bantu bènda balwa apu. Nwamònu anyi? Bwalu balami bòbò kabàyipù to, anyi muntu kampànda, nènku, mulubuludi anyi muntu kampànda ikalèpu bwà kucyènza, díbà adi bàwèlè munda mwà tusunsa makumi àsàtù.

178 Kàdi ànu pa dîbà mwandamutekète ne tusunsa makumi àsàtù menemene apu, ngonga udi ku mùsongà wà nzùbu awu àdilè. Nwamònu anyì? Nucìtu ne ngonga wenù awu kuntwaku anyì? Èyowà. Èyo, ngonga wenù awu àdilè pa dîbà mwandamutekète ne tusunsa makumi àsàtù, nènku aci cidi cyùmvwija ne katwèna mwà kubànda kupweka mu èkèleeziyà ne kulabulangana ku byanza ne ba-Jones ne bakwàbò abu to. Mulombodi wa misambu abange mudimu wèndè! Kwòkò kakùyi mulombodi wa misambu mwaba awu to, balami bènzèku ne...anyì kùdi...bènzèku bwà kwìkalè muntu kampànda bwà kubanga dilombola misambu pàdì ngonga awu ubanga kudila apu. “Buululaayi mu mukàndà wènù wà misambu amu, nomba *kampànda*.” Nwamònu anyì? Cyènzekè ànu pa—pa dîbà mwandamutekète ne tusunsa makumi àsàtù menemene.

179 Èyo, pashìishe nùtumè musambu wa disangisha mu ciibûngì, ne pashìishe pàmwàpa musambu mwibìdì wà disangisha mu ciibûngì, ne pashìishe kwambila muntu kampànda unùkaavwa bamane kutwà munu, panwìkalà mwà kwenza nànkù, bwà alombole mu disambila. Mpaasàtà yèyè—yèyè, anyì, nànsa mene...Èè, kabìvwa bìkèngela bwà mpaasàtà kwìkalayepu to, bìvwa bìkèngela bwà mulombodi wa—wa misambu kwenzaye yèyè aci. M’Mwanèètù Capps, ngeela meeji. Nwamònu’s, yèyè ngudi mufwànyine kumanya cyà dyenza, yèyè—yèyè ambile muntu ukààvwabò bamane kutwà munu awu...anyì mene alombole yèyè mwine mu disambila. Kwambila disangisha bwà kujuukilabo kuulu bwà disambila, nwamònu’s, kujuukila ànu kuulu cyanàànà, nènku kwambila muntu kampànda bwà kulombolaye mu disambila. Mpindyewu, nwènù kanùyì batàngile bilenga to... .

180 Mpindyewu, tudi twitabuuya ne bìvwa bìkèngela bwà muntu yònsò kulwaye ku nzùbu wa Nzambì bwà kusambila, ki—ki mwaba wà kwìkala kusambidila ngwòwò awu. Kàdi panùdì mu mwaba wa cijila awu, ikalaayiku nulaminyina dîbà dyènù. Nwamònu anyì? Paùdì ubàbìikidila bònsò mu nyungulukilu wa cyoshelu amu, neùjandule ne nekwìkalè muntu kampànda washàalakù munda mwà tusunsa dikumi ne tutaanu, makumi àbidì; dîbà dyèbè dyùmba diya dyònsò.

181 Aci’s ki, nwamònu’s, disambila dyènù nkumbèlu kwènù. Yesù mmwàmbe ne: “Paùdì usambila, kwìkadì wimana mùtù beena lubombo benza amu to, ne—ne ntàntà mule... .benza disambila dileedilè, bàmba *bikampànda*, *bikansanga*, anyì *bikankènga*, ne—ne byònsò byà mùshindù awu bwà didìleeja.” Nwamònu anyì? KwambaYe ne: “Paùdì wèwè usambila... .usambila, bwela mu kazùbù, kazùbù kàà cisokomenu, injilà ciibi paanyimà pèèbè; sambila Tatwèbè ùdi ùmòna mu musokoko awu, Yèyè neàkufutè pa bùtòkà.” Mpindyewu, ki mùshindù ngwòwò awu wa kwenza disambila dyà mu musokoko, ki cyàkambaYe bwà kwenza ncyòci aci.

182 Kàdi panùdi nwènù, muntu kampànda, pàdibo bàbwela, mulombodi wa misambu, àmbè ne: “Èyo...” Paanyimà pàà musambu wà kumpàla, dībà adi muntu kampànda ènzè disambila, nànsha yèyè nganyi, kaadisambila kípì cyanààna. Kwikadi wàjuuka kuulu kàdi kubanga kusambidila banguvèna bônso, ne bikwàbò byônso mùshindù awu to. Kwòkò kwikàle malòmba kampànda à disambila, ikalè mamanyishiibwe, bìikalè baàtùme, baàtùmè, bààfùndè. Bámbe ne: “Mònaayi, bwà dilòlò edi, mu kusambila, netùvùlukàayi Mwanèètù wa bakàji *Kampànda*, Mwanèètù wa balùme *Kansanga* mu lùpitaadi, *Kampànda*, ne *Kansanga*, ne *Kankènga*. Nwabàvùlukaayikù mu masambila ènù panùdi nusambila apu. Mwanèètù Jones, swaku ùtùlomboleku mu disambila. Tùjuukilàayaaku kuulu.” Nwamònu anyi? Ditàèekiibwè pa cyambilu. Nùbàmbilè, bìibidilanganè ne cyòci aci ne: “Wèwè ne dilòmba dyà disambila, lwà ùditèèkè *apa*, *apa* nùnkù.” Kanwikadi nwamba ne: “Nganyi udi ne dilòmba mpindyewu, swàku ùdimanyishè mu...” Ne pashùishe, katancì aka anyi, muntu kampànda ùdi ùjuuka kuulu wàmba ne: “Butùmbi kùdi Nzambi’s wè!” Nudi bamanyè’s, bibanga nànkù awu, katancì aka anyi, misangu mikwàbò bikaadi byangàte tusunsa makumi àsàtù kumpàla kwà kusòmbabò. Nwamònu anyi?

183 Twètù tudi bambùle bujitu bwà èkèleeziya ewu, kí mbwà mikwàbò nànsha; ebu mbwètù bujitu butùdi bambùle kumpàla kwà Nzambi. Midimu eyi mbwènù bujitu bunùdi bambùle kumpàla kwà Nzambi. Nwamònu anyi? Kabingilà kàdi kenza ne ngàmbe nùnkù mwaba ewu dilòlò edi, pàndi nnwàmbila byônso ebi apa, mbwalu mbujitu bwànyì kumpàla kwà Nzambi; mbujitu bwènù: Bikùmbaraayi. Nwamònu anyi?

184 Mpindyewu, ne pàdi cintu kampànda bu nànkù awu... muntu kampànda àlombole mu disambila, ne pàdiye usambila apu, mbimpè be, alombole mu disambila, pashùishe nùsombe.

185 Kàdi wèwè ne musambu wa pabwàwù...Mpindyewu, ncyèna mufwànyine kwamba eci to, ncyèna mufwànyine kuya mumwe ne...Kàdi muntu yèyè ùjinga kwimba musambu wa pabwàwù, nùcimanyishè mu èkèleeziya. Nùbàmbilè ne: “Misambu yónso ya pabwàyi, anyi cyónso cidì muntu muswè kwimba aci, àmonangane ne mulombodi wa misambu kumpàla mene kwà èkèleeziya kàyi mwanji kubanga to.” Nènku nùwàngate...Nwàmbe ne: “Èè, umfwileku luse, Mwanèètù wa balùme, ndi muswè...ndi bushùwà muswè kucyènza, kàdi ndi—nkàadi ne musambu wa pabwàwù dilòlò edi. Pàmwàpa wèwè mwà kungambila ne newikalèku mwab’ewu dilòlò kampànda, nèngwèlè mu ndongamu bwèbè wèwè. Wamònu’s, nkàadi ne ndongamu wanyì mumana kufùnda mwaba ewu.”

186 Mwanèètù Capps anyi ní—ní nganyi udi ulombola misambu awu...Nènku nwìkalè ne mulombodi wa misambu, nànsha yèyè mwìkalè nganyi. Kàdi kanumulekedi wimana kàdi kwamba,

anyì kubanga kuditwàla byenze bu ne ùkaadi muyiishi to, nwamònu's. Imane ànu mwaba awu àlombole misambu, ki wèndè mudimu ngwôwò awu.

¹⁸⁷ Mudimu wa kuyiisha ngwà mpaasàtà, nwamònu's, kî ngwà kulombola misambu to. Kabyèna bikèngela bwà kulombolaye misambu to, mulombodi wa misambu ngudi ulombola misambu. Yèyè mwambùle bujitu, ne bìvwa bikèngela bwà kupàtukaye ne citaleela cyònsò mu dilaabiibwa dyà Nyumà Mwímpè, ùpàtuka mu bìrò mwàmwa, mu mwaba kampànda, pàdi ànu díbà ne dyákùmbanyi. Kabyèna mene bikèngela bwà yèyè kwikala pa cibùmbà cyà ku cyambilu, pàdi biine ebi munkaci mwà kwenzeka apu to. Yèyè àshaalè ànu mu bìrò paanyimà pààpa, nwamònu's, anyì paanyimà lwà munda emu, anyì ní mpenyi pàdibi mwà kwikala apu, ndongolwelu wa maatèlèfone udi apa ewu neàmubiikidishè, nwamònu's, pàdi díbà dikùmbana. Pàdiye ùmvwa musambu wà ndekeelu awu. . . piikalàku musambu wa pabwàwù, bu mùdì musambu wa muntu wimba nkààyèndè, wà bàbidì, anyì cintu kampànda, bu musambu wènu mwisàtu. Nwamònu anyi?

¹⁸⁸ Apu nenwìkalè bamane kwimba misambu yìbidì yà disangisha mu ciibúngì ayi, disambila, milàmbù yènu panwìkalà mwà kuyàngata. Nènkù muntu ne muntu ikalè pa kaaba kèndè kàà mudimu. Nwám bè ne: “Èyo, patùdì munkaci mwà kwimba musambu wà ndekeelu ewu apa, mpindyewu, bu baawìsiyè mwà kuswà, balweku kumpàla eku bwà milambu yà dilòlò edi.” Nwamònu anyi? Nènkù pàdìbo munkaci mwà kujikija dimba dyà musambu awu apu, ki baawìsiyè bàkaadi biimane apa aba. Nwám bè ne: “Èyo, mpindyewu netwìkalè mwà kwenza disambila, ne mu kwenza kwà disambila amu, tudì baswe kuvùlukaku *Kampànda* mwab'ewu, ne *Kansanga*,” nubala cyòcì aci, nudi bamanyè's, mùshindù awu, mùshindù awu. “Èyo, muntu yònsò ajuukile kuulu. Mwanèètù wa balùme, udikù mwà kutùlombola mu disambila anyi?” Pashìishe byònsò bijika.

¹⁸⁹ Díbà adi pàdìbo munkaci mwà kwimba musambu mwibìdì ewu apu, anyì wònsò wunùdì munkaci mwà kwimba awu, bìdi bikèngela bwà nwènu, kumpàla, kusangisha milàmbù yènu, panwìkalà mwà kusangisha milàmbù yènu. Nùyìshìyaayi. . . Ndi mufwànyine mèmè kwangata musambu wènu wà kumpàla awu, ne pashìishe kusangisha milàmbù yènu yà dilòlò, ne pashìishe kutùngùnuka ne musambu wènu mwibìdì, ne pashìishe kutùngùnuka too ne ku ndekeelu kwàwù. Pashìishe musambu wènu wà ndekeelu ewu, musambu wènu wà ndekeelu ewu, nwamònu's, wìkalè wà dibìikila naawù mpaasàtà. Nènkù pàdi ànu musambu wà ndekeelu awu wumana kwimbiibwa, cisanji cyènu cyà orgue aci cìbangè ne kaamusambu kèènu—kèènu—kèènu kàà dibanga naakù aku, mpaasàtà wènu ùmba ùpàtuka. Nwamònu's, maalù ónsò àdi mu bulongame. Bantu bònsò bàdi mu cinyàànyà. Kakùcyèna kàbidì cintu cyà kwamba

to. Mulami ne mulami yónsò pa kaaba kèndè kàà mudimu. Mpaasàtà ùdi wìmana mwaba awu.

¹⁹⁰ Ùdi ùpàtuka, ùsekelela batèeleji bèndè, ùbuulula Mukàndà wèndè ne wàmba ne: “Dilòòlò edi, netùbalè mu Bible.” Nwamònu’s, paanyimà pàà yèyè mumane kucìlongolola ne: “Netùbale mu Bible.” Ne misangu mikwàbò ncintu cìmpè bu wèwè mwà kwamba ne: “Bwà kuneemeka Dìyì dya Nzambì, tujuukilaayiku kuulu patùdì tubala Dìyì apa.” Nwamònu’s, pashìishe ubala ne: “Dilòòlò edi, nèmبالè mu Mukàndà wà Misambu,” anyì cyònsò cìdìku aci. Anyì muntu wa cyanààna acìbale yèyè, mulombodi wa misambu, anyì mukwàcishi, muntu kampànda unùdì nendè mwaba awu, acìbale yèyè, nànsha ciikàle cinganyì; kàdi mbitàmbe bwìmpè bu wèwè mwine mwà kudìbadilaci, pawikalà ne mùshindù. Dìbà adi ucìbala mùshindù awu, pashìishe wangata cyena-bwalu cyèbè. Nwamònu anyì? Mu mutancì wònsò awu, ukàadi mwangate tusunsa tutwè ku makumi àsàtù, ne dìbà adi nukàadi bu pa dìbà mwandamukùlu nàнку awu.

¹⁹¹ Ne kuumukila ku dìbà mwandamukùlu too ne ku dìbà diipacila ku tusunsa dikumi ne tutaanu kumpàla kwà dìbà citèemà, mwaba kampànda pankacì pàà tusunsa makumi àsàtù ne makumi anaayi ne tutaanu, wàdijè Dìyì adi mwaba awu menemene ànu mùdì Nyumà Mwìmpè ùkupèèshaDi amu, wamònu’s, ànu mùshindù awu, uDitèeka muntwamu nu mùshindù wùdìYe wàmba bwà kucyènza awu, wamònu’s, mu dilaabiibwa adi.

¹⁹² Pashìishe enza dibìikila dyèbè dya ku cyoshelu, wàmbe ne: “Kwòkò muntu kampànda kaaba aka mu èkèleeziyà emu muswè bwà kwitaba Kilistò bu Musùngidi, tudi tukulòmba, tukubìikila bwà kulwa ku cyoshelu ànu patùdì twakulangana apa, juukila wèwè ànu kuulu cyanààna.” Nwamònu anyì?

¹⁹³ Kàdi muntu nànsha umwe yèyè—yèyè kàyì mujuuke to, wàmbe ne: “Kùdikù muntu kampànda kaaba aka mwikàle mudìlongolole bwà dibatiiza, mwikàle mumane kunyingalala, ne muswè bwà kubàtìijibwayè mu màyì bwà dilekelediibwa dya mpèkaatù anyì? Yèyè ùjinga kulwa, nyèwù tukupèèsha mpùngà awu mpindyewu. Udikù mwà kulwa pàcìdì cisanji cyà orgue munkacì mwà kwimba apa anyì?” Nudì numòna anyì?

¹⁹⁴ Muntu nànsha umwe yèyè kàyì mulwè to, dìbà adi amba ne: “Kùdikù muntu kampànda kaaba aka udi muswè... utu kàyikù mwanji kupeta dibàtìiza dya Nyumà Mwìmpè kàdi muswè bwà kwenza nàнку dilòòlò edi, muswè bwà twètù kumusambidila anyì?” Èè, pàmwàpa muntu kampànda ùdi ulwa, dìbà adi bantu bàbìdì anyì bàsàtù bàmutentèkèlè byanza, bàmusambidilè. Umutùme buludi mu cìmwè cyà ku bibambalu bìdì paanyimà pàapa byàbya, muntu kampànda aye nendè muntwamu, àmuleeje njila wa kuya kafika too ne ku

dibàtiiza dyà Nyumà Mwîmpè. Beena mu disangisha bônso bàdi basanganyiibwa kule naabò.

¹⁹⁵ Muntu kampànda yèyè mulwè bwà kwikala . . . muswè bwà kwitaba Kilistò ne mwimane ku cyoshelu aku bwà bôbò kumusambidila, enza . . . àsambile. Ne pàdiye usambila apu, amba ànu ne: “Inyikaayi mitù yènù mpindyewu, tudi baswè kusambila.” Nènku amba ne: “Udi witabuuja anyi?”

¹⁹⁶ Kantu nànsha kakesè kàà bîshi kôkò kafwànyine kujànguluja disangisha mu mùshindù kanà wónsò, umutùme buludì mu cibambalu cyà masambila, nènku wèwè ùbwelemu nendè, anyi ùmutùmemu ne muntu. Kàdi disangisha ditùngunuke dyôdi, wamònu’s, mùshindù awu, dîbà adi kwèna mubàlamè pa kaaba nànsha kàmwè to. Nwamònu anyi?

¹⁹⁷ Nènku pashiishe pàcidi . . . kumpàla kwà . . . Mu—mu ndambù wà . . . dîbà adi bôbò, wàmbe, muntu nànsha umwe yèyè kàyì mulwè to, dîbà adi wàmbe ne: “Nkufwànyineku kwikala muntu muswè bwà kumulaababò maanyi dilòlò edi, bwà kusaama kwendè anyi? Tutu tusambidila babèedi kaaba aka.”

¹⁹⁸ “Èè, ndi muswè mmonanganeku neebè pàà nkààyetù, Mwanèètù Neville.”

“Èè, umòngananeke naanyi mu birô. Mòngana ne umwe wa ku balami, bôbò nebàtàngile bwalu abu.” Nwamònu anyi?

“Kàdi’s ndiku ne kaabwalu kàndi njinga kukwambila, Mwanèètù wa balùme.”

“Èè, umwe wa ku balami mwab’ewu neàye neebè ku birô, nènku netù- . . . Nèmmònganè neebè dyàkàmwe paanyimà pàà disangisha.”

¹⁹⁹ “Mpindyewu, patwikalà mwà kujuuka mpindyewu bwà kutangalaka apa.” Nwamònu’s, nènku kanwèna bapicishe dîbà dijimà ne tusunsa makumi anaayi ne tutaanu bwà byónsò bisanga to. Nwamònu anyi? Nwamònu’s, dîbà dimwè ne tusunsa makumi àsatù, disangisha dyènù dyumbe dijikè. Nudi bapete kaacikùmà kakesè, kàà lukasàlukasà; nudi—nudi bacipèeshe cidici cyenze aci; nwènji . . . ne bantu bônso mbasànkishiiibwe, ne bàdi bàalukila mu màabò badyúmfwè bilenga. Nwamònu anyi? Wèwè kùyì wenza nànkù to, dîbà adi, udi umòna’s, wèwè mulekèle . . . Wamònu’s, udi—udi—udi ne meeji malenga, wamònu’s, kàdi mòna ne . . .

²⁰⁰ Nudi bamanye’s, mbidimu bitwè ku makumi àsatù ne bisàtù ebi bìndi mu cyambilu eci, bidimu makumi àsatù ne bisàtù, ne pa buloba bujimà. S’udi uyiila kaacintu kampànda mu ciine cikondo cyónsò aci, cyà bushùwà’s. Nwamònu anyi? Kabiyi nànkù to, s’mbipiciibwe ne wèwè mubilekèle. Nànkù dîbà adi, nwamònu’s, ndi mujandule eci nùnkù: Mpindyewu, wèwè ukwàta mudimu ne Bansantu ànu bôbò pa bôbò, balùmyànà wa

yààyà, wèwè's udi mufwànyine ànu kushààla bufùku bujimà bu wèwè muswè kushààla. Kàdi udi . . . Nwamònu's, kwèna ukwàta naabò mudimu ànu bôbò pa bôbò to, udi uteeta bwà kubàkula aba bàdi pambèlu apa aba. Baùdi munkaci mwà kubàkula's mbôbò aba, bikèngela ùkwàcile mudimu mu cyàbò citùpà. Nwamònu anyi? Nènku kanwikadi . . . Lwàyi naabo muneemu ne pashiishe Dìyi dilwe, ne dîbà adi, nwamònu's, kakwena cintu nànsha cimwè cidì mwà kwikala cyà bàdyàbàkeena to. Ní kùdi bwalu kampànda bùdìbo baswè kukumwèna, èè, s'mbilenga, bwèla ànu naabò buludi mu bìrô mùshindù awu, kàdi kushààdi mulame disangisha to.

²⁰¹ Dîbà adi, nudi bamanyè's, bantu nebàjuuke bàmba ne: "Èè, ndi nkwambila's, twènzèku disangisha dîmpè dyà majaaniki's." Nwamònu anyi? Ncyèna ne meeji à kwenza didyulangana nànsha dikesè pa bwalu ebu to, ndi ànu ne meeji à kunwambila Bulelèlè. Ndi ne meeji à kunwambila Bulelèlè. Nwamònu anyi? Nkààdikù musangane masangisha à majaaniki à mapite . . . atu—atu mîngà misangu enzelangana bibì kutàmba kwenza kwa bìmpè. Nwamònu's, mmùtùwu enza cyà bushùwà.

²⁰² Mpindyewu, muntu yèyè ne bujaadiki bwà kapyà mu cikondo cyà ditàbuluja, nudi bamanyè's, panùdi munkaci mwà kwenza ditàbuluja apu, nudi bamanyè's, disangisha, ne muntu kampànda musungidìibwe ne ùjinga kwambaku ànu dîyi kampànda, èè, Nzambi àbènèshiibwe, numulekelaayi apeepejèku bujitu bwà mu musùukà wèndè. Nudi numòna anyi? Yèyè—yèyè muswè—yèyè muswè kwenza aci, nwamònu's, ànu mu cikondo menemene cyà ditàbuluja aci, wàmba ne: "Ndi muswè kwamba ànu cyanààna ne: 'Ndi nsàkidila Mukalenge bwà bìdiYe mungenzele.' Yèyè mmunsungile lumingu lushààle elu, ne mwoyi wányi wùdi wùlákuka kapyà ne butùmbi bwà Nzambi. Twasàkidila kùdi Nzambi," ùsòmba panshì. Amen! Aci's ncilenga, tùngunukàayi. Nwamònu's, aci ncîmpè.

²⁰³ Kàdi paùkaadi wamba ne: "Mpindyewu lwàyaaku. Udi mulondele nganyi? Udi mulondele nganyi? Mpindyewu twànji kuumvwayiku dîyi, twànji kuumvwayiku dîyi dyà bujaadiki." Mpindyewu, nwènù ne disangisha dimana kulongolola, dilòòlò kampànda bwà ciine aci, nwamònu's, nenwikalè mwà kuteeleja: "Dilòòlò edi . . . mu dilòòlò dyà diisàtù dilwalwà edi, pamutù pàà disangisha dyà milòmbò, neciikalè disangisha dyà majaaniki. Tudi baswè bwà muntu ne muntu àlwemù, nènku neciikalè disangisha dyà majaaniki." Nènku dîbà adi pàdìbo bàlwa pa—pa mwaba awu bwà kufila majaaniki, bala Dìyi, enza disambila, ne pashiishe ambà ne: "Mpindyewu tudi bamanyishe ne edi ndilòòlò dyà majaaniki." Pa nànkù bantu bafile majaaniki mu dîbà dimwe adi anyi tusunsa makumi anaayi ne tutaanu, anyi tusunsa makumi àsàtù, anyi cyònsò ciikalàku aci, ne pashiishe—pashiishe nùtùngùnùke mùshindù awu. Nudi bamòne cindì njinga kwamba aci anyi? Nènku ndi ngeela meeji ne

necyàmbulwishe disangisha dyènú adi, necyàmbulwishe kantu ne kantu, byònsò, bu nwènú mwà kubyenza mùshindù awu.

²⁰⁴ Mpindyewu, cidi . . . Dìbà ndyedi dikaadi dyènda dimpita, pa nànkú . . . Bânà bèètù—bânà bèètù, ebi ki byà ku dyànyì pàànyì dimanya. Ndi mmòna cìdì pa mwoyi wènú, eci ki dyànyì pàànyì dimanya pa bìdì bitàngilà nkonko yinùdì bèle. Mpindyewu, bwà kubangila leelù kaayi nwàmanyi. Nènku bu cyòci mwà kunuvwilaku mu meeji, lwâyì ku mukàbà wà mèyi. Konkàayi aci . . . Nùteelejàayi mukàbà wà mèyi. Nì mbwà balami, bwà balubuludi, anyì bwà ní ncinyì ní ncinyì, mukàbà wà mèyi awu wèdiibwe. Bawélèlè disangisha mwaba awu piikalàbo baswè kucitèeleja. Èyo. Nènku ki—ki dyànyì pàànyì dimanya ndyòdì adi pa bìdì bitàngilà diswa dyà Nzambì bwà tabernacle ewu wa mu masangu à Mùsèèsù wa Mwandamukùlu ne wa Penn, ne wòwò awu ki mùshindù wúndì mèmè nnutùma nwènú bânà bèètù ne mudimu wa kukumbaja cyòci eci mu bulombodi bwà Nyumà Mwìmpè, ne musàngèelu wònsò ne dinanga, nuleeja ngàwà wènú kumpàla nwà bantu ne nwènú nudi beena Kilistò. Kàdì *mwena Kilistò* kèna ùmwija ne mmwàna udibò mwà kwikala batumakaja eku ne eku myaba kanà yònsò to, aci cidi cyùmwija ne “mmuntu udi mùle tètè ne dinanga, kàdì nànsha nànkú, mùle tètè ne dinanga bwà Nzambì ànu mùdiye naadi bwà disangisha amu.” Nudi bamòne cindì njinga kwamba aci anyì?

²⁰⁵ Kùdì lukonko anyì? Mukàbà wà mèyi wùkaadi wàmba kutwà ku ntengu mwab’ewu, ne mèmè pàànyì ndi ne muntu mungindile kuntu kwàka. Yèyè mwine ùwà ne cyà kwikala kuntwaku pa dìbà kaayi? [Billy Paul ùdi wàndamuna ne: “Mpindyewu mene.”—Muf.] Mpindyewu mene. Ùdi ùdìvwila anyì? [“Mèmè nguyàaya kamwangata.”] Èyo. Èyo, mukalenge.

²⁰⁶ Mpindyewu, ndi mumanye ne tukàadi tupàtuka mpindyewu piikalàku kakùyi dīyì nànsha dīmwe—nànsha dīmwe dyà kusàkidila. Huh? Mpindyewu, dyòdì kadiyìku, tütangalakaayi. Èyowà. Èyowà, Mwanèètù Collins? [Mwanèètù Collins ùdi wàmba ne: “Bìwà mwà kwikala bìmpè bu bóbò mwà kwimanyika mikàbà yà mèyi.”—Muf.] Èyo. [Kàtùpà kàà mukàbà wà mèyi munda mutupù.]

²⁰⁷ Èè, bânà bèètù, ngányishì diikalanganaku neenù mwab’ewu dilòòlò edi, ne Mwanèètù Neville, ne kùdì balami, ne balubuludi, ne mutàngidi wa kàlaasà kàà Dyàlumingu, nwènú bwònsò. Tudi batwishìbwe ne Mukalenge neànwàmbùlwishèku mpindyewu bwà kukumbaja mèyi matùma aa bwà Bukalenge bwà Nzambì. Cidì cyenze ne ngàmbè cyòci eci mbwalu ndi ngeela meeji ne nukàadi bakolè buumuke ku bwàna butekète bayè ku buntu bukolè. Paùcìvwà mwàna mutekète, ùwà wàkula bu mwàna mutekète, ne ùwà ùmwà maalu bu mwàna mutekète. Kàdì mpindyewu ukàadi muntu mukolè, pa nànkú twènzàayi maalu bu bantu bakolè mu nzùbu wa Nzambì, biikàle tuditwàla mu

mùshindù mulenga, ne biikàle tutwà midimu yètù mushinga, ne tutwà mudimu ne mudimu wónsò mushinga. Dìpà dyónsò didì Mukalenge mutùpèèshe, tùdìtèèkaayi mu bulongame, ne tutwayi Nzambì mushinga ne mapà ètù ne midimu yètù.

Tùsambilàayi.

²⁰⁸ Taatù wa mu Dyulu, tudi tuKusàkidila dilòlò edi bwà dikùngwila dyètù pàmwè edi dyà bantu bàdi batèèkìibwe mu midimu kaaba aka bwà kukùmbaja mudimu wa Mukalenge wùdì munkaci mwà kutùngùnujiibwa muneemu mu Jeffersonville mu èkèleezìyà ewu. Nzambì, swàku bwà cyanza Cyèbè cìikalè pambidi pààbò, swàku bwà Wèwè ùbǎmbùlwishè ne ùbàbènèshè. Swàku bwà disangisha ne bantu bǔm̀vwè ne bàmanyè ne eci mbwà kuvwija Bukalenge bwà Nzambì butàmbe kulengela, bwà twamòna mwà kulwa bantu bakolè bàà luumvu ne kumanya Nyumà wa Nzambì, ne kumanya cyà dyenza. Enzaku nàнку, Taatù. Ùtùtangàlǎjeku mpindyewu ne mabenèsha Èbè, ne swàku bwà Nyumà Mwìmpè wàtùtábaleelakù ne wàtùlombolakù, ne wàtùkùbakù, ne swaku bwà misangu yónsò twásanganyiiwbakù bàà lulamatu pa kaaba kàà mudimu. Mu Dìnà dyà Yesù Kilistò, mmùndì ndomba emu. Amen. 🕊

63-1226 Bulongàmè Bwà Èkèleeziyà
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org